

WAHA RARA

MITI RANÇAnere papia qizec namba 2 irec zâñe WAHA RARA inuc fuakac. Zâñe i gañ 13 â gañ 19 ombâñe 1 ira fuakac. Papia irec mañnao Israe ñic jañere binañ zuhuckerâ ziñuc fokac: Mose e fuarâ sokame Wofuñzi Israe ñicfâc-ticne Faraore meonec batarac-jopaocte manasuhuc Mose soreme hahac-ticne Aroñ ehec jojowac erâ Aigita ñic jañere ñicwofuñ Farao e fuacnepic. Erâ ere maio dâñgie sâko bakupire Farao e qaqatara gie bâipie feku Wofuñ dockecnerâ Israe ñicguru râec-jopame jañe Aigita mâreñkonec waha ram-biñ, mâreñ burocnao. Raku Sinai tikio fisim-biñ. Binañ sasawa i hâcne WAHA RARA papiao qâreñkekiecne fokac.

Erâ i sawa mâcne, Israe ñic juju â ee-bapa-jenjicte fuñne i mâmâc mutaniñkekiecne fokac. Jañe mâreñ burocnao wiac ñemâcne gâcne fua-jareme mamasasiñ-jenjic goroñkeme Wofuñ râpeckezo embiñ â micne jahec-jenjic Mose â Aroñ mu kâroñ boc ejaactembiñ. Ehame Wofuñ Anutu e buuruc â erâ-eesanañ-ticnere erâ sifu mi bebehec-jopa mâsi fuñne fuñne bahuc bafic-jopahuc juwec. Ehuc wâc Sâcmutâc Sanañ Teñ jarehuc jañehec zâzâfic ewec, â qoruc boze bapie ñonden-jenjicko ñeñe juju eocte mu-panke-jarewec. Ine hâcne, Israe ñic jañe Wofuñ-jenjic behezo ehapie eki mi beheç-jopawec, jañe kiñ bahac bâfuahapie eki akic-jopahuc manjaouñ-ticnere fuñne jañerao bataniñkewec. Papi-

are dâŋqizecne ziŋuc honenŋopeneŋ: Anutuzi hâcne Wofuŋ jukac, eki Israe ŋic kâpâcwâruecne batarac-joparâ e jahacne ŋicguru erâ juniŋte giene bawec.

Dâŋ nenŋocne nenŋocne gaŋ sâc kecziŋuc forakac:

Wah 1:1–7. I mumuzâwe dâŋ.

Wah 2:8—Wah 7:7. Ira Israe ŋic jaŋe Aigita mârenko fific bacjopa-kicne irec dâŋ fokac.

Wah 7:8—Wah 13:16. Ira ine Anutuzi mume Aigita ŋic jaŋerao okacne wiac hâhâwicne fuŋne fuŋne fuawec irec binaŋ fokac.

Wah 13:17—Wah 18. Israe ŋic jaŋe Aigita mârenkonec waha rambiŋ irec dâŋ.

Wah 19—24. Sinai tikio zâzâfic fuawec, eme zâzâfic irec dâŋmiti, Sâcmutâc Sanaŋ Teŋ hâcne, i Anutuzi Mose râcnewec, irec dâŋ.

Wah 25—31. Qoruc boze bapa erâ taha bapa fufua irec sâcmutâc.

Wah 32:1—Wah 35:3. Zâzâfic ranqane qâsuapie mocwâc heqâre-jarekicne.

Wah 35:4—Wah 40. Tiri boze irec babazawie gie baku tiri boze âkendâŋnemiŋ irec dâŋ.

Aigita ŋic jaŋe Israe ŋic bomac-jopambiŋ

¹ Israere ŋokâfâc jaŋe ru sâc ŋokac naru motecfâc-jeŋic jaŋehac â mamac-jeŋic Jakobo ehac mâmâc Aigita mârenko ra fisimbiŋ jaŋere zâŋe biri ziŋe hâcne: ² Ruben, Simeon, Lewi â Juda. ³ Isasa, Sebulon â Benjamin. ⁴ Daŋ â Naftali, Gade â Ase. ⁵ Jakobore qâricfâc sasawa jaŋere qâqâhâc zare 70; Josefe eki ine biac juwicnao Aigita mârenko ra juwec.

⁶ Eme Josefe hahacfâcne â wiacfâc-jeñic jañe juku hâmo-fârembiñ. ⁷ Ehame qâricfâc-jeñic jañe ine fua soka erâ sawe mâririackepie zare-jeñic fejâmbânkeme sananjerâ mâreñ fusucma sâqorembiñ.

⁸ Ehame Aigita ñic jañere ñicwofuñ qâricne moc fuawec e Josefe kâuc bawec. ⁹ Eki hâcne ñicfâcne zîñuc jazawec: “Mananğopieñ, Israe ñic jañe siric-nâpopie zare â tâpiri-jeñic boc fekac. ¹⁰ Ajoc, nânjâc bomac-jopanzepeñeñ, jañe boc sawe mâririackepie juku zika wiac moc fua-nâreme râsifâc-nâñec qâtec-joparâ nâpohuc mâreñ nâwoc ronzipiñkohec.” ¹¹ Inuc mume kia âkendân-jopapie jañe soñan-jopahuc gie hâhâwicne jarembiñ, ehuc Faraore nânâ rowañ hae jajahec, Pitoñ â Ramasesi bacjofaniñte mujarembiñ. ¹² Jañe ine bomac-jopa-bipiehapie sifu fehuc sawe mâririackembîñ, eme Aigita ñic jañe Israe ñic jañere hâwic-jopawec. ¹³ Irec Aigita ñic jañe Israe ñic kâpâcwâru gie ñemâcne mujarembiñ, ¹⁴ ehuc fific bacjoparâ gie ñemâcne jarepie zâic manahuc afezi fic bapa qânâ bambiñ, â nânâ gie he rikec â he sarac eniñte zoqac ejarembiñ wâc. ¹⁵ Eme Aigita ñicwofuñ e Hebiraio gozi bapa ñokac jajahec, Sifera â Pua, jahe zîñuc muhuc jasawec: ¹⁶ “Ñohe Hebiraio ñokac gozi baje-ñepire qâric fuapie honec-jopa-hâmozepirec, motec fuaocmuo bâhâmozepirec, naru fuaocmuo ine akickezepirec.” ¹⁷ Gozi bapa ñokac jahe ine Anutu arañ bacnehuc Aigita ñicwofuñzi dân jasawec i mana reren mi ee motec akic-jopapic wâc. ¹⁸ Inuc epiñe Aigita ñicwofuñ e gozi bapa

 okac hef arec-jofar  mu wioc zinjuc ejaetewec: “Nohe wemocte injuc ehuc motec jahe Farao d n zinjuc b tikiecnepic: “Hebiraio  okac jahe Aigita  okac injucne aricne, jahe  okac sana ne, irec gozi bapa  okac n ne mi fisihapene motec biac rocjopaengopien.” ¹⁹ Anutuzi ine gozi bapa  okac  ezic-jopawec irec  ic jahe fua sawec er  soka sana  embin . ²⁰ Eme gozi bapa  okac jahe Anutu aran  bacnehuc gie bambin te q ricf c-jen ic tahac-jopawec w c. ²¹ Injuc fuame Faraozi  icf cne zinjuc muhuc jazawec: “Hebiraio  ic janere motecf c fuanin mu s c Nilu op o behec-jopapie huf renzepien, naru jahe ine akic-jopanzepien.”

2

Mose fuawec

¹ Eme Lewi guruonec  ic moczi ra Lewi guruonec jaha  okac moc rowec. ² Eme  okac e juku motec kiwecker  rowec. Er  motec e sahad hawari-ticne bian ne, injuc honer  son keme foha mosa jahec   moc tarawec. ³ Eme zuhucker  ficko son keocte maname qun keme sasac moc soroqeczi fukicne i ror  kikisune s f zi b b zicke-f rer  motec ira r eme hume Nilu op  mecnao zamac zamac man ko heme  ewec. ⁴ Eme sen ticnezi ine wiac i me i moc fuacneme honezepac muhuc taicko son n  domawec. ⁵ Ehame Farao ot -ticne e op  ruaocte ra fisiwec, eme kin n  naruf cne jahe op  mecnao rac warec ehuc juhapie naru e sasac i b fuar  kin n  naru-ticne moczi roocte soreme huwec. ⁶ Eme bawefume tapane ror  mi

motec moc kiohuc foha honezejec i! Ehuc bune sâqoreme muwec: “Hebiraio ñic jañere qâric moc zine hâcne.” ⁷ Eme senticnezi Faraore otâ zîñuc âzâcnewec: “No ra Hebiraio ñokac moc âzâcnepe ware motec moñ gume-garezac me?” ⁸ Eme Faraore otâzi âzâcnewec: “Ra iñuc ec.” Eme naru e ra motec nenjoc-ticne jowa warewec. ⁹ Ware fisime Faraore otâzi âzâcnewec: “Go motec keczi bararâ moñ gume-narezemec, eme no irec furine garepemu.” Eme ñokac e motec bararâ moñ gumehuc juwec. ¹⁰ Eme motec e sokame Farao otâ-ticne bara râcneme motec-ticne erâ juwec. Ehame zâñe-ticne kecziñuc muhuc Mose muwec: “No opâonec fârepe wefuwec hâcne.”

¹¹ Eme Mose e juku soka tararâ damenñ mocko Israe ñic âgofâcne jañerao rarâ kâpâcwâru gie bahuc juhapie honec-jopawec. Ehuc Aigita ñic moczi Hebiraio ñic âgofâcne jañeraonec moc qame honewec. ¹² Erâ ñifec â ñifec ñic jañere zâñe fime arictac eme Aigita ñic qâhâmorâ mongenzi hefackewec. ¹³ Hae fureme mocwâc rarâ Hebiraio ñic jajahec perec eec ehapire ñic âgo-ticne manğân qawec e zîñuc âzâcnewec: “Go wemocte âgoge qakomec?” ¹⁴ Mume eki dâñ zîñuc bâतिकecnewec: “Nâñere ñic fekicne me mumutara ñic i mozi râecguwec? Go Aigita ñic qâhâmomec iñuc jaha no qâhâmocnuzo mukomec me?” Iñuc mume Mosezi hâwickeme zîñuc manasuwec hâcne: “Wiac epac i biac manafârenjopien i.” ¹⁵ Eme Faraozi biñe manarâ Mose qaocte qâqâreñne qawec.

Mosezi Midiañ mâreñko wiserâ rawec

Mose eki ine Faraoraonec wiserâ Midian mârenko ra juwec. E ira fisirâ opâ nombân mocte heririnjo waha newec. ¹⁶ Eme Midian njic jaņere taha bapa ere otâfâc 7 jumbin. Eme jaņe ware mamac-jeņicte lama bulimakao opâ gumec-jopaninje opâ fiarâ otoo honkepie huwec. ¹⁷ Ehame qowi soņaņ jaņe fisirâ jâpec-jopambin. Injuc epie Mosezi faharerâ naru bafic-jopahuc qowifâc-jeņic opâ gumec-jopawec. ¹⁸ Eme jaņe mamac-jeņic, zâņene Reguele, Jetro hâcne, erao fisipie zinuc wio-jarewec: “Nņone miņecgac weninuc erâ biac jâmbân wareņgopien?” ¹⁹ Jaņe mumbin: “Aigita njic moczi soņaņ jaņe jâpec-nâpopie bafic-nâpojec, ehuc opâ fia-nârerâ qowifâc-nâņec gumec-jopajec wâc.” ²⁰ Eme otâfâcne wio-jarehuc muwec: “Njic e wena? Nņone wemocte behepie nejec? Wirac-nepie ware nânâ nâzejec.” ²¹ Eme Mose e njic ehac juocte maname sâckewec, ehame njic e otâticne žibora Mose râcnewec. ²² Eme juku motec kiweckerâ rowec. Rome Mose e zinuc muhuc zâņene Geresom muwec: “No mâreņ furunao jaba jukopac.”

²³ Eme juku Aigita njicwofuņ Faraozi hâmowec. Israe njic jaņe ine kâpâcwâru giezi bâmâc-jopame mu huac buc â kio wâwâsic embin. Eme kâpâcwârueo juhuc kio wâwâsic epie Anuturao fe fisiwec. ²⁴ Eme Anutu e mu huac buc-jeņic manarâ Abraham, Isaka â Jakobo jaņehac zâzâfic ewec irec manasuwec. ²⁵ Erâ Anutu e Israe njic jaņe hone zemuraņ ejarehuc batarac-jopaocte manasuwec.

3

Wofunzi Mose giedâŋ mucnewec

¹ Mose e kimo-ticne Jetoro, Midianŋ ɲic jaŋere taha bapa, ere lamafâc soŋaŋ-jopahuc juwec. Eme lamafâcne mâreŋ burocne ocninucnao jowac-jopa raku Anuture tike Horebe ira fisiwec. ² Eme Wofunŋte aŋelozi zocbârun hawari fuacnewec, zoc i jâc dutu maŋkonec bâruŋkehuc domawec. Eme fime rame honewec, jâc dutu i bâruŋkehuc sifu mi zâtâcnewec. ³ Eme Mose e manasuwec: “No ipec rarâ wiac zâŋe furu fuakac i honepe, jâc dutu i wemocte mi zâtâcnekac?” ⁴ Inuc murâ wiac i hone taraocte ipec rame Wofunŋ Anutuzi honerâ jâc dutu maŋkonec wiracne muwec: “Mose, Mose!” Eme muwec: “No zi.” ⁵ Eme eki muwec: “Bembenko mi warec, kikehuhuge hetarac, mâreŋ domakic i furu.” ⁶ Erâ muwec: “No apafâcge Abraham, Isaka â Jakobo jaŋere Anutu.” Eme Mose e Anutu honezacte hâwickeme zâŋe maine bâsonkewec.

⁷ Eme Wofunzi muwec: “Ŋicfâc-nane Aigita mâreŋko fific guguriŋ ejarepie honekopac; â jopa tuntuŋ ejarepie kio owa enŋopieŋ i manakopac, zâic mananŋopieŋ i kâuc mi bakopac. ⁸ Erâ zi Aigita ɲic jaŋere meonec batarac-jopapemurâ wahakopac hâcne. Erâ mâreŋ irecne jowac-jopa rarâ mâreŋ bianŋe â qaratie-kicne sâko moc ira râec-jopapemu. Mâreŋ ira susu â baŋac fusucmarâ qâmbârinŋkeekac, Kanaanŋ ɲic, Hitinŋic, Amori ɲic, Perizi ɲic Hiwiŋic â Jebusi ɲic jaŋere mâreŋ. ⁹ Eme manakic, zi ine Israe ɲicguru jaŋere ki owa bâfuacnujec, â

Aigita ñic jañe bomac-jopaŋgopien i honekopac. ¹⁰ Irec fahare rac, no Faraorao sorecgukopac, go Israe ñicfâc-nane Aigita mârenkonec jowac-jopa razemec.” ¹¹ Mosezi Anutu âzâcnewec: “No inuçnezi wemocko Faraorao rarâ Israe ñic Aigita mârenkonec jowac-jopa rapemu?” ¹² Eme muwec: “No gohec jupemu. Noni sorecgukopac irec ma ine kecziñuc fuame honezemec: Israe ñic Aigita mârenkonec jowac-jopatecne tiki keczira Anutu no kiñañ qanareninmu.”

¹³ Eme Mosezi Anutu âzâcnewec: “No Israe ñic jañerao ra fisirâ ziñuc jazapemu, ‘Mimiñnefâc-nâñec jañere Anutuzi ñoñerao sorecnukac,’ eme jañe, ‘Anutu zâñene mo?’ inuç muhuc wio-narepie weninuç jazapemu?” ¹⁴ Eme Anutuzi Mose âzâcnewec: “NO JUKOPACZI JUKOPAC.” Erâ muwec: “Go Israe ñic ziñuc jazazemec, ‘NO JUKOPAC eki ñoñerao sorecnukac.’” ¹⁵ Erâ Mose zuhuckerâ âzâcnewec: “Israe ñic ziñuc jazazemec, ‘Wofuñ, mimiñnefâc-ñeñic Abraham, Isaka â Jakobo jañere Anutu, eki ñoñerao sorecnukac.’ Izi zâñe-nane fofo sanañ ekac, mimiñzi qâric zâñe-nane inuç hâcne muhuc junzepien. ¹⁶ Go rarâ Israe ñic micnefâc-ñeñic hetumañ-joparâ jazazemec, ‘Wofuñ, mimiñnefâc-ñeñic Abraham, Isaka â Jakobo jañere Anutu, eki fua-narerâ ziñuc nazawec: “No ñoñe honec-ñopakopac erâ Aigita ñic jañe wiac eñareñgopien i wâc mâmâc hone manac ekopac. ¹⁷ Ehuc ziñuc mupañkekopac, ‘No Aigita mâreñte fific guguriñkonec batarac-ñoparâ jowac-ñopa raku Kanaan ñic, Hitinçic, Amori ñic, Perizi ñic Hiwiñic â Jebusi ñic jañere

mâreŋko râec-ŋopapemu. Mâreŋ ira susu â banac fusucmarâ qâmbârîŋkeekac.’ ”’¹⁸ Eme jaŋe dânge manapie fârîne eha go Israe ŋic micne jaŋehac Aigita ŋicwofuŋ erao rarâ âzâcnenzepien, ‘Wofuŋ, Hebiraio ŋic nâŋere Anutu e fua-nârewec, irec mana-nâretec nâŋe zoaŋ jahec â moc ra juku mâreŋ tuhuo Wofuŋ Anutu-nâŋec taha bâzi rikecnenzepenen.’¹⁹ No ine zîŋuc manakopac wâc, Aigita ŋicwofuŋ e mesanaŋ izi me izi zoqac mi ecneha raniŋte mi mana-ŋareocmu.²⁰ Irec no menane sicnerâ jaŋere ŋondenko fuŋne qaqa mâsi bâfuahuc Aigita mâreŋ ima bapemu. Eme irec faicnao sâcne râec-ŋopame raniŋmu.²¹ Eme no Aigita ŋic ejarepe ŋoŋe âgo eŋareniŋmu, eme ŋoŋe behec-joparâ raniŋmu i metariŋ jâmbân mi raniŋmu.²² Irec ŋokac sasawa jaŋe Aigita ŋokac âgofâc-jeŋic erâ ficjeŋicko mâmâc juengopien jaŋe eri wiac, siliwa â golzi bakicne irec mecne, â ŋaqi wiac irec mâmâc numu-jarepie jarenzepien. Eme wiac i naru motecfâc-jeŋic hejarepie huzejec; ŋoŋe iŋuc ehuc Aigita ŋic wâc wiac-jeŋic jowac ronzepien hâcne.”

4

Mose e Anuture dân renkeocte mi afeckewec

¹ Eme Mose e dân zîŋuc bâtikiecnerâ muwec: “Manakic, jaŋe dânane mi mana zakiehuc mu-niŋmu, ‘Wofuŋ e go mi fua-garewec.’ Iŋuc mupie wenac epemu?”² Mume Wofuŋzi âzâcnewec: “Megao wemo wiac bakomec?” Eme eki muwec: “Gunu moc.”³ Eme muwec: “Mâreŋko behec.” Eme mâreŋko beheme gunuzi homa eme

Mose e wisewec. ⁴ Wiseme Wofuŋzi Mose zĩjuc âzâcnewec: “Mege sicnerâ zinao roc.” Eme meticne sicnerâ rome mocwâc gunu ewec. ⁵ Eme muwec: “Injuc etec jaŋe zĩjuc mana taraniŋmu, Wofuŋ, apafâc-nâŋec Abraham, Isaka â Jakobo jaŋere Anutu eki fuacnewec.” ⁶ Erâ Wofuŋzi zuhuckerâ zĩjuc âzâcnewec: “Mege ŋaqimaŋko esoriec.” Eme e meticne ŋaqimaŋko esoriewec, eme mocwâc unuckeme mēne mi wakoc sasawa ehuc qaŋqaŋ jâmbâŋ ezejec i! ⁷ Eme Anutuzi muwec: “Mege mocwâc ŋaqimaŋko esoriec.” Eme meticne mocwâc ŋaqimaŋko esoriewec, eme mocwâc unuckeme fâsâerâ saha-ticne gâcnere sâc ewec. ⁸ Eme Anutuzi muwec: “Jaŋe dâŋge mi mana zakieniŋmuo â mâsi bâbâni bacmu irec wâc manapie fârine mi eocmuo ine mâsi arec jajahec irec manapie fârine eocmu mecne. ⁹ Me mâsi i â i hone-bĩpiehuc manapie fârine mi eha dâŋge qataraniŋmuo ine Nilu opâonec opâ afecne fiarâ mâreŋ kereŋnao hoŋkezemec, eme opâ fiacmu izi mâreŋ kereŋnao soc eocmu.”

¹⁰ Mosezi ine Wofuŋ âzâcnewec: “No ŋic micafec aricne, no mârâc ŋic micafec moc mi jupo, erâ zi kiŋaŋŋicge no dâŋ nazakomecko ŋic micafec wâc mi jukopac, aricne, no marac-nane piticne â nameŋ-nane ŋemâcne.” ¹¹ Eme Wofuŋzi âzâcnewec: “Nĩcte mic mozi bâfuawec? Me mozi ŋic ecneme nâŋguŋ me qeponj me zâŋe fifi me tiŋtuŋ eekac? Wofuŋ noni hâcne. ¹² Irec go rac, eme no nahac micge baafeckehuc dâŋ qazugarepemu i hâcne muzemec.” ¹³ Eki ine muwec: “O Wofuŋ, go ŋic e me e sorezo murâ soretec

raoc.” ¹⁴ Inuc mume Wofun e Mosere erâ bune zâzâficne qame muwec: “Hahacge Aron, Lewinjc hâcne, e mi jukac me? E dâŋ micafec muekac i no manakopac, erâ e bâfuacguocte biac warehuc jukac, erâ ware honecgurâ ine bune biankeocmu. ¹⁵ Eme go dâŋ âzâcnehuc micnao râezemec. Noni ine gore â ere mic i mâmâc baafeckehuc wiac enicmu i qazu-ŋactepemu. ¹⁶ Eki gore âkehoc ŋic dâŋ jazazejec, eme e gore mic eha goki ere Anutu tinac ezemec. ¹⁷ Eme go gunu keci megao badomahuc izi hâcne mâsi bazemec.”

Mose e Aigita mârenko risiewec

¹⁸ Eme Mose e kimo-ticne Jetoro erao risie rarâ âzâcnewec: “No qomâfâc-nane Aigita mârenko juŋgopieŋ jaŋe sâcne mac juŋgopieŋ me weniŋuc i honec-jopazore jaŋerao risiezo mukopac.” Eme Jetorozi Mose âzâcnewec: “Go wamao rac.” ¹⁹ Eme Wofunzi Midiaŋ mârenko Mose ziŋuc âzâcnewec: “Ajoc, go Aigita mârenko risie rac, ŋic guzo mumbiŋ jaŋe hâmo-fârembiŋ hâcne.” ²⁰ Eme Mose e ŋonâŋ motecfâcne rocjoparâ dongi faio râec-joparâ Aigita mârenko risie rawec; ehuc Anuture gunu meo bawec.

²¹ Eme Wofunzi Mose âzâcnewec: “Go Aigita mârenko risie rarâ mâsi wiac gaza gowatuc ehuc irec tâpiri qikiŋne-garepo i sasawa manasurâ Faraore maio bafârezemec. Noni ine ŋic mi râec-jopame raniŋte maŋsanaŋ bâfuacnepemu. ²² Goki ine Farao âzâcnezemec, ‘Wofunzi ziŋuc mukac: Israe e mârâc ŋokâ-nane hâcne. ²³ Eme “Ŋokâ-nane râetec ra kiŋaŋ qanarezejec,” inuc gazape mi ehuc qataracmuo ine no gahacne

mârâc ñokâ qâhâmopemu.’” ²⁴ Eme hata raku mocko fohapie Wofunzi Mose qâhâmoocmurâ fuacnewec. ²⁵ Inuc eme Zïborazi buse dâkâne micnehec rorâ ñokâ-ticnere sahad tofa hetâcnerâ izi Mosere sahad tofa heuahuc muwec: “Go socte erâ nore biñe ekomec.” ²⁶ Inuc mume Wofunzi Mose akickewec. Dameñ ira sahacko ma bapare zïñuc mujumbienj hâcne: “Socte erâ nore biñe.”

²⁷ Wofunzi Aroñ dân zïñuc âzâcnewec: “Go Mose bâfuacmurâ mâreñ tuhuo razemec.” Eme eki raku Anutüre tiki funñao bâfuarâ muduckewec. ²⁸ Eme Mose e Anutuzi dân âzâcnewec â mâsi baocte mucnewec irec binañ Aroñ bacne-fârewec. ²⁹ Eme Mose â Aroñ jahe ra Israe ñic micne sasawa hetumañ-jopapic. ³⁰ Ehuc Wofunzi Mose dân âzâcnewec sâc i Aroñzi jaza-fârewec, erâ mâsi wiac i ñic mai-jeñicko bawec. ³¹ Eme ñic jañe mana zakiembiñ, erâ Wofun e Israe ñic nâñere busâqoc manahuc fific guguriñ-nâñec hone manac ewec, jañe inuc manarâ fodapehuc numucnembiñ.

5

Mose â Aroñ jahe Farao dân âzâcnepire fâri tâmiric ewec

¹ Eme Mose â Aroñ jahe juku Faraoro rarâ dân zïñuc âzâcnepic: “Wofun, Israe ñic jañere Anutu e zïñuc mukac: ‘Go ñicfâc-nane râec-jopatec mâreñ tuhuo rarâ nore hombañ moc ñenzepienj.’” ² Inuc mupire Faraosi muwec: “Mo Wofun mo, irec no dânticne mana rereñ erâ Israe ñic ñoñe râec-ñopape raniñmu? No Wofun e kâuc bakopac,

erâ Israe ñic ñoñe mi râec-ñopape raniñmu.”
³ Injuc mume mupic: “Hebiraio ñic nâñere Anutu e nâñe fua-nârewec, irec huc hâmoczi me zikazi sipiric-nâpozacte mana-nâretec zoañ jahec â moc raku mâreñ tuhuo Wofuñ Anutu-nâñec taha bâzi rikecnenzepeney.”
⁴ Aigita ñicwofuñzi ine ja-sawec: “Mose â Aron, ñohe wemocte ñic jañe gie-jeñic beheniñte mukopirec? Nohe kâpâcwâru gie-ñekic ra banic me!”
⁵ Farao e injuc murâ zinjuc jasawec: “Manakopirec, jañe mâreñ rune nâñe biac siric-nâponñopienko wemocte gie-jeñic het-ararâ homban ñeniñte mukopirec?”
⁶ Erâ Farao e zoañ ijaha gie soñañfâc-jeñic â micnefâc-jeñic dân zinjuc mutâcne-jarewec:
⁷ “Ñoñe ñic sopâc uucne jarepie afehec bâsifuckehuc fic bapa qânâ baenñopien i mocwâc mi jarenzepien, jañe jañac rarâ ro nusec enzepien.”
⁸ Erâ juwicnao qânâ rikenñte mujarekicne zare i moc mi bawahahuc ijaha bâfuânzepien. I jañe ojoñ juhuc zinjuc muññopienñte: ‘Nâñe ra Anutu-nâñec bâzi rikec-nenzepeney.’
⁹ Irec fai-jeñicko gie bâmâckehuc ñemâcne jâmbân râepie ferâ kihâmoc-jopame bu-recdânñte hazec mi râenzepien.”

¹⁰ Injuc mume ñic jañere gie soñañ â micne jañe ra ñic jazambiñ: “Farao e muac-nâpohuc zinjuc mukac: ‘Sopâc mocwâc mi jarezo.’
¹¹ Irec ñoñe ñañac, ira me ira fokacko ra bâfuârâ ronzeñien, ehame gie-ñenñicte sâc ine moc mi wahazejec.’”
¹² Eme ñic jañe sopâc ro nusec enñte Aigita mâreñ sâkoo râwiñ qâwiñne-fârembiñ.
¹³ Gie soñañ jañe ine fafine ejarehuc mumbiñ: “Sopâc uucne râe-ñarekicne damenñ ira zoañne zoañne gie

bambin sâc ijaha wâc bâfuanzepien.” ¹⁴ Ehame Faraore soṅaṅfâc Israe gie soṅaṅ râec-jopambin jaṅe zinuc wio-jarehuc jopambin: “Ṇoṅe wemocte juwicnao qânâ gie muṅarepene bambin sâc ijaha jacne â miṅecgac mi bâfuambien?”

¹⁵ Eme Israe gie soṅaṅ jaṅe Faraorao rarâ mu huacbuc ehuc zinuc âzâcnembin: “Kiṅaṅ qaṅafâcge nâṅe inuc wemocte enârekomec? ¹⁶ Sopâc uucne mocwâc mi nârehuc sifu zinuc munâreṅgopien: ‘Qânâ rikenzepien!’ Inuc muhuc kiṅaṅ qaṅafâcge nâṅe nâponṅopien wâc. Go ṅicfâcge nâṅe inuc enârehuc kiṅsâko hurekomec i!” ¹⁷ Eme eki muwec: “Ṇoṅe ṅic oṅoṅe, oṅoṅ juṅgopien hâcne. Irec muṅgopien, ‘Nâṅe ra Wofuṅ bâzi rikecnenzepeneṅ.’ ¹⁸ Zi ra gie-ṅeṅic baniṅ, mâc sopâc uucne ine mi ṅarezo, erâ sifu qânâ zare muṅarekicne i jâmbân bâfuârâ râepie warezejec.” ¹⁹ Eme Israe gie soṅaṅ jaṅe zinuc jazakicnere manapie boc ṅemâckewec: “Ṇoṅe zoaṅne zoaṅne qânâ bâfuaninṅte mukicne sâc i moc mi wahazejec.” ²⁰ Eme Faraoraonec waharâ Mose â Aron jahe woṅec domahapire bâfuac-jofarâ ²¹ dân zinuc jasambin: “Wofuṅzi fua-ṅacterâ okacne bazu-ṅacteoc. Farao â ṅicfâcne jaṅe ṅohere erâ hâcne mana-nârepie boc sâqorekac, ṅohe qâhâmoc-nâponinṅte zika mejenjicko râekopirec hâcne.”

²² Inuc mupie Mosezi Wofuṅ mu wâwâsic ecnehuc zinuc muwec: “O Wofuṅ, go wemocte ṅicguru zi wiac hâhâwicne inucne ejaremeṅ, wemocte sorecnutec warepo? ²³ No Faraorao rarâ gore micte dân âzâcnepo dameṅ ira hâcne fuṅkerâ

ņicguru zi mâsi repicne ejarehuc juweczi jukac jaha, eme goki ine gurufâcge moc mi batarac-jopameņ.”

6

Anutuzi Mose mocwâc rowosâewec

¹ Wofuņzi ine Mose ziņuc âzâcnewec: “No miņecne Faraο wiac ecnepe honezemec, mesanaņ-nanezi ecnepe râec-ņopame raniņmu, mesanaņ-nanezi ecnepe mâreņ-ticnaonec jâpec-ņopaocmu hâcne.”

² Erâ Anutuzi zuhuckerâ Mose ziņuc âzâcnewec: “No hâcne Wofuņ jukopac. ³ No Anutu tâpiri runezi Abraham, Isaka â Jakobo fua-jarepo, mâc Wofuņ zâņe-nane mutaniņkerâ fuņne-nane mumufua-jare ine mi epo. ⁴ No Kanaan mâreņ jarepemurâ jaņehec zâzâfic epo wâc, mâreņ jaba jumbiņ i hâcne. ⁵ Erâ i sawa mâcne, Aigita ñic jaņe kâpâcwâru gie mujareeņgopieņ Israe ñic i jaņere ki owa manapo wâc, ehuc zâzâfic-nanere manasupo. ⁶ Irec Israe ñicguru jazac, ‘No hâcne Wofuņ jukopac, erâ no Aigita mâreņte zâic gieonec â kiņaņ qaqa bacņopakicnaonec batarac-ņoparâ bawefuc-ņopahuc mesanaņ-nanezi okac babazu gie bahuc firuec-ņopapemu. ⁷ Erâ no ñicfâc-nane bacņoparâ Anutu-ņeņic juhape ñoņe ziņuc mana taranzepieņ: Anutu-ņeņic, Wofuņ no hâcne Aigita mâreņte kâpâcwâru â zâic gieonec batarac-ņopakopac. ⁸ No menane bafaharehuc Abraham, Isaka â Jakobo mâreņ jarezo mupaņke-jarepo ira hâcne jowac-ņopape raziniņmu; eme

qikiñne-ñarepe ñoñere biñe eocmu. No hâcne Wofuñ jukopac.’” ⁹ Mose e Israe ñic jañe iñuc hâcne jazawec. Jañe ine kâpâcwâru giere hâbi fafara ejareha dâñticne mi manambiñ.

¹⁰ Eme Wofuñzi Mose ziñuc âzâcnewec: ¹¹ “Go Aigita ñicwofuñ Faraorao ferâ âzâcnetec Israe ñic jañe mâreñ-ticne beherâ ranĩte mana-jareze-jec.” ¹² Eme Mosezi Wofuñ ziñuc âzâcnewec: “Manakic, Israe ñic jañe dâñnane qatarambiñko Faraози wemocko moc manaocmu, erâ no micnane ñemâcne i.” ¹³ Wofuñ eki ine Mose â Aroñ jahe Israe ñic Aigita mâreñkonec jowac-jopa ranicte mukicne dâñ i Israe ñic mecne, â Farao mecne mâmâc jazanicte mujactewec.

Mose â Aroñ apa ñiric ñurucfâc-jekic jañere zâñe biri

¹⁴ Israe ficne ficne micnefâc-jeñic jañere zâñe zine hâcne: Israe mârâc ñokâ-ticne Ruben ere ñokâfâc: Hanoki, Palu, Hezoroñ â Karami. Ñic i jañe hâcne Rubenñe qâricfâc. ¹⁵ Simeonñe ñokâfâc ine ziñuc: Jemue, Jamiñ, Ohada, Jakiñ, Zohari â Sauli. Sauli e ine Kanaañ ñokac ere ñokâ. Ñic i jañe Simeonñe qâricfâc. ¹⁶ Zi Lewi ñokâfâcne fuambiñ sâc jañere zâñe: Geresoñ, Kohati â Merari. Lewi e jara 137 bazurâ hâmowec. ¹⁷ Geresonñe ñokâ jajahec ine ziñuc: Libini â Simei, guru-jekicte micne hâcne. ¹⁸ Kohati ere ñokâfâc: Amaram, Izara, Heboronñ â Uziele. Kohati e ine jara 133 bazuwec. ¹⁹ Merari ere ñokâ jajahec ziñuc: Mali â Musi. Ñic i jañe Lewire qâricfâc gañne gañne fua wefumbiñ. ²⁰ Eme Amaram e neñgoc pitic-ticne Jokebede ñokac-ticne

bawec, eme eki hâcne Mose â Aroņ rocjofawec. Amaram e ine jara 137 bazurâ hâmwowec. ²¹ Izara ere ņokâfâc zĩņuc: Kora, Nefege â Sikiri. ²² Uziele ere ņokâfâc zĩņuc: Misae, Elizafaņ â Sitiri. ²³ Aroņ eki ine Aminadare otâ, Nason ere seņ, zâņene Eliseba e ņokac-ticne bawec. Eme eki Nadaba, Abihu, Eleaza â Itama rocjopawec. ²⁴ Kora ere ņokâfâc ine Asiri, Elikana â Abiasa iņuc fuambĩņ. ņic i jaņe hâcne Korare qâricfâc. ²⁵ Aroņte ņokâ Eleaza e Putie otâfâcne jaņeraonec moc ņokac-ticne bawec, eme eki Pinehasi rowec. ņic i jaņe Lewire qâricfâc gaņne gaņne juwefumbĩņ jaņere micnefâc. ²⁶ Mose â Aroņ jahe hâcne Wofuņzi zĩņuc jasawec: “ņohe Israe ņic guru-jeņic sâc biric-jopahuc Aigita mâreņkonec jowac-jopapire wahanzepeieņ.” ²⁷ Erâ Mose â Aroņ jahezia Israe ņic Aigita mâreņkonec jowac-jopan-icte Faraorao dâņgie bapic.

²⁸ Eme Wofuņ e Aigita mâreņko Mosehec dâņ muc manac ehuc ²⁹ zĩņuc âzâcnewec: “No hâcne Wofuņ jukopac, irec no dâņ sasawa gaza-kopac i Aigita ņicwofuņ Farao âzâcne-fârezemec.” ³⁰ Mosezi ine Wofuņ zĩņuc muhuc âzâcnewec: “Manakic, no micnane ņemâcne, irec Farao e dâņnane wemocko moc manaocmu?”

7

Anutuzi Mose harierâ Faraorao sorewec

¹ Eme Wofuņzi Mose âzâcnewec: “Manakic, no Faraore maio Anutu tinac âkendâņguhape Aroņzi porofetege juzejec. ² Erâ dâņ sasawa mutâcne-garekopac i hahacge mufuacnetec eki

Farao âzâcneme Israe ñic râec-jopame mâren-
ticne beherâ ranzepien. ³ Â no nahac ine Farao
man-
ticne bâzickehuc Aigita mârenko wiac zâñe
furu â fuñne qaqa mâsi bocjaha bapemu. ⁴ Eme
Farao e ine sifu dâññekic mi manaocmu. Irec no
Aigita ñic bomac-jopahuc okacne ñemâcne jare-
huc Israe ñic guru sâko Aigita mârenkonec jowac-
ñopa rapemu. ⁵ Eme no tâpiri-nanere fuñne Aigita
ñic jañerao bataniñkehuc ñonder-ñenickonec Israe
ñic jowac-ñopapemu damen ira, no hâcne Wofuñ
jukopac, irec fuñne mana taranzepien.” ⁶ Eme
Mose â Aroñ jahe Wofuñzi dâñ jasa mutâc ewec
irec sâcko wiac epic hâcne. ⁷ Jahe Faraorao rarâ
dâñgie bapic damen ira Mose e jara-ticne 80, â
Aroñ eki ine 83 inuc bazupic.

*Anutuzi wiac hâhâwicne fuñne fuñne
bâfua-jarewec*

⁸ Eme Wofuñzi Mose â Aroñ zinuc jasawec:
⁹ “Farao e, ‘Dâññekic dopeckehuc mâsi moc banic,’
inuc ñasame Aroñ âzâcnezemec, ‘Gunuge rorâ
Faraore maio mârenko behetec homa ezejec!’ ”
¹⁰ Eme Mose â Aroñ jahe Faraorao ferâ Wofuñzi
muwec sâc epic. Aroñ e gunu-ticne Farao â
kiñañ qaqañticne jañere maio beheme homa
ewec. ¹¹ Eme Farao e mamana ñic â qañgec bapa
hefârec-jopawec. Eme Aigita qañgec bapa jañe
inuc jaha mâsi soñne bapie ijaha fuawec. ¹² Jañe
ru sâc gunu-ñenick behemie homa efârembiñ hâcne.
Aron-
te gunuzi ine jañere gunu qâcñopa-fârewec.
¹³ Faraore manzi ine rânñenckeme mi mana-
jactewec, Wofuñzi muwec inuc hâcne fuawec.

14 Eme Wofunzi Mose zinjuc âzâcnewec: “Farao e mañsanañ erâ ñic jañe raniñte qatara-jarekac. 15 Irec go tomâcko furicte Faraozi opâo raocete rahame gunuzi homa ewec i hâcne meo barâ Nilu opâ mongeñnao bâfuacmurâ razemec. 16 Erâ âzâcnezemec, ‘Wofun, Hebiraio ñic nâñere Anutu hâcne, e zinjuc gazapemurâ gorao sorecnuwec: “Ñicfâc-nane mâreñ tuhuo kinan qanareninñte râec-jopatec ranzepeñ. Go ine dân i moc mi reñkehuc juekic.” 17 Irec Wofunzi zinjuc mukac: “Manakic, no gunu menaneo bakopac izi Nilu opâ qape soc eocmu. 18 Ehame Nilu opâo qowi hâmo-fârepie Nilu opâ âsu fime Aigita ñic jañe opâ nâzore mamakâc-jopaocmu. Inuc fuame, no hâcne Wofun jukopac, irec fune mana tarazemec.” ’ ” 19 Erâ Wofunzi Mose zinjuc âzâcnewec: “Aron zinjuc âzâcnec, ‘Go gunuge rorâ Aigita mâreñte opâ sasawa, opâ sâko mecne, opâwâc mecne, opâ zâkân mecne, â opâ nombân mecne irapec mege sicnetec opâzi soc efârezejec, ehuc Aigita mâreñ sâko sâcke-fârehuc opâ râqâc jâczi me qânâzi bakicne ira mâmâc fozejec.’ ”

20 Mose â Aron jahe Wofunzi dân mutâcne-jactewec irec sâcko wiac epic. Ehuc Aron e Farao â ñicfâcne jañere maio gunu-ticne bâfeñnerâ Nilu opâ qame soc efârewec hâcne. 21 Eme Nilu opâo qowi jumbin jañe hâmo-fârepie opâ âsu fime Aigita ñic jañe wemocko moc sâcne nanzapin. Ehame soczi Aigita mâreñ sâckerâ fowec. 22 Aigita qanğec bapa jañe ine mâsi soñne bahuc ijaha embin. Irec Farao e mañsanañ erâ Wofunzi qanañ muwec irec sâcko ehuc mi mana-

jactewec. ²³ Ehuc râpec-jofarâ ficticnao rawec, erâ wiac fuawec irec maname fârine mi ewec. ²⁴ Aigita ñic sasawa jaņe ine opâ nâniņte Nilu opâ heririņnao opâ nombâņ rombiņ. Nilu opâonec nâniņte mamakâc-jopawec irec. ²⁵ Wofuņ e Nilu opâ game wiac i fuarâ foha 3oaņ 7 tarawec.

8

Qaqec fuambin

¹ Eme Wofuņzi Mose 3iņuc âzâcnawec: “Faraorao rarâ âzâcnec, ‘Wofuņzi 3iņuc mukac: “Go ñicfâc-nane râec-jopatec ra kiņaņ qanarenzepieņ. ² Me raniņte qatara-jarecmuo ine mupe qaqec fuarâ hae mâreņge ñefacke-fâreniņmu. ³ Erâ Nilu opâ fusucma sâqorehuc wefurâ ficgao ferâ guņficko mecne fofogao mecne sâcke-fârerâ raku kiņaņ qaqaqâcge â ñicfâcge jaņere fic sasawa fusucma-fâreniņmu wâc. Erâ zafeo â oto gomba wiacko qaqec sasawa ñeniņmu. ⁴ Erâ i sawa mâcne, gahacne sahacko mecne, ñicfâcge jaņere sahacko mecne, kiņaņ qaqaqâcge sasawa jaņere sahacko mâmâc ferâ bohotaniņmu.” ’” ⁵ Eme Wofuņzi Mose 3iņuc âzâcnawec: “Go Aroņ âzâcnec, ‘Go gunuge bahuc mege bâfeņnerâ opâ sâko â opâ hata â opâ zâkâņ irapec sicnerâ mutec qaqec wefurâ Aigita mâreņ ñefacke-fârenzepieņ.’” ⁶ Eme Aroņzi meticne Aigita mâreņte opâopec sicneme qaqaeczi wefurâ Aigita mâreņ ñefacke-fârembiņ. ⁷ Qaņgec bapa jaņe ine mâsi soņne iņuc jaha bapie qaqeczi Aigita mâreņ sâcke-fârembiņ.

8 Injuc fuame Faraози Mose â Aron hefârec-jofarâ zinjuc jasawec: “Nohe Anutu-nejec numucnepire qaqec wiac no â njcfâc-nane nâneraonec bârârieme no noje râec-nojape ra Anutu-nejec bâzi rikecnenzepien.”⁹ Mosezi Farao dân zinjuc bâtikiecnawec: “No wezimucko go â kinan qaqafâcge â njcfâcge nojere erâ numupe qaqec i gorao mecne â fic nerakac sâc ira mecne arictac ehapie Nilu opâo sawa fonijmu, irec zâfo i go gahac banarec.”¹⁰ Eki muwec: “Tomâcko.” Eme Mosezi muwec: “Mukomec injuc fuazejec. Fuame ine zinjuc mana tarazemec: Wofun, Anutu-nâjec e injucne moczi moc mi jukac.”¹¹ Qaqec janje gorao mecne, ficge nerakac ira mecne, kinan qaqafâcge â njcfâcge janjero mecne mâmâc arictac efârenzepien, mâc Nilu opâo sawa ine junzepien.”¹² Eme Mose â Aron jahe Faraoraonec waharâ Mosezi Farao mupankecnawec irec sâcko qaqec rârieniñte Wofun numucnewec.¹³ Eme Wofun e Mosezi numucnewec sâc manacnerâ mume qaqec ficko mecne, hae zoñao mecne, gieo mecne hâmo-fârembiñ.¹⁴ Eme ofañne guruc epie âsunezi hae mâreñ sâcke-fârewec.¹⁵ Qaqec arictac eme honerâ Farao sahad-ticne firieme mocwâc mansanañ erâ mi mana-jactewec. Wofunzi qanan muwec injuc hâcne ewec.

Nejgec fuambin

¹⁶ Eme Wofunzi Mose zinjuc âzâcnewec: “Go Aron âzâcnetec gunu-ticne bâfenjerâ mârenko rufe fokac i qazejec, eme Aigita mâreñ sâkoo rufezi nejgec efârezejec.”¹⁷ Eme jahe injuc hâcne

epic. Aroņ e meticnezi gunu bawec i bâfeņnerâ mâreņko rufe fowec i qâiņneme neņgec qâņhec fuarâ ñic â qowi mâmâc nâcјopawec. Mâreņko rufe fowec i sasawa neņgec efârerâ Aigita mâreņ sâcke-fârewec hâcne. ¹⁸ Eme qaņgec bapa jaņe neņgec jaha fuaocte qaņgec bahuc bâpiembiņ. Iņuc epie neņgeczi ñic â qowi nâcјopawec hâcne. ¹⁹ Eme qaņgec bapa jaņe Farao âzâcnembiņ: “Ži Anuture tâpiri jâmbâņ.” Farao e ine maņsanaņ erâ mi mana-jarewec. Wofuņzi qanaņ muwec iņuc hâcne fuawec.

Mâkâc mimiņ fuambij

²⁰ Eme Wofuņzi Mose ziņuc âzâcnewec: “Go tomâc furicte Faraozi opâo raocte rahame fuacnerâ âzâcnezemec, ‘Wofuņzi ziņuc mukac: “Go ñicfâc-nane râec-jopatec ra kiņaņ qanarenzepieņ. ²¹ Manakic, ñicfâc-nane mi râec-jopacmuo mâkâc mimiņ ejarepe go mecne, kiņaņ qaqařacge mecne, ñicfâcge mecne ñoņerao mâmâc fuaniņmu. Ehuc Aigita ñic ñoņere fic wiac mâkâczia fusucmaniņmu â fic ñerakac hae mâreņ i mâmâc sâocke-fâreniņmu. ²² No zoaņ ira ñicfâc-nane Goseņ mâreņko juņgopieņ jaņerao ine mâkâc wiac moc mi fuaniņte mupe, no hâcne mâreņ zirec Wofuņ jukopac i mana tarazemec. ²³ Erâ nore ñicfâc â gore ñicfâc jaņere ñondenko aka moc âkendâņepemu. Ma i tomâcko hâcne fuazejec.” ’ ” ²⁴ Eme Wofuņ e iņuc hâcne ewec. Irec mâkâc mimiņzi Faraore fic, ñicfâcne jaņere fic â Aigita mâreņ sasawa fusucma-fârerâ mâreņ sipiricke-fârembiņ.

²⁵ Eme Faraози Mose â Aron jahe hefârec-jofarâ jasawec: “Ajoc, ñoñe Anutu-ñeñic mârenj zi jaha bâzi rikecneniñ.” ²⁶ Mosezi ine muwec: “Injuc misac, nâñe Wofuñ Anutu-nâñec bâzi rikecnepene Aigita ñic jañe honepie mamakâcne eekac. Eme Aigita ñic jañe bâzi-nâñecte manapie mamakâc eekac i mana-bipiehuc sifu jañere maio rikehapene qânâzi mi hecnâponiñmu me? ²⁷ Nâñe Wofuñzi nâzâ mutâc ewec sâc mârenj tuhuo rakupene zoañ jahec â moc eha Wofuñ Anutu-nâñec bâzi rikecnepene sâckeocmu.” ²⁸ Eme Faraози muwec: “Wofuñ Anutu-ñeñic bâzi rikecnezore mârenj tuhuo raniñte sâcne mana-ñarepemu, mocjaha, zoricko boc mi ranzepiñ. Erâ wâc nore erâ numunzepiñ.” ²⁹ Mosezi muwec: “No zi behecgu hurâ Wofuñ numucnepe tomâcko mâkâc mimiñ i gorao mecne, kiñañ qaqañcge â ñicñcge jañerao mâmâc omaezejec. Mocjaha, go eatuc-nâpohuc ñicguru jañe Wofuñ bâzi rikecnezo raniñte mupie mocwâc mi sakarec-jopazemec.” ³⁰ Mose e injuc muhuc Faraо beherâ Wofuñ wira wâwâsic ecnewec. ³¹ Eme Wofuñ e Mosere dâñ manarâ mume mâkâc wiaczi Faraorao â kiñañ qaqañcne â ñicñcne jañerao omae-jâmbâñkerâ moc mi fohuñgañkewec. ³² Faraози ine damenj ira injuc jaha mañne bâzickeme ñic mi râec-jopawec.

9

Aigita ñic jañere qowifâc sipiricke-fârembiñ

¹ Injuc fuame Wofuñzi Mose ziñuc âzâcnewec: “Go Faraorao ferâ âzâcneç, ‘Hebiraio ñic nâñere Anutu, Wofuñ hâcne, e dâñ ziñuc

mukac: “Nïcfâc-nane jaņe kiņaņ qanarenințe râec-jopatec ranzepiņ. ² Manacic, dâņnane qatararâ sakarec- jopahuc râec-jopatecne mi raniņmuo ³ ine Wofuņ nore tâpiri mesanaņzi qowifâcge gieo juranņopieņ, becâsic mecne, doņgi mecne, kamele mecne, lama bulimakao mecne jopame qowi hâmoc fua- fâreocmu. ⁴ Ehame Wofuņ noni Israe ñic jaņere qowi wiac â Aigita ñic jaņere qowi wiac i bătâc bacjopape Israe ñic jaņere qowi moc mi sipirickeocmu.” ’ ’ ”

⁵ Wofuņ e zïņuc muhuc damenĳ bawec wâc: “No tomâcko mâreņ zira iņuc hâcne epemu.” ⁶ Eme hae fureme Wofuņzi iņuc hâcne ewec. Ehame Aigita ñic jaņere qowi wiac hâmo-fârehapie Israe ñic jaņere qowi wiac ine moc mi hâmombiņ. ⁷ Eme Faraosi fuņne mana-hâmoocte kiņaņ râeme rame mi zïņuc taniņkezejec i: Israe ñic jaņere qowi moc mi hâmombiņ. Ehame Farao e ine sifu maņsanaņ ehuc ñic mi râec-jopawec.

Wiczâhâc fua-jarewec

⁸ Eme Wofuņzi Mose â Aronĳ zïņuc jasawec: “Nohe meņekiczi zocmâsic me fufusuc rozepirec eme Mosezi Faraore maio sawao wickezejec. ⁹ Eme zocmâsiczi iinņehuc rufe erâ Aigita mâreņ sâcke-fâreme ñic sahacko mecne, qowi sahacko mecne wiczâhâc fuarâ fâuckezejec. Aigita mâreņ sâkoo wiac iņuc hâcne fuazejec.” ¹⁰ Eme jahe zocmâsic rorâ Faraore maio fuarâ domahuc Mosezi sawao wickeme feme ñic sahacko â qowi sahacko wiczâhâc fuarâ fâuckewec. ¹¹ Eme Aigita ñic wiczâhâc fua-jare-fârewec iņuc jaha qanņec bapa jaņerao fuame jaņe Mosere maio fuarâ

domaniñte quñkembij. ¹² Wofunzi ine Faraore manj bârângeñkeme mi mana-jactewec, Wofunzi qanañ Mose âzâcnawec sâc fuawec hâcne.

Hoe sanañ hewec

¹³ Eme Wofunzi Mose ziñuc âzâcnawec: “Tomâcko uupictea faharerâ Faraoraorârâ âzâcnezemec, ‘Hebiraio ñic nâñere Anutu, Wofun hâcne, eki dâñ ziñuc mukac: “Ñicfâc-nane kiñañ qanareninñte râec-jopatec ranzeñpien. ¹⁴ No dameñ zi hâcne go â wiacfâcge â ñic gurufâcge wiac hâhâwicne jâmbâñ eñarepe ziñuc mana tarazemec: ‘Mâreñ sâko mâreñ ira Anutu inñucne moc mi jujâmbâñkekac.’ ¹⁵ No biac juwicnao menane sicnerâ go â ñic gurufâcge ironzi qâmiziec-ñopazo murâ sâcne ezapo, eme go arictac enzañ. ¹⁶ No ine tâpiri-nanere fune gowatupemurâ â zâñe biñe-nane mâreñ sâc muromackepie hañ baocmurâ akicgupo. ¹⁷ Goki ine gahacne manatec feha ñicfâc-nane râec-jopatec ranñte mupe qatarakomecete ¹⁸ no tomâcko dameñ ziñucne hoe sanañ hâhâwicne, Aigita mâreñ funaonecteañ luarâ fowefuwecko moc mi hejuc, inñucne moc mupe heocmu. ¹⁹ Irec kiñañ sorec-jopatec rarâ bulimakao â qowifâcge sasawa giewo juranñopien jañe qâzuc-jopapie ficko fefârenzeñpien; ñic mecne, qowi mecne ficko mi fehuc giewo juniñmu jañe zenñoma hoezi hecñopame hâmo-fâreniñmu hâcne.”’” ²⁰ Eme Faraore ñicfâc tucne jañe Wofun dâñticnere hâwic-jopame kiñañ qaqañc-ñic â qowifâc-ñic eñarepie ficko fefârembiñ. ²¹ Â

mi hâwic-jopawec jaņe ine kiņaņ qaqařâc-jeņic â qowifâc-jeņic gieoa beheç-jopapie jumbiņ.

²² Eme Wofuņzi Mose dâņ zîņuc âzâcnewec: “Mege sambâņkopec sicnetec Aigita mâreņ sâkoo hoe sanaņ hehuc ņic mecne, qowi mecne jâckâte mecne â nânâ monzaņ mecne Aigita mâreņko forakac sasawa heçjopazejec.” ²³ Eme Mose e gunu-ticne sambâņkopec bâfeņneme Wofuņte micte quņ parandaņ â hoe sanaņ â zocbâruņ sambâņkonec mâreņko wahawec. Ehame Wofuņzia mume Aigita mâreņko hoe sanaņ hewec. ²⁴ Hoe sanaņ â bâbâric hâhâwicne jâmbâņ zuzuhuc jaha wahahuc fowec, wiac iņucne Aigita mâreņ sâkoo ņic fuarâ juwefumbiņko moc mi fuarâ fowec. ²⁵ Eme hoe sanaņ izi Aigita mâreņ sâkoo ņic mecne, qowi mecne, gieo jurambiņ jaņe hehâmoc-jopa-fârewec erâ nânâ monzaņ â jâc wiac gieo doma rawec i wâc iņuc jaha henzaņ qanzaņne-fârewec. ²⁶ Mâc Goseņ mâreņko, Israe ņic jumbiņ ira sawa hoe sanaņ mi hewec.

²⁷ Iņuc fuame Faraozi kiņaņ soreme ra Mose â Aron hefârec-jofame rapire dâņ zîņuc ja-sawec: “Zi kiņnane hone manac ekopac, Wofuņ e tiņne jâmbâņ, no â ņicfâc-nane nâņe ine hehesicne. ²⁸ Irec ņohe nore erâ Wofuņ numucnenic, quņ parandaņ â hoe sanaņ izi siric-nâpokac hâcne. No râec-ņopape ranzeņieņ, ņoņe zira zuhuckerâ mi junzeņieņ.” ²⁹ Mosezi ine dâņ zîņuc bâtikieçnewec: “No hae beherâ menane sicnepe Wofuņtao feme quņ parandaņ â hoe sanaņ tâcneme zîņuc mana tarazemec: Mâreņ sâko mâreņ i Wofuņte biņe. ³⁰ No

ine go â ñicfâcge ñoñere fuñne manakopac, ñoñe Wofuñ Anuture sifu mi hâwic-ñopakac.”
³¹ Bundajâc â padi imacke-fârekicne, padi i biac fârinehec domawecte â bundajâc i ârine qawecte.
³² Waizen ã wiac inucne tinac ine zâhec sawa ârickerâ fârine râekacte hoe sananji mi imackewec. ³³ Eme Mose e Farao beherâ haonec hurâ meticne Wofuñtao sicneme quñ parandan ã hoe sanan omaepire mârenko hoe mocwâc mi hewec. ³⁴ Eme Farao e quñ parandan ã hoe sanan omaeme honerâ izia e jahacne mecne ã ñicfâcne mecne sâqocne-jeñic basanankepie manjenic zicke sanankekewec. ³⁵ Eme Farao e mansanan erâ Israe ñic mi râec-jopawec. Wofuñzi qanan Mose âzâcnewec inuc hâcne fuawec.

10

Hâpic fuambin

¹ Inuc fuame Wofuñzi Mose dân zinuc âzâcnewec: “Go Faraorao fezemec. No nahac hâcne fuñne qaqa mâsi-nane ñonden-jeñicko bapemurâ e ã ñicfâcne jañe ejarepe manjenic sanankekewec. ² Eme no Aigita ñic man bâsifuc ejarehuc fuñne qaqa mâsi bakopac irec binan naru motecfâcge ã ñosafâcge bajaretec, no Wofuñ jukopac, irec fuñne zânitanzepien.”

³ Eme Mose ã Aron jahe Faraorao ferâ zinuc âzâcnepic: “Wofuñ, Hebirao ñic nâñere Anutu, e zinuc mukac: ‘Go nore maio rumehuc juju i wemocte boc qikinnekomec? Go ñicfâc-nane nore kinan qaniñte râec-jopatec raniñ. ⁴ Manakic, go ñicfâc-nane raniñte mi mana-jarecmuo

ine tomâcko mupe hâpiczi fuarâ hae mârenge sâcke-fâreniņmu. ⁵ Erâ mârenj sâockerâ, hoe sananži wiac gâcne akickewec i hâcne nâ miziehuc gie-jeņicko jâc wiac doma rakac i mâmâc nâ imac epie garanj garanne domazejec. ⁶ Erâ go gahacne fic mecne, kiņanj qaƣafâcge jaņere fic mecne â Aigita ņic sasawa jaņere fic mecne i mâmâc fusucma-fârenzepieņ. Wiac iņucne i mamac ņosafâcge jaņe mârenko fua wefumbiņkonecteanj moc mi honehuc jumbiņ.’” Iņuc muhuc fotikierâ Farao beherâ rawec.

⁷ Eme Faraore kiņanj qaƣa jaņe e ziņuc âzâcnembiņ: “ņic sipiric-nâpoocte doc sipuac enâreku mo dameņko moc behec-nâpooctu? Go ņic jaņe râec-jopatec ra Wofuņ Anutu-jeņic kiņanj ƣacnenzepieņ. Aigita mârenj biac ima bakicne i go mi manakic me?” ⁸ Iņuc mupie mume Mose â Aronj jahe Faraoro risiepire ziņuc jasawec: “ņoņe raniņ, erâ Wofuņ Anutu-jeņic kiņanj ƣacneniņ. Mâc mozia raniņmu?” ⁹ Mosezi muwec: “Nâņe kâcƣene piticne, ņokac naru motecfâc-nâņec, bulimakao â ƣowifâc-nâņec i mâmâc jowac-jopa ranaņmu. Nâņe Wofuņ-nâņecte hombaņ ņenaņte munârekicne hâcne.” ¹⁰ Eki ine jasawec: “No ņoņe â ņokac motecfâc-ņeņic râec-ņopape ra wiac moc eniņmuo ine Wofuņzi ņoņehec juzo murâ juzejec. ņoņe wiac hehesicne eniņte maņkerâ juņgopieņ i tâtâc fokac i! ¹¹ Mâcne, ņiczi sawa ra Wofuņte kiņanj ƣanze pieņ, ņoņe iņuc hâcne eniņte muņgopieņ.” Iņuc murâ mume Faraore maionec jâpec-jofapie rapic.

¹² Eme Wofunzi Mose dân zĩnuc âzâcnewec: “Go mege Aigita mârenkopec sicnetec hâpic jaje ware Aigita mâren ñefacke-fârerâ wiac rehacnehec, hoe sananzi akickewec fokac i nâpie omae-fârezejec.” ¹³ Eme Mose e gunu-ticne Aigita mârenkopec bâfenewec. Eme Wofunzi mume zoan wewefunaonec mânân sâkozi ware ñafe zoan qahuc fowec. Eme hae fureme mânân izi hâcne hâpic ficne suec-jopame warembiñ. ¹⁴ Erâ hâpic guru hâhâwicne jâmbânzi Aigita mâren sâko sâckerâ ñefacke-fârembiñ. Hâpic guru inucne sâko damen juwicnao moc mi fisi jumbien erâ wâc juku mocwâc mi fisinzonopien. ¹⁵ Eme mâren sasawa ñefacke-fârepie dapâc ewec. Ehame hoe sananzi mârenko wiac rehacnehec â jâchândân akickewec i nâmiziembiñ. Irec Aigita mâren sâkoo jâc mecne, wiac gâcne giewo doma rawec i mecne rehacnehec mocwâc mi domawec. ¹⁶ Inuc fuame Farao e Mose â Aroñ bârui jaha hefârec-jofarâ jasawec: “No Wofun Anutu-ñenji sindan ecnehuc ñoñe mâmâc enarepo. ¹⁷ Irec zi sâqocne-nane mocwâc bêtâmire-narenicmurâ numu-ñactepe ñohe Wofun Anutu-ñekic wira wâwâsic ecnepire sisipiric keci mume arictac ezejec.” ¹⁸ Eme Mose e Farao beherâ Wofun wira wâwâsic ecnewec. ¹⁹ Eme Wofunzi zoan wewefunaonec mânân i herisieme zoan huhunaonec mânân sanan warewec. Mânân izi ine hâpic ficne suec-jopame Hâwec Bâbâronko hufârepie Aigita mârenko hâpiczi omaewec. ²⁰ Wofunzi ine Farao ecneme mansanan erâ Israe ñic mi râec-jopawec.

Dapâc qisiric fuawec

21 Inuc fuame Wofunzi Mose dân zĩuc âzâcnewec: “Go mege sambânkopec sicnetec Aigita mâreŋ sâkoo dapâc qisiric jâmbân fuazejec.” 22 Eme Mose e meticne sambânkopec sicneme Aigita mâreŋ sâkoo dapâc qisiric fuarâ zoaŋ jahec â moc foha 23 ñiczi hohonec enĩte eipiembĩ, ehuc fic hae-jeŋic moc mi bebehe mâc fohapie zoaŋ jahec â moc tarawec. Israe ñic jaŋere fic hae ine tatamac jaha foha jumbĩ. 24 Inuc fuame Faraози Mose hefârerâ muwec: “Ñoŋe Anutu ra kiŋaŋ qacnenĩ, mâc qowi â bulimakaofâc-ŋeŋic ine hae mâreŋ zira behec-jopapie junzepieŋ. Ñokac naru motecfâc-ŋeŋic jaŋe ine ñoŋehec sâcne raniŋmu.” 25 Mosezi ine muwec: “Aricne, go bâzi ririkere â qowi bâzire wâcwiac nâretecte Wofun Anutu-nâŋec bâzi rikecnenzepeney. 26 Qowi â bulimakao wiac- nâŋec i mâmâc ame susuc- jopahuc huŋgaŋe mac moc mi behepene juzejec. Nâŋe irecneç hâcne gâcne bâwosâerâ Wofun Anutu-nâŋec bâzi rikecnehuc kiŋaŋ qacnenaŋmu. Nâŋe bâzi weniŋucne Wofun rikecnenenaŋmu i biac mi manaŋgopeney, raku ocna fisirâ ine mananaŋmu.” 27 Wofunzi ine Faraore maŋ bârângeŋkeme râec-jopaocete mi ecnewec. 28 Eme Faraози Mose âzâcnewec: “Go behecnurâ rac, erâ mocwâc maicnuzicte tukige rozemec. Go mocwâc maicnutec izia qâhâmocgupemu.” 29 Mosizi muwec: “Mukomec inuc, no zâŋe maige mocwâc mi honepemu.”

11

Mârâc fufua jaņere hâmoc biņe mukicne

¹ Eme Wofuņzi Mose dân zîņuc âzâcnewec: “Wiac hâhâwicne sâko mocjaha fokac i mupe Faraorao â Aigita mâreņko fuazejec. Fuame râec-ņopame zîrecnec sâcne raniņmu, erâ mâteņne mi sorec-ņopaocmu, fâro bahuc hae nânâ jâpec-ņopame raniņmu hâcne. ² Irec go zîņuczia ñic ñokac jazatec jaņe ru sâc diguracfâc-jeņic eri wiac siliwa â golzi bakicne irec numu-jarepie jarenzepieņ.” ³ Eme Wofuņ e Aigita ñic bufahac qajareme mana-jarembiņ. Eme Israe ñic jaņere zâņe biņe i Wofuņte erâ Aigita ñic jaņerao boc haņ bawec. Erâ i sawa mâcne, Mosere zâņe biņe i iņuc jaha Aigita mâreņko boc fewec, Farao ñicfâcne jaņere maio mecne erâ ñic ñokac sâko jaņere maio mâmâc.

⁴ Eme Mosezi muwec: “Wofuņ e zîņuc mukac: ‘No ñafe zâņiņko waharâ Aigita mâreņ fotâcne rahape ⁵ Aigita mâreņko mârâc motecfâc-jeņic jaņe zeņgoma hâmo-fârenzepieņ. Farao mârâc ñokâticne, juku tucticne qaocte mukicne, erao fuņkerâ raku kiņaņ naru padi masiņko banzaņnehuc ñekac ere mârâc ñokâ erao taraocmu. Erâ i sawa mâcne, lama bulimakao ñicne mârâc fufua jaņe iņuc jaha hâmo-fâreniņmu. ⁶ Ehame kio owa sâkozi Aigita mâreņ sâko sâcke-fâreocmu. Kio owa sâko iņucne juwicnao moc mi fuarâ fowec erâ wâc juku mocwâc mi fuaocmu. ⁷ Ehame Israe ñic jaņerao qâto moczi, ñic me qowi moc mi qâņke-jarezejec. I kecziņuc mana taraniņte: Wofuņ e Aigita ñic â Israe ñic bâtâc bacjopakac.

⁸ Injuc fuame kiŋaŋ qaqaŋcge zi jaŋe sasawa norao fuarâ fodape-narehuc ziŋuc muniŋmu, “Go â ŋicfâcge bājâpecguŋgopieŋ ŋoŋe sasawa rafârenzepieŋ.” Injuc nazapie rapemu.’” Mose e injuc murâ bune zâzâficne qame Faraο beherâ rawec. ⁹ Eme Wofuŋzi Mose ziŋuc âzâcnewec: “No Aigita mâreŋko mâsi bocjaha barâ ba ezo mupe Faraοzi mi mana-ŋareocmu.”

¹⁰ Mose â Aroŋ jahe Faraοre maio mâsi i sasawa bafârepic, eme Wofuŋ e sifu Faraο ecneme maŋsanaŋ erâ Israe ŋic jaŋe mâreŋ-ticne beherâ raniŋte mi mana-jarewec.

12

Aakic lamare sâcmutâc

¹ Eme Wofuŋzi Aigita mâreŋko Mose â Aroŋ ziŋuc mupaŋke-jactewec: ² “Ŋoŋe mosa kecziŋec manapie fufuŋke mosa ezejec. Jara sâc mosa zizi gâcne sasawa bânije-jarezejec. ³ Erâ Israe kikefuŋ mâmâc sâko sâcmutâc ziŋuc ejarenic: Mosa kecziŋec gie bapa namba 10 ira ŋicne ŋicne jaŋe ŋokac naru motecfâc-jeŋic jaŋere lama motec wâŋ wâŋ ronzeŋieŋ, moc e garikiŋfâc-ticne jaŋere lama wâŋ, moc e wâŋ, injuczi injuc. ⁴ Â fic mocko ŋic ŋokac naru motec afecne ju-niŋmu, lama motecne mi nânâ-fârene, ine fic jajahec, didigurac ŋekopireczi lama motec moc-jahare turezepirec. Ŋic ŋokac naru motec hobu-jeŋicte sâc manahuc fic wezimuc lama mocte biŋe musanaŋkezo. ⁵ Erâ lama motec ŋicne sahac furu, jara-jeŋic wâŋ, injucne sawa rocjopazo, lama motec me noniŋ motec. ⁶ Bazawiec-joparâ

bacjopa juhapie mosare gie bapa namba 14 ehame hae owâeme Israe kikefunj guru mâmâc sâko lama motec serec jaha hezuc-jopanzepienj. ⁷ Erâ socjenjic gâcne rorâ izi, fic maŋnao ŋehuc nâninŋmu, fic irec motâcte wâtunj ŋifec â ŋifec erâ jâc otecne faic rikenzepienj. ⁸ A biucne ŋafe ijaha zegoc zame nânzepienj. Poronj gorenj tâmiric erâ wâc rehac hâtâne ihec nânzepienj. ⁹ Qowi i qâricne me opâ sicko zakicne mâcne, zegoc sasawa rikerâ nânzepienj, ine qizecne â me kikene â fâri ombâŋne furu foha zame nâzo. ¹⁰ Â tiwâne ine moc mi ŋeha hae furezejec; moc ŋeha hae fureocmuo ine zocko râepie zâtâmirezejec. ¹¹ Erâ kecziŋuc ehuc nânzepienj: Umbika-ŋenjic jomarâ, kikehuhu-ŋenjic hepîe huha, gunu-ŋenjic baŋehuc fârohec nânzepienj. Funjne ziŋucte: Wofunji akic-ŋopahuc ŋowaruocmu. ¹² No ŋafe ijaha Aigita mârenj fotâcnehuc mârâc fufuafâc-ŋenjic, ŋic mecne qowi mecne, jopa-fârepemu, â Aigita nemufâc-ŋenjic jaŋerao okac babazu gie bapemu, Wofunj noni hâcne. ¹³ Soczi fic juŋgopienjko maŋenjic ezejec, soc i honerâ ŋowarupemu, eme Aigita mârenjko ima sâko bâfuahape ŋoŋerao wiac hâhâwicne moc mi fuahuc sipiric-ŋopazejec.

¹⁴ “Eme zoaŋ izi hombaŋ-ŋenjic ezejec, i jara sâc ŋehuctecne Wofunji wiac ewec irec manasuhuc junzepienj; mimiŋzi qâric mâsi i basanaŋkerâ bajupie hata sanaŋ foŋarezejec. ¹⁵ Ŋoŋe poronj gorenj tâmiric nâhuc juhapie zoaŋ gie bapa 7 tarazejec. Gie bapa namba wâŋ ira gorenj ficŋenjickonec bârârienzepienj. Eme moc e poronj gorenjhec nâocmu e Israe guruonec tunjkepie huze-

jec. Dâñ izi gie bapa wâñkonec sâcmutâc-ñejic foraku 7-ko tarazejec. ¹⁶ 3oañ gie bapa wâñ ira tutumañ tirine moc enzepeñ, erâ 3oañ namba 7 ira tutumañ inucnea mocwâc fuazejec. Gie bapa jajahec mukicne ira gie moc mi banzepeñ, mâc ñiczi nânâ nâniñmu sâc i sawa rike bâmoc enzepeñ. ¹⁷ Erâ goreñ sowa jujure sâcmutâc i mana reren enzepeñ. No 3oañ ira hâcne ñic ñokac naru motecfâc-ñejic Aigita mârenkonec batarac-ñopapo. Irec ñoñe mimiñzi qâric gie bapa irec manasurâ mâsi i basanañkerâ bajupie hata sanañ foñarezejec. ¹⁸ Fufunke mosa irec 3oañ gie bapa namba 14 owâcne funkerâ goreñ sowa jufeku 3oañ namba 21 owâcnea behenzepeñ. ¹⁹ Ficñejicko goreñ moc mi ñeha 3oañ gie bapa 7 tarazejec, irec jaba me mâren rune moc e poroñ goreñhec nâocmu, e tunkepie Israe kikefun râpenao huzejec. ²⁰ Wiac goreñhehec moc mi nânâ ficñejic sâc goreñ sowa jufârenzepeñ.”

²¹ Eme Mose e Israe ñic micnefâc-ñejic hetumañ-jopa-fârerâ ziñuc jazawec: “Ñoñe ra garikinñâc-ñejic jañere sâc manahuc lama bâwosâc-joparâ aakic lama qa hezuc enzepeñ. ²² Erâ soroqec rehacne rorâ soc otoo fokac ira âke uruckerâ izi motâcte wâtuñ ñifec â ñifec â otecne faic rikenzepeñ. Erâ ñoñeraonec moczi moc hae mi fureha fickonec mi wahazejec. ²³ Wofun e Aigita ñic jopaocte mâren fotâcne raocmu hâcne. Ehuc jâc otecne faic â motâcte wâtuñ jajahec ira soc honerâ motâc jâuruhuc ima bapa añelo aka hecneme ñopaocte ficñejicko mi feocmu. ²⁴ Ñañacne â qâricfâc-ñejic ñoñe mâsi i

basananĵkerâ bajupie hata sanan fonzarezejec.
²⁵ Eme Wofunzi mârenĵ biĵe qaĵarewec i
 nĵareme razirâ hata i hâcne âtehuc junzepienĵ.
²⁶ Eme naru motecfâc-ĵenĵic jaĵe, ‘I funĵe
 weniĵucte eenĵopienĵ?’ inĵuc wio-ĵarepie ²⁷ zinĵuc
 jazanzepienĵ: ‘I Wofunĵe aakic tiwâ bâzi. Eki
 hâcne Aigita ĵic jopahuc Israe ĵic Aigita mârenĵko
 jumbinĵ, jaĵere fic jowaruhuc akic-jopawec.’”
 Inĵuc mume ĵic ĵokac jaĵe manarâ fodapehuc
 numumbinĵ.

²⁸ Erâ Israe ĵicguru jaĵe ra inĵuc embinĵ; Wo-
 funĵi Mose â Aronĵ mujactewec irec sâcko embinĵ
 hâcne.

Wofunĵi mârâc fufua jopawec

²⁹ Eme ĵafe zânĵinĵko Wofunĵi Aigita mârenĵko
 mârâc fufua sasawa jopa-fârewec. Faraore
 mârâc ĵokâ, juku tucticne qaocce mukicne, erao
 hâcne funĵkerâ jopa raku kâpâcwâru ĵic jaĵere
 mârâc ĵokâfâc jaĵerao jopa tarawec, erâ qowi
 sasawa jaĵerao sâc ijaha ewec. ³⁰ Inĵuc eme
 Farao â kiĵaĵĵicfâcne erâ Aigita ĵic sasawa
 jaĵe ĵafeo faharerâ kio owa sâko epie Aigita
 mârenĵ sâcke-fârewec. I fic sasawa ira qânqân
 fua-fârewecte inĵuc fuawec. ³¹ Eme Faraozi
 ĵafeoa Mose â Aronĵ hefârec-jofarâ muwec: “Ajoc,
 ĵohe mecne Israe ĵicguru mecne, ĵoĵe fahare
 ĵicfâc-nane beheç-joparâ raninĵ; ehuc mumbinĵ
 irec sâcko ra Wofunĵ kiĵaĵ qacneninĵ. ³² Erâ lama
 bulimakaofâc-ĵenĵic mâmâc amec-jopa raninĵ;
 eme nunumu-ĵenĵicte fârine i norao fotâcnezejec
 wâc!”

³³ Eme Aigita ñic jañe Israe ñicguru zĩñuc muhuctecne mâren-jeñic beheniñte fâro boc ejarembiñ: “Nâñe hâmocte biñe efârenğopenen.”

³⁴ Eme Israe ñicguru jañe poroñ goreñ tâmiric mi zakicne, qâricne foha otohec rorâ ñaqi-jeñiczi foñkerâ qawe-jeñicko herâ rambiñ. ³⁵ Erâ Mosezi moc mutâcne-jarewec i wâc iñuc jaha embiñ: Eri wiac siliwa â golzi bakicne â ñaqi wiac irec Aigita ñic numu-jarembiñ hâcne. ³⁶ Eme Wofunzi Aigita ñic ejareme jañe Israe ñicguru âgo ejarehuc mana urue-jarerâ wiac numu-jarembiñ sâc jarefârembiñ. Inuc ehuc Aigita ñic jañere wiac jowac rombiñ hâcne.

Israe ñic jañe Aigita mârenj beherâ rambiñ

³⁷ Eme Israe ñicguru jañe Ramasesi hae beherâ Sukoti haeo rambiñ. Kikezi rambiñ ñic i jañere zare 600 tausen qâririñ, ñokac naru motec ine mi wosec-jopakicne. ³⁸ Erâ ñic jaba bocjahazi jañehuc mâmâc rambiñ, erâ lama bulimakao guru sâko jaha. ³⁹ Eme Aigita mârenkonec poroñ qâricne barambiñ i goreñ tâmiric rike nâc embiñ. Jañe Aigita mârenj beheniñte fâro ejarehuc bâsuec-jopambiñte dameñ basahuc poroñ goreñhec mi bâsifuckembiñ hâcne. Ehuc hatare nâsiñ gâcne wâc mi barambiñ.

⁴⁰ Israe ñicguru jañe Aigita mârenko juwefukuhapie jara 430 tarawec. ⁴¹ Eme jara 430 tarawec zoañ ira jâmbânj Wofunte ñicfâc guru sâko jañe Aigita mârenj beherâ rambiñ hâcne. ⁴² Wofunzi Israe ñic Aigita mârenkonec jowac-jopa rawec, ñafe i gunqâri juju ñafe hâcne. Eme

Israe ñicguru jañe mimiñzi qâric ñafe i hâcne Wofunje erâ gunqâri jaha jumbiñzi juengopienj.

Aakic lama nânâre sâcmutâc dân gâcne

⁴³ Eme Wofunzi Mose â Aronj zinjuc jasawec: “Aakic hombañte hata sanañ zinjuc fozejec: Jabazi aakic lama moc mi nâjâmbânkezejec.

⁴⁴ Kiñañ qaqa monenji furi bacjopakicne jañe ine sahac-jeñicko ma bajarepie sâcne nânijmu.

⁴⁵ Kiñañ qaqa omane me mâc qâtec-ñoparâ juocmu, injucnezi ine aakic lama moc mi nâzejec.

⁴⁶ Aakic lama i fic mocjahao turerâ nânzepienj, ehuc fickonec tiwâne mac moc mi bawahanzepienj, â aakic lamare siec wiac moc mi qazunzepienj.

⁴⁷ Dân i Israe kikefunj mâmâc sâkozi reñke-fârenzepienj.

⁴⁸ Ñic jabane moczi ñoñehc juhuc aakic lama nâzo mume ine e jahacne sahacko mecne, ñic â motecfâc-ticne jañere sahacko mecne ma bapie sâcne nâocmu, eme e ñoñe injucne mâreñ rune jaha erâ juzejec. Sahacnao ma mi bakicnezi ine mi nâzejec.

⁴⁹ Mâreñ rune â ñic jabane ñoñehc juengopienj ñoñere sâcmutâc mocjaha fozejec.”

⁵⁰ Eme Israe ñicguru jañe zenjgoma injuc embiñ, Wofunzi Mose â Aronj mutâcne-jactewec irec sâcko embiñ hâcne.

⁵¹ Eme Wofun e Israe ñic gurune gurune zoañ ira hâcne Aigita mâreñkonec jowac-jopame wahambiñ.

13

Mârâc fufua sasawa i Wofunje biñe qazo

¹ Wofunzi Mose zinjuc âzâcnewec: ² “Mârâc fufua zenjgoma nore biñe qahuc bâwosâec-jopapie

junzepien. Israe ñondenko ñic me qowi nenƣoc bumañkonec bâbâni fuaocmu izi hâcne nore biñe ezejec.”

Goreñ sowa juhuc hombañ ñeñe irec sâcmutâc

³ Eme Mosezi kecziñuc jazawec: “Ñoñe zoañ zi Aigita kâpâcwâru fickonec wahambiñ irec manasuhuc junzepien, Wofuñ e mesanañ-ticnezi irecnec jowac-ñopame wahambiñ hâcne. Irece ñoñe poroñ goreñhec moc mi nânzepien. ⁴ Ñoñe miñecƣac, fufuñke mosa April hâcne ira waha rañgopien. ⁵ Eme Wofuñ e mâreñ moc, susu â bañac fusucmarâ qâmbâriñkeekac, erâ ñoñe ñareocte mimiñnefâc-ñeñic mupañke-jarewec, Kanaan ñic, Hitinji, Amori ñic, Hiwiñic â Jebusi ñic jañere mâreñ hâcne, ira râec-ñopame mosa zi hâcne mâsi ziñuc basanañkepie hata sanañ foñarezejec. ⁶ Ñoñe goreñ sowa juhapie gie bapa 7 tarazejec, eme zoañ namba 7 ira Wofuñte hombañ fuazejec. ⁷ Poroñ goreñ tâmiric i nâhuc juhapie gie bapa 7 tarazejec. Wiac goreñhec ñoñerao moc mi bâfuazo, â hae mâreñ-ñeñicko, goreñ wiac moc mi bajunzepien. ⁸ Ehame gie bapa ira ñokâfâc-ñeñic ziñuc jazanzeñien: ‘I Wofuñzi Aigita mâreñkonec wahahapene ehâmo-nârewecte inuc fuakac.’ ⁹ Eme eebapa irec nikec-ñopazacte meñeñicko â zâñe mai-ñeñicko ma bapie muzac sâckezac, erâ inuc mâcne, Wofuñte sâcmutâc dânzi micñeñicko fozejec. Wofuñ e mesanañ-ticnezi Aigita mâreñkonec jowac-ñopame wahambiñ irec. ¹⁰ Hata sanañ i hâcne jara sâc damañ-ticnao âte rahuc junzepien.

Mârâc fufua jaņere dâņ

¹¹ “Eme Wofuņ e ņoņe â apa ņosafâc-ņenic mupaņke-ņarewec irec sâcko Kanaan ņic jaņere mâreņko râec-ņopahuc mâreņ ņareme ¹² ņoņe neņgoc bumaņkonec mârâc fufua sasawa Wofuņte biņe qanzepieņ; bulimakaofâc-ņenic jaņere mârâc fufua ņicne sasawa i Wofuņte biņe jaha. ¹³ Doņgi jaņere mârâc fufua sasawa irec okacne ine lama motecne râezo murâ ine upene qâpirickenzepieņ. Ⱥic jaņere mârâc fufua sasawa irec okacne lama motecne râenzepieņ. ¹⁴ Eme juku zâhec ņokâfâc-ņenic ziņuc wio-ņareņimu: ‘Wiac i fuņne weniuucte eenņopieņ?’ Eme ziņuc jazanzepieņ: ‘Wofuņ e mesanaņ-ticnezi Aigita kâpâcwâru fickonec batarac-nâporâ jowac-nâpome wahambeņ. ¹⁵ Farao e râec-nâpoocte maņsanaņ erâ qikiņnewecte Wofuņzi Aigita mâreņko mârâc fufua sasawa, ņicte mecne qowire mecne qâhâmoc-jopa-fârewec. Eme irec hâcne neņgoc bumaņkonec mârâc fufua sasawa i Wofuņte bâzi rikeeņgopeneņ. Mârâc ņokâfâc-nâņec jaņere kiwiric ine roeņgopeneņ.’ ¹⁶ Wofuņ e mesanaņ-ticnezi Aigita mâreņkonec jowac-nâpome wahambeņte mâsi izi ma iņucne erâ megao â zâņe maigao fozejec.”

Karorac â zocbârui jahe bânie-jarepic

¹⁷ Eme Farao e ņic ņokac râec-jopame Anutuzi ziņuc muhuctecne hata bembeņne Filisa mâreņkopec fowec, ira mi jowac-jopawec: “Hatao zika wiac moc fua-jareme maņjeņic risieme Aigita mâreņko risienzi piņkohec.” ¹⁸ Anutu e iņuc murâ ine ņic ņokac bârisiec-jopame

mâreŋ tuhuo Hâwec Bâbâroŋkopec rambin. Israe ŋicguru jaŋe momori ŋiczi birio raenŋopien irec sâcko Aigita mârenkonec waha rambin hâcne. ¹⁹ Eme Mose e Josefere siec mâmâc barâ rawec, i Josefezi Israe ŋicguru jaŋe zinuc mupaŋkecneninŋte ejarewec irec: “Anutuzi iqic-ŋopazokac dameŋ ira siec-nane barâ ranzepien.” ²⁰ Eme jaŋe Sukoti haeonec fahare raku Etamko tuhu mâreŋ qaŋeŋnao hâcne ira toma âterâ fom-bin. ²¹ Eme Wofuŋ e jowac-jopaocte zoaŋko karorac qâfoŋne maŋnao bâjuŋ-jopahuc juwec â ŋafeo ine zocbâruŋ maŋnao juhuc tamae-jarewec. Jaŋe zoaŋko â ŋafeo hata honehuc raninŋte inuc ejarewec. ²² Eme zoaŋko karorac â ŋafeo zoc izi mi bebehec-jopa ŋic bânie-jarehuc jaha juwec.

14

Israe ŋicguru jaŋe Hâwec Bâbâroŋ fotâcnembin

¹ Eme Wofuŋzi Mose zinuc âzâcnewec: ² “Go Israe ŋicguru jaŋe risierâ Migidoli ficsanaŋ â hâwec irec ŋondenko Pi-Hahiroti hae maickehuc toma âterâ fonzepien. ³ Farao eki Israe ŋicguru jaŋere zinuc muocmu hâcne: ‘Mâreŋ burocnezi râreŋ bârâreŋ fokacte jaŋe kosa qac qâsoric ehuc juŋgopien.’ ⁴ Eme no Faraore maŋ bâzickepe kikeo kikeo eŋarezejec, ehame no Farao â momori gurufâc-ticne jaŋerao tâpiri-nanere fuŋne bataniŋkezepac. No hâcne Wofuŋ jukopac, jaŋe i mana taranzeŋien.” Eme jaŋe inuc embin.

⁵ Ŋic ŋokac wiserâ rambin, Aigita ŋicwofuŋ binje inuc âzâcnepie manarâ e jahacne

mecne, ñicfâcne jañe mecne fâfârerâ zinjuc mumbiñ: “Nâñac wemocte mutuc erâ Israe ñic jañe kiñañ qanârembiñkonec râec-jopapene rambiñ?” ⁶ Injuc murâ zika keretac-ticne mume wareme momorifâcne rocjopawec. ⁷ Keretac bâwosâec-jopakicne 600 erâ keretac gâcne gâcne Aigita mârenko bajumbiñ sâc i mâmâc rofârewec wâc. Keretac fainao ine ru sâc momori ñic bâwosâec-jopakicne râec-jopame ñembiñ. ⁸ Eme Israe ñicguru jañe momori hawari birio rahapie Wofuñzi Aigita ñicwofuñ Farao mañne bâzickeme bâjâpec-jopa rawec. ⁹ Aigita ñic, Farao becâsicfâcne â keretac wiac â becâsicko rara ñic â momori, injuczi bâjâpec-jopa raku Baali-Zefon zinjucnao, Pi-Hahiroti haeo waha ñehapie bâfuac-jopambiñ.

¹⁰ Eme Faraozi bâqin-jopahame Israe ñicguru jañe zâñe fipie rame honec-joparâ mi zinjuc mananzepieñ i: Aigita ñic jañe nâpo jâpec enârezo wareñgopieñ. Injuc manarâ mâretéc hâwic-jopawec. Eme Israe ñicguru jañe Wofuñ wira wâwâsic ecnemiñ. ¹¹ Ehuc Mose zinjuc âzâcnemiñ: “Aigita mârenko zâñerun gie mi fokac me, irec zira mâren burocnao hâmonante hota-nâretécne wareñgopenen? Go weninjuc enârehuc Aigita mârenkonec jowac-nâpo waremeñ? ¹² Nâñe ocna Aigita mârenko zinjuc mi gazambeñ me, ‘Go beheç-nâpotec nâñe sifu Aigita ñic kiñañ qajarenzepeneñ?’ Nâñe Aigita ñic jañere kiñañ qahuc junzapeñ muzac afecke-nârezac, zi ine mâren burocnao hâmo sipiric enañmu ekac.” ¹³ Eme Mosezi ñic ñokac jazawec: “Ñoñe mi hâwic-ñopaoc, qin

herâ domaniņ. Erâ Wofuņzi miņecgac bafic-ņopaocmu i honenzepieņ. Aigita ņic miņecgac honec-jopangopieņ jaņe mocwâc mi honec-jopajâmbânkeniņmu hâcne. ¹⁴ Ȋņe mâc domahapie Wofuņ e ņoņere âkehoc zika qaocmu.” ¹⁵ Eme Wofuņzi Mose ziņuc âzâcnewec: “Go wemocte wira wâwâsic enarekic? Go Israe ņic jaņe jazatecne fahare ranzepieņ. ¹⁶ Go ine gunuge bâfeņnerâ mege hâweckopec sicnetec hâweczi tâcneme Israe ņicguru jaņe mâreņ kereņnao fotâcne ranzepieņ. ¹⁷ Eme noni Aigita ņic jaņere maņ bâzickepe jaņe bâjâpec-ņopahapie Wofuņ qâreņ-nane Farao â momorifâc-ticne, keretac-ticne erâ becâsicko rara ņicfâc-ticne jaņerao bataniņkezepac. ¹⁸ Eme no Farao â keretac-ticne erâ momori â becâsicko rara ņicfâc-ticne jaņerao Wofuņ qâreņ-nane bataniņkepe Aigita jaņe, no hâcne Wofuņ jukopac, i mana taranzepeņ.”

¹⁹ Eme Wofuņte aņelo Israe ņic bânije-jareweczi rârierâ râpefuņ-jeņicko domawec. Ehame karo-rac qâfoņzezi iņuc jaha mai-jeņickonec rârierâ râpefuņ-jeņicko domawec. ²⁰ Ehuc Aigita ņic â Israe ņic ņonden-jeņicko aka iņucne erâ domawec. Ehuc ņifecne dapâc ewec, â ņifecne tamaewec, irec ņic jaņe ņafeo hohonec me bâbâfuac mi ehapie hae furewec.

²¹ Ehame Mose e hâwec faio meticne sicnewec. Wofuņ eki ine mume zoaņ wewefunaonec mânâņ sâkozi ņafe zora qahuc hâwec qâkereņkewec. ²² Eme opâzi ņifec â ņifec sanaņkerâ sac iņucne domaha Israe ņic jaņe duņmâreņ kereņnao fotâcnembiņ. ²³ Ehame Aigita ņic jaņe fâro

erâ bājâpec-jopahuc iñuc jaha fotâcnezo murâ Faraore becâsic sasawa mecne, keretac mecne erâ becâsicko rara ñic māmâc hâwec zâzâñiñko ra fisimbiñ. ²⁴ Eme hae fufurecte ruc bapa damenjo Wofunzi zocbâruñ â karorac mañnao juhuc Aigita ñic jañeraopec zâñe fime rame honec-joparâ mañmutuc bacjopawec. ²⁵ Ehuc mume keretac-jenjicte zafenğânne ñetaramè zuhuckerâ raniñte eipiembñ. Inuc fuame Aigita ñic jañe mumbñ: “Israe ñic beheç-joparâ wiserâ ranañ me! Wofun e jahac bafic-jopakac i! I Aigita ñic nâñac nâpoocte inuc ekac.”

²⁶ Eme Wofunzi Mose zinuc âzâcnewec: “Go mege mocwâc hâwec faio sicnetec hâweczi risierâ Aigita ñic, keretac â becâsicko rara ñic hâcne qâuruc-jopazejec.” ²⁷ Eme Mose e meticne hâwec faio mocwâc sicnewec. Eme hae fureme Aigita ñic jañe hâwec risie wareweckopec wisezo ehapie hâweczi fofoticnao risiehuc qofac-jopawec. Inuc fuame Wofunzi Aigita ñic hâwec zâzâñiñko bâsirowec-jopawec hâcne. ²⁸ Eme hâweczi risierâ keretac mecne, becâsicko rara ñic mecne, Faraore momori sasawa hâcne Israe ñic bājâpec-joparâ hâwecko humbiñ jañe zengoma qâuruc-jopafâreme hâmo miziembñ. ²⁹ Israe ñicguru jañe ine hâweczi ñifec â ñifec sanañkerâ sac inucne domaha hâwec zâzâñiñko mâreñ kereñnao rahuc fotâcnembñ.

³⁰ Inuc fuame Wofunzi zoañ ira Israe ñic ñokac jañe Aigita ñic jañere meonec batarac-jopawec, ehame Aigita ñic qânqân-jenjic hâwec sirizi qârâriec-jopame moñgenjo fe fohapie Is-

rae ñic jañe honec-jopambin. ³¹ Erâ Wofunzi tâpiri sâko-ticnere funje Aigita ñic jañerao bataniñkewec i Israe ñic jañe mâmâc hone tarambin. Ehuc Wofun arañ bacnehuc manasiñkembin â kiñaññic-ticne Mose e wâc manasiñkembin.

15

Israe ñicguru jañere mumumbian gae

¹ Damen ira Mose â Israe ñicguru jañe Wofun mutenkehuc gae kecziñuc hembin:

“No Wofun gae hecnepe,
e tâpiri quñqasan-ticne bataniñkewec hâcne;
e becâsic â ñic hâwecko tunjopame humbin.

² Sasanañ â mumuten-nane i Wofun e hâcne,
ñeñezic-nane i ekizia juwec;
e hâcne Anutu-nane, no muten bâten ecnezepac,
e apa ñosa â mamacfâc-nane jañere Anutu,
no e muafeckezepac.

³ Wofun e zika qaqa ñicsaric
zâñe-ticne Wofun hâcne.

⁴ “Faraore keretac â momorifâc i hâwecko
tunjopawec,
â momori micne bâwosâec-jopakicne jañe
Hâwec Bâbâronko bâutuc-jopakicne.

⁵ Rumizi bârârân-jopawec;
qânâ inucne zâkân fâhânnao
hujâmbânkembin.

⁶ O Wofun, mefârege i tâpiri quñqasanhec,
gore mefârezi râsi qanzañ-jopaekac, o Wofun.

⁷ Tâpiri quñqasanje fekicne,

- irec râsi jaņe guriņ-jopaekic;
erâ kimbenġere zocbâruņ râetec
izi ra sopâc iņucne zahuc zâsen-jopaekac.
- 8 Sâke rombânġe wefume opâzi ferâ sananġewec,
â hâweczi sac iņucne hân domawec,
sirizi hâwec zâzânġiko sananġerâ fowec.
- 9 Râsizi muwec: ‘No jopa jâpec ejarehuc
jowarupe,
no mateņ bâtâc bape andac-nane omaezejec.
No zika-nane bâfeņepe
menanezi jopa miziezejec.’
- 10 Go mutec mânân ġame hâweczi
ġâuruc-jopawec,
jaņe aeņ iņucne opâ sâkoo hufârembiņ.
- 11 “O Wofuņ, nemu ŋondenġko go iņucne mozi moc
jukac?
Mozi moc go iņucne ġuņġasaņ-ticnehec â
tirine
erâ mâsi bapa â zika ġaqare zâņe rara
sâkohec jukac?
- 12 Go mefârege sicnemeņ,
eme mâreņzi ġâcġopawec.
- 13 “Go aki anonoc fogareha ŋic batarac-jopameņ,
go tâpirigezi jowa ġataņ ejarehuc
tiri haegao râec-jopameņ.
- 14 Ŋic jaņe manarâ fâfârembiņ,
Filisa mâreņ rune jaņe ġarac ġarac ġambiņ.
- 15 Dameņ ira Edom ŋicwofuņ jaņe bipic tatara
ejarewec,
â Moabi fekicnefâc-jeņic hâwic-jopawec.

Kanaan mâren rune zenjoma manjenic
gâckewec.

¹⁶ Hâhâwic â bipic tatara ejarewec;
megere tâpiri sâko irec erâ
qânâ injucne qirinmâc embin.

O Wofuñ, gurufâcge jañe fotâcnembin,
go gahac batarac-jopameñ
ñicguru i jañe hâcne fotâcnembin.

¹⁷ Goki jowac-jopatec razimbin
erâ gokizia gahacne tiki mârenko sara mama
ejaremeñ,
go gahac fic hae erâ ñec juc eekic

ira hâcne, o Wofuñ,
gahacne mezi tirific bameñ,
ira hâcne, o Wofuñ.

¹⁸ Wofuñ e guriñ bapa gie-ticne bahuc juekaczi
barazihuc juocmu sanan.”

¹⁹ Faraο becâsic â keretac â momorifâc-ticne
jañe hâwec fotâcnezo ehapie Wofuñzi hâwec
ecneme fai-jeñicko fehuc qâurucjopawec hâcne.
Israe ñic jañe ine mârenj kereñnao hâwec
fotâcnembin. ²⁰ Eme porofete ñokac Miriam,
Aronje qo hâcne, eki woñgânj rome ñokac sasawa
e qâterâ woñgânj jaha ropie gae wombin. ²¹ Eme
Miriamzi gae zinjuc hejarewec:

“Wofuñ gae hecnenan,
e tâpiri quñqasan-ticne bataniñkewec hâcne;
e becâsic â momori hâwecko
tuñjopame hufârembin.”

Israe ñic jañe mârenj sawao ra jumbin

²² Eme Mose e Israe ñic jañe ejareme Hâwec Bâbâronj behembiñ. Eme jañe Suru mârenj burocnao rahuc juhapie zoañ jahec â moc eha opâ moc mi bâfuambiñ. ²³ Raku Mara mârenjko fisirâ opâ bâfuambiñ. Erâ i opâ hâtânere wemocko moc nanzapiñ. Opâ hâtânere mârenj irec zâñe Mara mukicne. ²⁴ Eme ñic ñokac jañe Mose mu henqâñ ecnehuc zîñuc âzâcnembiñ: “Nâñe opâ wenirec nanañmu?” ²⁵ Eme Mose e Wofuñ wira wâwâsic ecneme Wofuñzi jâc moc jâutuweg i rorâ opâo beheme hume opâzi nocne ewec. Eme Wofuñ e ira hâcne dâñsanañ â mumutâc dâñ gâcne jarehuc esâic-jopawec. ²⁶ Ehuc muwec: “Ñoñe Wofuñ Anutu-ñeñicte mic renkehuc ere maio wiac eene bianañ i ehuc dâñsanañ â sâcmutâc-ticne renkeniñmuo ine Aigita mârenjko huc zâic wiac bâfuapo i ñoñere faio râepe mi feocmu, no Wofuñ ñoñere bâbâpiañ hâcne.”

²⁷ Eme jañe raku Elim hae mârenjko fisimbiñ. Ira ine opâ zâñe 12 fowec â hâmu jâcne 70 doma rawec. Eme jañe opâ fowecko toma âterâ waha fombiñ.

16

Anutuzi nânâ qowi bâfua-jarewec

¹ Juku Elim beherâ rambiñ. Raku Israe kikefuñ jañe zengoma mârenj burocne moc, zâñene Sini ira fisimbiñ. Sini mârenj i ine Elim â Sinai ñonden-jekicko fokac. Jañe Aigita mârenj beherâ ra juku mosa namba tu irec gie bapa 15 ira hâcne fisimbiñ. ² Eme Israe kikefuñ mâmâc sâko jañe mârenj burocnao Mose â Aroñ mu kâronj

ejactembiņ. ³ Ehuc ziņuc muhuc jasambiņ: “Nâņe Aigita mâreņko qowi â poroņ mâretec fonâreme nâ gapec ehuc jumbenġ damenġ ira Wofuņte mezi nâpome hâmonzapeņ me! Nġohe ine kikefuņ zi nâņe hâmo-fârenanġte mâreņ burocnao jowac-nâpopire warembenġ hâcne.”

⁴ Eme Wofuņzi Mose âzâcnewec: “Noni mupe poroņ sambânġkonec hoe iņucne ņoņerao wa-haocmu, eme ņic jaņe zoaņne zoaņne ra zoaņte sâc ro nusec enzepeienġ. Iņuc ehapie nore micsâcko juņġopienġ me mâcne, irec fuņne honezepac.

⁵ Eme zoaņ namba 6 ira ro nusec eniņmu i rike bâmoc epie zoaņ sâc roeņġopienġ irec sâc sirick-ehuc zoaņ jajahecte sâc ezejec.” ⁶ Iņuc mume

Mose â Aroņ jahe Israe ņicguru zeņġgoma ziņuc jazapic: “Wofuņzi Aigita mâreņkonec batarac-ņopame wahambiņ irec fuņne i hae owâeme hone taranzepeienġ. ⁷ Erâ hae fureme, Wofuņ mu kâroņ ecnepie manawec i sifu mana urue-ņareme Wofuņ zai zonzoņ-ticnere fuņne honenzepeienġ wâc. Nâhe mac zi ine wemo wiacte maņġgâņ dâņ munâctenġopienġ?” ⁸ Eme Mosezi muwec:

“Wofuņ e mu kâroņ ecnepie manawecte hae owâeme qowi ņareocmu â furicte poroņ ņareme nâ gapec eniņmu. Nâhe iņucnezi wemo enacmu? Nġoņe nâhe mâcne, Wofuņ mu kâroņ ecneņġopienġ hâcne.”

⁹ Erâ Mosezi Aroņ âzâcnewec: “Go Israe kikefuņ mâmâc sâko kecziņuc jazac, ‘Nġoņe Wofuņte maio ware fuanġi, e mukâroņ-ņeņic manawec hâcne.’” ¹⁰ Eme Aroņ e Israe kikefuņ mâmâc sâko dâņ jazahame jaņe mâreņ burocnaopec

zâñe fipie rame mi Wofuñ tatamac-ticne karorac mañko fuame honenzepieñ i! ¹¹ Inuc fuame Wofuñzi Mose zinuñc âzâcnerâ muwec: ¹² “No Israe ñicguru jañere kâroñ qaqa manapac, irec go jazac, ‘Owâ ririñko qowi nâniñmu â furicte poroñ nâ gapec eniñmu, inuc ehuc no Wofuñ Anutu-ñeñic jukopac i mana taranzepieñ.’ ”

¹³ Eme hae owâeme koneñ qâñhec fisirâ tomao herâ fusucmambiñ, eme hae fureme titikuczi toma râreckehuc fowec. ¹⁴ Erâ titikuc kereñkeme mâreñko hândâñ piic piic padi tinac ñerawec. ¹⁵ Eme Israe ñicguru jañe honerâ jañackoañ zinuñc mu wioc embiñ: “Ûi wemo wiac mo?” Jañe wiac irec fuñe kâuc bambiñ hâcne. Inuc epie Mosezi zinuñc jazawec: “I nânâ hâcne, Wofuñzi nâniñte ñarejec. ¹⁶ Wofuñzi irec dâñ zinuñc mutâcne-ñarewec: ‘Ñoñe ru sâc nânâ i sâcñeñic ro nusec enzepieñ. Boze-ñeñicko ñic ñokac naru motec ñec foc eençopieñ jañere zare manahuc ru sâc amae wâñ wâñ inuc ronzepieñ.’ ” ¹⁷ Eme Israe ñicguru jañe inuc hâcne embiñ, gâcnezi afecne, gâcnezi bocjaha inuc rofârembiñ. ¹⁸ Eme sâcticne honeniñte amaeo râepie hume zinuñc fuawec: Bocjaha nuseweczi mâririhec mi ewec â afecne nuseweczi nânâ wâc mi basawec, jañe sasawa hobu-jeñicte sâc ro nusec embiñ hâcne. ¹⁹ Eme Mosezi jazawec: “Ñic moczi tomâc furictere biñe moc mi râeme fozejec.” ²⁰ Jañe ine Mosere dâñ mana rereñ mi embiñ. Ehuc gâcnezi tiwâne zoañ mocte biñe râepie foha umbenñ fuame âsu fiwec, eme Mosezi aaric mana-jarewec. ²¹ Jañe furic sâc hobu-jeñicte sâc ro nusec ejumbieñ, zoañ wefurâ

sanaŋkeme ine opâ efâre jujec.

²² 3oaŋ namba 6 ira ine 3oaŋ gâcnao rombiŋ irec sâc zuhuckerâ ru sâc amae jajahec ro nusec embiŋ. Inŋuc epie soŋaŋ sasawa jaŋe Moserao rarâ âzâcnembiŋ. ²³ Âzâcnepie muwec: “Wofuŋ e irec hâcne ziŋuc muwec: ‘Tomâcko sabata hombaŋ, Wofuŋte tiri sabata hâcne. Nŋoŋe zegoc rikezo murâ zegoc rikeninŋ me kuzio rikezo murâ rikeninŋ, inŋuc epie tiwâne ŋeme tomâckore biŋe râepie fozejec.’ ” ²⁴ Eme jaŋe Mosezi jazawec irec sâcko ehuc furictere biŋe râepie forâ âsu mi fiwec erâ umbeŋ wiac ira wâc mi fuawec. ²⁵ Eme Mosezi muwec: “Miŋecgac nânzepieŋ, miŋecgac Wofuŋte sabata hombaŋ hâcne. Nŋoŋe miŋecgac gieo moc mi bâfuaniŋmu. ²⁶ Nŋoŋe 3oaŋ gie bapa 6 sâcne ro nusec eniŋmu, 3oaŋ namba 7, sabata hâcne, ira ine moc mi fuarâ foomu.” ²⁷ Gâcne jaŋe ine mana-bip-iehuc 3oaŋ namba 7 ira sifu ro nusec eniŋte rarâ basambiŋ. ²⁸ Eme Wofuŋzi Mose ziŋuc âzâcnewec: “Nŋoŋe dâŋnane â sâcmutâc-nane qatarahuc juwarembiŋ i wezimucko moc mana rerenŋ eniŋmu? ²⁹ Manaŋgopieŋ, Wofuŋ no hâcne sabata bâfua-ŋarepo, irec 3oaŋ namba 6 ira 3oaŋ jajahecte sâc nânâ râe-ŋarekopac. Irec 3oaŋ namba 7 ira ŋic sasawa ŋoŋe boze-ŋeŋicko ŋefârehapie ŋic moczi boze-ticne beherâ gieo moc mi razejec.” ³⁰ Eme ŋic ŋokac jaŋe inŋuc ehuc 3oaŋ namba 7 ira sabata hombaŋ ŋembiŋ.

³¹ Eme Israe kikefuŋ jaŋe nânâ irec zâŋe “mana” mumbiŋ. I padi qaŋqaŋ inŋucne, erâ nâpie baŋac aŋac inŋucne ewec. ³² Eme Mosezi muwec:

“Wofunzi mumupan dân muwec i kecziñuc: ‘Ñoñe nânâ i amae mocte sâc qâricfâc-ñejic jañere erâ râepie fozejec. Eme jañe, no Aigita mâreñkonec jowac-ñopa waharâ mâreñ burocnao nânâ weniñuc gumec-ñopapo i honzepeñ.’” ³³ Eme Mosezi Aroñ âzâcnewec: “Go rowañ kiruñ moc rorâ ira amae mocjahare sâc ‘mana’ hoñketec hume qâricfâc-ñejic jañere erâ Wofunte maio râepie domazejec.” ³⁴ Eme Aroñ e Wofunzi Mose âzâcnewec irec sâcko ehuc sâcmutâc dânte katapa mañfunñao râeme domawec. ³⁵ Israe ñicguru jañe ine “mana” nâhuc juhapie jara 40 tarame mâreñ moc ñic jumbiñko ira fisimbiñ. Ine hâcne, “mana” nâhuc juku Kanaan mâreñ qañeñao fisimbiñ. ³⁶ Amae 10 râepie oto kâcçene mocjahare sâc ewec.

17

Mosezi haroñañ qame opâ wahawec (3ar 20:1–13)

¹ Israe kikefun mâmâc sâko jañe Wofunte michte Sini mâreñ burocne beherâ juju fofu raku Refidimko fisirâ toma âterâ boze bafârembiñ. Ehuc ñic ñokac jañe opâ basambiñ. ² Irec Mose dân mucnehuc ziñuc mumbiñ: “Opâ nâretec nanañ me!” Eme Mosezi jazawec: “Ñoñe wemocte no dân munareñgopieñ? Wemocte Wofun esâickençopieñ?” ³ Ñic jañe ine opâre hâmorâ Mose mu kâroñ ecnehuc mumbiñ: “Go wemocte nâñe nâñâcne mecne, naru motecfâc-nâñec jañe mecne â lama buli-makaofâc-nâñec nâñe mâmâc zira opâre hâmo

sipiric efârenante Aigita mârenkonec jowac-nâpo waremen?” ⁴ Inuc mupie Mosezi Wofun wira wâwâsic ecnehuc muwec: “No ñicguru zi weniñuc ejarepemu? Jañe qânâzi hehâmocnuzo engopien ine.” ⁵ Wofunzi Mose âzâcnewec: “Go Israe soñan micne gâcne rocjopatec ñicguru bânie-jarenin, ehuc gunuge Nilu opâ qamen i hâcne barâ razemec. ⁶ Manakic, no ocna, Horebe tiki funnao haroñan faio maigao domazepac. Eme go haroñan qatec opâ wahame ñic ñokac jañe sâcne nâniñmu.” Eme Mose e Israe soñan micne jañere zâñe faio inuc hâcne ewec. ⁷ Erâ hae mâren irec zâñe “Masa” (eesâic) â “Meriba” (dâñ mumu) muwec, ine Israe ñic jañe mu kâroñ ehuc Wofun dâñ zinuc muhuc esâickembin irec: “Wofun e ñonden-nâñecko jukac me mâcne?”

Amaleke ñic jañehc qaqaq embin

⁸ Refidim mârenko juhapie Amaleke ñic jañe warepie Israe ñic jañehc qaqaq embin. ⁹ Eme Mosezi Josua âzâcnewec: “Go ñic rowosâec-jopatec ra Amaleke ñic jopanzipien. No tomâcko tiki botâñnao ferâ Anuture gunu badomapemu.” ¹⁰ Josua e Mosezi âzâcnewec irec sâcko ehuc momori jañehc Amaleke ñic jopaniñte rambin. Ehame Mose â Aroñ erâ Huru jañe ine tiki botâñnao ferâ domambin. ¹¹ Eme Mose mejahec-ticne bâfenñeme sâc Israe ñic jañe sanankembin, mene wahame sâc ine Amaleke ñic jañe sanankembin. ¹² Eme Mose e mene banankeme qânâ moc rorâ domawecko hecnepire waha ñewec. Ehame Aroñ â Huru jahe mejahec-ticne dopec-jofahuc domapic, moc

ņifec â moc ñifec; ñjuc ehapire mejahec-ticne sananķerâ domaha zoan huwec. ¹³ ñjuc epie Josua e Amaleke ñicwofuņ â momorifâcne zika tinacbiric jopawec.

¹⁴ Eme Wofuņzi Mose kecziņuc âzâcnewec: “Go wiac irec manasuhuc juninķte papiao qârenķerâ Josua âzâcne qâmoc ezemec, no sambân ru-rumaņnao Amaleke ñic jaņere zâņe biņe hetâ qâtâtiepe omae-jâmbânķeocmu.” ¹⁵ Mose eki ine alata moc barâ zâņene “Wofuņzi filak-nane ekac” ñjuc muwec. ¹⁶ Erâ muwec: “Wofuņte filak i meņeņicko râepie fooc! Wofuņzi hâcne Amaleke ñic jaņehec mimiņzi qâric zika gie bahuc juocmu.”

18

Jetoro e Mose iqickewec

¹ Midiaņ mârenķonec taha bapa ñic moc zâņene Jetoro, Mose kimo-ticne hâcne, e Anutuzi Mose â Israe ñic ehâmo-jarewec, erâ Wofuņ e Israe ñic Aigita mârenķonec jowac-jopa wahawec irec biņe mana-fârewec. ² Irec Mose kimo-ticne Jetoro e Mosezi juwicnao ñonân-țicne Źibora â ñokâ jahec-ticne râec-jopame risiembiņ jaņe Moserao jowac-jopa raocte hefârec-jopawec. ³ Motec mocte zâņe i ziņuc muhuc Geresom mukicne: “No mârenķ furunao jaba jukopac.” ⁴ Mocte zâņe ine ziņuc muhuc Elieze mukicne: “Mamac-nanere Anutuzi bafic-nane juhuc Faraore zikaonec bataracnuwec.” ⁵ Eme Jetoro, Mose kimo-ticne hâcne, e Mose ñonân-țicne â ñokâ jahecne jowac-jopa raku mârenķ burocnao Anuture tikio Mosezi ñec juc ewecko fisiwec hâcne. ⁶ Ehuc Moserao dâņ

ziñuc râeme rawec: “Go manac, kimoge Jetoro no â ñonân ñokâfâcge nâñe gorao fâzo engopeneñ.”
⁷ Eme Mose e kimo-ticne hatao bâfuaocte rawec. Raku bâfuarâ manfuñnao fodaperâ muduckewec. Eme jahe juju-jekicte muc manac eraku qoruc bozemañko fepic. ⁸ Eme Mose e Wofuñzi Israe ñic jañere erâ Farao â Aigita ñic jañerao wiac ewec bawec irec dân binañ kimo-ticne ninic ecne-fârewec. Erâ hatao juhapie zârâ zâpâ wiac fua-jareme Wofuñzi hone kitanñ ejarewec irec bianañ i mâmâc bacnewec. ⁹ Inñuc eme Jetoro e Wofuñzi Israe ñic ehâmo-jarewec â Aigita mârenkonec batarac-jopawec irec binañ sasawa manarâ bu-bianañ manahuc zeri bari ewec.

¹⁰ Erâ Jetorozi muwec: “Aigita ñic â Farao jañere meonec batarac-ñopawec â ñicguru zi Aigita kâpâcwâru-jeñickonec firuec-jopawec, Wofuñ e hâcne mutenñ bâtenñ ecnezo. ¹¹ No zi manakopac: Wofuñ e nemu fuñne fuñne siric-jopa-fârerâ femicne sâko jukac. E Aigita ñic jañe ñicguru zi bombonñ ejarehapie mejeñickonec batarac-jopawec hâcne.” ¹² Eme Mose kimo-ticne Jetoro e Anutu qowi bâzi â taha bâzi rikecnewec. Ehame Aronñ â Israe ñic micnefâc-jeñic sasawa jañe Anuture maio Mose kimo-ticnehec tiwâ zepec nâninñte bozeo razimbiñ.

¹³ Hae fureme Mose e ñic jañerao mumutinñ gie baocte waha ñeha ñic jañe Mosere maio furicte fuñkerâ domahuc juhapie hae owâewec. ¹⁴ Eme Mose kimo-ticne e Mosezi ñic jañerao gie sasawa bahuc juwec i hone-fârerâ muwec: “Go ñic jañerao keci wemo gie bakomec? Erâ

go wemocte gie i buc bahuc ñehañtecne ñic jañe gore maio funkerâ ware domahuc juhapie hae ñafekac?” ¹⁵ Eme Mosezi kimo-ticne âzâcnewec: “Ñic jañe Anutu mu wioc ecnezo norao wareñgopiente bakopac. ¹⁶ Jañe dânjenic moc fuame norao wareñgopien, eme noni dânjenic mutarahuc Anuture dânsanaj â mumupaj dân mutâcne-jareekopac.” ¹⁷ Inuc mume kimo-ticnezi âzâcnewec: “Go wiac keci etecne mi sâckekac. ¹⁸ Ñoñe inuc epie gore tâpiri mecne â ñic gohec junopien jañere tâpiri mecne i biac wa haocmu. Gie keci i ñemâcne, irec go buc bapare sâc mi ekac. ¹⁹ Irec no dân moc gazape manahuc juhante Anutuzi gohec juzejec. Go ñic jañere erâ Anuture maio fuazemec, ehuc dân wiac-jeñic muzemec. ²⁰ Erâ dânsanaj â mumupaj dân mutâcne-jarehuc hata raniñte â wiac ebac eniñte mukicne i wâc jaza jowatuc ezemec. ²¹ Inuc ehuc ine jañere ñondenkonec ñic asa faio gie bapane â Wofun araj babacne, siocmâc â mu bâmiriñ dân qiqikiñ, inucne bâwosâec-joparâ micne râec-jopazemec. Eme gâcne jañe ñic tausen, gâcne jañe 100, gâcne jañe 50, gâcne jañe 10 jañere micne junzepien. ²² Ehuc dameñ sâc dânjenic mutiñne-jarehuc mutara-jarenzepien. Dân ñemâcne sasawa gorao râenzepien, aafecne ine jañe jañac mutiñne-jarehuc mufâsâenzepien. Inuc epie gore giezi afeckeha jañe tagi ñifec dehuc go baficgunzepien. ²³ Go inuc ecmuo ine Anutuzi giedân mugarewec i sâcne bahuc jucmu â ñic ñokac zi jañe zenroma manjenic taraha bumâtenko fic boze-jeñicko risieniñmu.”

²⁴ Mose e kimo-ticnezi dân âzâcnewec sâc mana reren efârewec. ²⁵ Ehuc Israe ñic gurune gurune jañeraonec ñic ropañ-jeñichec rowosâec-jopará ñic ñokac jañere micne râec-jopawec, gâcne ñic tausen jañere micne, gâcne ñic 100, gâcne ñic 50, gâcne ñic 10 jañere micne râec-jopawec hâcne. ²⁶ Ehuc ñic ñokac jañere dân dameñ sâc mutiñne-jarehuc dân ñemâcne erao râeniñte â aafecne ine jañe jañac mutaranिंte mujarewec. ²⁷ Mose e iñuc erâ kimo-ticne mâzockeme mâreñ-ticnao risie rawec.

19

Sinai tikio fisimbiñ

¹ Israe ñicguru jañe Aigita mâreñkonec waha rahuc juhapie mosa jahec â moc eha zoañ ijaha jâmbâñ Sinai mâreñ burocnao fisimbiñ. ² Jañe Refidim hae mâreñ beherâ raku Sinai mâreñ burocnao fisirâ ira ñec juc embiñ. Ehuc Sinai tiki mendânko toma âterâ fombiñ. ³ Mosezi ine Anuturao fewec. Ehame Wofuñzi tikionec wirahuc âzâcnewec: “Go Jakobore qâricfâc, Israe ñicguru hâcne ziñuc muhuc jazazemec: ⁴ No Aigita ñic jañe wiac ejarepo â ñoñe tuçwipere fakec faio tinac bacñopa warepo i ñoñe hone-fârembiñ. ⁵ Eme zi dânñane mana reren ehuc zâzâfic-nane bajuniñmuo ine ñicne ñicne jañere ñondenko ñicfâc-nane bacñopapemu, mâreñ sâko mâreñ i nore biñe ekac hâcne. ⁶ Ñoñe taha bapazi uucmañ-nane rauckerâ ñicguru tirine moc erâ junarenzepiñ. Go dân i hâcne Israe ñic jazazemec.”

⁷ Eme Mose e waharâ ñicguru jañere micne bapa hetumañ-joparâ Wofunzi dâñ âzâcnewec i furu jaha jaza-fârewec. ⁸ Eme ñic jañe zengoma zinjuc âzâcnembiñ: “Wofunzi dâñ muwec i renke-fârenante munğopenen.” ⁹ Eme Wofunzi Mose âzâcnewec: “No karorac mañko gorao fâzo ekopac, eme no gohec dâñ muc manac ehapere ñicguru jañe manarâ dâñge mana zakiehuc junzepien sanañ.”

Injuc mume Mose e ñic ñokac jañere dâñ i Wofunz âzâcnewec. ¹⁰ Eme Wofunzi Mose âzâcnewec: “Go ñicguru jañerao hurâ jazatec jañe miñecgac â tomâcko mañsowa juhuc ñaqi wiacjenic zurenzepien. ¹¹ Ehuc zawierâ juhapie zoañ namba 3 maickezejec. Eme zoañ ira hâcne Wofunzi ñic zengoma jañere zâñe faio Sinai tikio wa-haocmu. ¹² Goki ine aka hajarehuc zinjuc jazazemec: ‘Ñoñe tikio fenzipiñte me tiki qañeñe sawa moc ba bâuac enzipiñte rucñenic banzepien. Moc e tiki ba bâuac eocmu e hâmo-jâmbânkezejec. ¹³ Ñic moczi moc mi bâuazejec, bâuame qânâzi hehâmozo me tepezi muru-hâmozo, ñic me qowi e moc mi jujâmbânkezejec.’ Qeñ zoricne dâñeme manarâ ine tiki funko warezepien.” ¹⁴ Injuc mume Mosezi tikionec ñic jañerao waharâ zawieniñte jazawec, eme jañe ñaqi-jenic zurembiñ. ¹⁵ Eme ñic ñokac zinjuc jazawec: “Ñoñe sowa juhapie zoañ namba 3 maickezejec. Ehame ñokac ba bâuac moc mi ejarenzepien.”

¹⁶ Eme zoañ namba 3 hae fureme quñ parandan hehuc fowec â karorac qâfoñe moc waha tiki botâñe foñkewec erâ qeñ sokawec dâñeme ñic

tomaο jumbiη jaje qarac qarac qambiη. ¹⁷ Inuc fuame Mosezi ηic ηokac jaje Anutuhec bābāfuac eniηte tomaonec jowac-jopame tikifuηko birickerā domambiη. ¹⁸ Eme Wofuη e zocmaηko tikio wahawecte tikizi hosāc qame hosāc-ticnezi hosāc qeηqeηko feekac inucne fewec, erā tiki i māretec qiqiteckehuc ηewec. ¹⁹ Ehame qeηzi soka makawec dāηeme Mose e dāη mume Anutuzi okacne qunmaηko bātikiecnewec. ²⁰ Erā Wofuη e Sinai tikio wahawec, tiki botāηnao hācne. Ehuc Mosezi tiki botāηnao feocte wiracneme fewec. ²¹ Eme Wofuηzi Mose āzācnewec: “Go hurā ηicguru uη jazac, jaje Wofuη no honecnuniηte aka huckerā wefuhuc bocjahazi hāmo sipiric enziπiηte. ²² Erā taha bapa Wofuη maickeenqopieη jaje inuc jaha maηsowa juhuc zawienzeπieη, mi epie Wofuη noni sipiric-jopazipore.” ²³ Eme Mosezi Wofuη āzācnewec: “Ņic ηokac jaje Sinai tikio sācne mi wefuniηmu, i go gahac uηsawaη enārehuc ziηuc mumeηte: ‘Tiki rāreckehuc sac barā furu muzemec.’” ²⁴ Eme Wofuηzi āzācnewec: “Go huc, eme Aroη jowatec māmāc wefuzepirec, taha bapa ā ηic ηokac jaje ine Wofuη noraο wefuniηte aka mi huckenzeπieη; epie Wofuη noni sipiric-jopazipohēc.” ²⁵ Inuc mume Mosezi ηicguru jaηerao warā jazawec.

20

*Anutuzi Sācmutāc Sanaη 10 jarewec
(Sāc 5:1–21)*

¹ Eme Anutu e dâŋ kecziŋuc sasawa mufuahuc muwec:

² “Noni Wofuŋ gore Anutu, no hâcne Aigita mâreŋ, kâpâcwâru fic hâcne, irecnec bataracgupo.

³ “Go nore maio nemu burec wiac moc mi bajuzemec.

⁴ “Go qâŋ qâqâtâc moc barâ mi bajuzemec, sambâŋko mecne mâreŋko mecne opâo mecne, mâreŋmaŋko mecne wiac forakac irec qâqâtâc moc mi bazemec. ⁵ Go wiac i araŋ bacnehuc kiŋaŋ moc mi qacnezemec; no Wofuŋ gore Anutu hâcne, no zoqac-nanehec. No qaisocnuenŋgopieŋ jaŋe kiŋjeŋicte okacne naru motec ŋosafâc-jeŋic bazu-jaŋe raekopac. ⁶ Â ŋic tausenŋ gurune gurune maŋzi zâficnuhuc dâŋnane reŋkeenŋgopieŋ jaŋe ine ehâmo-jaŋehuc juekopac.

⁷ “Wofuŋge Anutu ere zâŋe mi sipirickezemec, zâŋe-ticne sipirickeocmu ŋic e Wofuŋzi mi akick-eocmu.

⁸ “Sonda e tiri foote manasuzemec. ⁹ Go zoaŋ gie bapa 6 giege baku bafârezemec. ¹⁰ Zoaŋ namba 7 izi ine Wofuŋge Anutu ere hombaŋ ekac, irec zoaŋ ira gie moc mi bazemec, go mecne, ŋokâge mecne, otâge mecne, kiŋaŋ qaqaŋfâcge ŋic me ŋokac jaŋe mecne, bulimakaofâcge mecne erâ ŋic furunezi ficgao jukac e mecne. ¹¹ Wofuŋ e gie bapa 6 gie bahuc sambâŋ â mâreŋ â hâwec erâ maŋnao wiac forakac sasawa i bâfua-fârewec hâcne, zoaŋ namba 7 ira ine ŋemanawec. Irek Wofuŋ e sabata jambuŋkehuc furu muwec.

12 “Go neŋgoc mamac jahecge sâsec-jofazemec, Anutuzi mâreŋ râecguocmu ira dameŋ zora juhâc qâhâmocmurâ iŋuc hâcne ezemec.

13 “Go zika mi qazemec.

14 “Nowe ŋonâŋ ŋohe bebehec mi ezepirec.

15 “Go fiuc mi rozemec.

16 “Go ŋic âgoge micko âkec mi ecnezemec.

17 “Go ŋic jaŋere huhure wiac irec andac mi ezemec. Go ŋic âgofâcge jaŋere ŋokac me kiŋaŋ qaqaŋfâc-jeŋic ŋic me ŋokac me bec bulimakao me doŋgifâc-jeŋic me wiac-jeŋic i me i fojareekac irec andac mi ezemec.”

18 Ŋic ŋokac jaŋe sasawa quŋ parandaŋ â bâbâric â qeŋfânâŋ â tikizi hosâc qawec, wiac i sasawa hone manac erâ hâwic-jopame qarac qarac qambiŋ, ehuc taicko domambiŋ. 19 Erâ Mose âzâcnemiŋ: “Goki dâŋ nâzâtec mananzepeneŋ. Anutuzi ine dâŋ moc mi nâzâzejec, nâzâme hâmonziŋeŋ.” 20 Iŋuc mupie Mosezi ŋic ŋokac ziŋuc jazawec: “Mi hâwic-ŋopaoc, Anutu e ŋoŋerao fisijec i fuŋne-ŋeŋic bataniŋkeocte, erâ ere hâhâwiczi mai foŋareha sâqocne mi baniŋte.”

21 Eme ŋic ŋokac jaŋe taicko domahapie Mose e Anutuzi karorac qâfoŋne maŋŋao ŋewec karorac i ra bâqiŋkewec. 22 Ehamo Wofuŋzi Mose âzâcnerâ muwec: “Go Israe ŋicguru kecziŋuc jazac: ‘No sambâŋkonec dâŋ mupe hufâjec i ŋoŋe ŋaŋac hone manac embieŋ. 23 Irec nemu moc norao zuhuckehuc qâqâtâc-ticne siliwazi me golzi bapa i mi enzepieŋ. 24 Mâreŋzi alata banarenzepieŋ, erâ fainao qowi bâzi â wama bazi lama bulimakaofâc-ŋeŋic rikenarenzepieŋ. Noni mupe hae mâreŋ moc ira

me ira araŋ banareninŋmuo ine maic-ŋopahuc jambuŋ-ŋopapemu. ²⁵ Irec go qânâzi alata moc banarezo murâ ine qânâ fasaekicnezi mi bazemec, go aeŋ wiaczi qânâ he fasaec etecne omane eocmu hâcne. ²⁶ Go ririo fehuc alata-nane mi maickezemec, inŋuc etecne alata maŋfuŋnao mimige jaŋgeŋkezacte.’

21

Kiŋaŋ qaqa jaŋere sâcmutâc dân (Sâc 15:12–18)

¹ “Sâcmutâc dân kecziŋuc mutâcne-jarezemec:
² Go Hebiraiio kiŋaŋ qaqa ŋic moc furine bacmu ine kiŋaŋ qagarehuc juhame jara 6 tarazejec, jara namba 7 ira ine mâc râetec ra rambaŋ juzejec.
³ E bucticne warewecko buc jaha râetec ra juzejec, me ŋonâŋ-ticnehec warepicko ŋonâŋnehec mâmâc râec-jofatec ra juzepirec. ⁴ Me bomboŋ-ticnezi ŋokac moc râcneme naru motec rocjopaocmuo ine ŋokac mecne naru motec mecne jaŋe mâmâc bomboŋte biŋe ehapie ŋic e bucticne ra juzejec. ⁵ Me kiŋaŋŋiczi ziŋuc muocmu, ‘Maŋnanezi bomboŋ-nane mecne, ŋonâŋ naru motecfâc-nane mecne jaŋerao domakacte no buc-nane rambaŋ mi jupemu,’ ⁶ inŋuc mume bomboŋ-ticnezi Anuture maio râeme domazejec. Eme motâcko me motâc wâtunŋko râeme domaha bomboŋ-ticnezi hazecne bâmârâŋkezejec; inŋuc eme kiŋaŋ qaqa-ticne jusanaŋkezejec.

⁷ “Ŋic moc e otâ-ticnezi kiŋaŋ qaqa juocte man-asuhuc furire erâ qikiŋneocmu ine juku bomboŋ-ticnezi kiŋaŋ qaqa ŋic jaŋere sâcko râeme mi

razejec. ⁸ Me bombon-ticnezi e jahacne biņe qarâ juku ere takickeocmuo ine ñic moctao furire jaha râezejec. E ñic furune jaņerao furire râeocte mi manacnekicne, e eatuckewec irec. ⁹ Me ñokâ-ticnere biņe qaocmuo ine e jahacne otâfâc ejareekac sâc ijaha ecnezejec. ¹⁰ Ñokac moc zuhuckerâ roocmuo ine bâbâni rokiçne e nânâ me ñaqi qoruc me sahaç-ticne mi sakarecnezejec. ¹¹ Wiaç jahec â moc i mi ecneocmuo ine ñokaczi tofa mi bazucnehuc mâc beherâ rambaņ juzejec.

3ika qaqa ñic jaņere akadâņ

¹² “Ñic moczi moc ñic âgo-ticne moc qâhâmome e jahacne wâc qâhâmozo ¹³ Me hâmocne mâcne, zâpâ qaocte qame Anutuzi manaha hâmoocmuo ine zika qaqa ñic e mâreņ moc mutâcnepe ira sâcne wiserâ ra juzejec. ¹⁴ Me ñic moczi âgo-ticne somâckerâ ututuņ qâhâmoocmu e alata-nane maicke-bipieha sifu bârârietec hâmozejec.

¹⁵ “Ñic moczi neņgoc mamac jahec-ticne jofaocmu e wâc qâhâmozo.

¹⁶ “Ñic moczi âgo-ticne fiuc rorâ furi roocte ñic gâcne qikiņne-jareocmu me e jahacne kiņaņ qaqa juocte fiuc roocmu ñic iņucne hâmoocko râezo.

¹⁷ “Moc e neņgoc mamac jahec-ticne sâwec-jofaocmu e wâc hâmoocko râezo.

¹⁸ “Ñic jaņe dâņ mumuc ehuc moczi ñic âgo-ticne qânâzi me mehuhunzi heme mi hâhâmo mâc puriņ erâ ¹⁹ juku mocwâc biankerâ gunuo sâcne juocmuo ine zika qawec ñic e okac tâmiric juzejec. Mâc âgo-ticnere gie dameņ sipiricke-kicnere furine râcnezejec, ehuc dotazi erao gie baocte wâc furine mâmâc râezejec.

²⁰ “Njic moc e kiņaņ qaqa-ticne njic me njokac qaha qaha hâmoocmuo ine bâbâtiņko râezo. ²¹ Me kiņaņ qaqazi zoaņ 2 me 3 zuhuckerâ juocmu ine njic e bâbâtiņko mi râezo, e jahacne monenji kiņaņ qaqa furine bawec irec.

²² “Njic jaņe zika kosa qahuc njokac kiwechec moc qa hetuņ ecnepie kogoc hâmocne rome faicnao huc zâic mi fuacneocmuo ine njokac qa hetuņ ecnewec njic eki okacne monen râcneme tarazejec. Ine njokac njowenezi kogoc hâmocnere furi muocmu sâc râezejec, erâ i mumutara njic jaņe mutâcnehapie râezejec. ²³ Me huc zâic me hâmoc fuacneocmuo ine okacne njic e wâc hâmozejec, ²⁴ zâņere okacne zâņe jaha, micsiecte okacne micsiec jaha, mere okacne me jaha, kikere okacne kike jaha, ²⁵ zocte okacne zoc jaha, wicte okacne wic jaha, zâpâre okacne zâpâ jaha râezemec.

²⁶ “Njic moczi kiņaņ qaqa-ticne njic me njokac zâņenao qahuc zâņe-ticne sipirickeocmuo ine zâņe-ticnere erâ mâc râeme ra rambaņ juzejec. ²⁷ Me kiņaņ qaqa-ticne njic me njokac ere micsiec moc hemârâņkeme wahaocmuo ine micsiec-ticnere erâ mâc râeme rambaņ juzejec.

Qowizi njic hehâmoocmu irec sâcmutâc

²⁸ “Bulimakao moczi njic me njokac moc zuņenezi heme hâmome bulimakao e qânâzi hehâmorâ biuc-ticne mi nânzepieņ, bulimakao rune ine okacnere mi mucnezo. ²⁹ Me bulimakao e zuņenezi njic hecjopaku biac maņņe eha rune uņdâņ âzâcnepie mana-bipiehuc mi soņaņkeha njic me njokac moc hehâmome ine bulimakao qânâzi hehâmorâ rune mâmâc qâhâmonzepieņ.

³⁰ Me moneŋzi juju-ticne kitâcneocte mucnepie ine jaŋe juju-ticnere okacne moneŋ zare muninŋmu sâc râezejec. ³¹ Me ȋic mocte naru me motec moc hehâmooomuo ine sâc ijaha ecnezo. ³² Kiŋaŋ qaqa ȋic me ȋokac moc hehâmooomuo ine bulimakao runezi kiŋaŋ qaqaare bombon siliwa moneŋ ³⁰ râcnezejec, bulimakao ine qânâzi hehâmozo.

³³ “ȋic moczi nombânŋ beheme aaŋ foocmu me nombânŋ rorâ mi qofackeme bulimakao me doŋgi moczi huocmuo ³⁴ ine nombânŋ runezi okacne râezejec, ine qowi rune moneŋ hâcne râcnezejec, â qowi hâmocne izi nombânŋ rune e jahacne biŋe ezejec.

³⁵ “ȋic mocte bulimakaozi ȋic mocte bulimakao heme hâmoocmuo ine bulimakao qârícne juocmu e râepie moneŋ kitâcneme moneŋ i sâckoa bâtâc bazepirec, â bulimakao hâmocne i hezurâ inŋuc jaha bârâwiŋnezepirec. ³⁶ Me bulimakao e râŋgeŋne, runezi fuŋne-ticne inŋuc biac juwicnao manarâ sifu mana-bipiehuc sapao mi râewecko ine bulimakao hâmocnere okacne bulimakao jaha râezejec, â hâmocnezi e jahacne biŋe ezejec.

22

Wiac sasawa sâqore sifuc eme okac babazure sâcmutâc

¹ “ȋic moczi bulimakao me lama moc fiuc rorâ qa nâc eocmu me furire râeocmu ine bulimakaore okacne bulimakao 5 â lamare okacne lama 4 inŋuc râezejec. ² Fiuc roro e fiuc rohuc juhame jaha runezi bâfuarâ qâhâmooomuo ine zika qahuc

kiŋ bâfuawec mi mucnezo. ³ Me fiuc roro biac mi qâhâmohuc ŋafe moc huckehuc qâhâmoocmuo ine zika qahuc kiŋ bâfuawec muzo. Fiuc ro-rozi okacne râe-jâmbânkezejec, mi focnekacko ine wiac fiuc rowec irec okacne e jahacne ŋic gâcne qikiŋne-jarehuc furi ronzepieŋ. ⁴ Qowi fiuc rokiŋne, bulimakao me lama me doŋgi i qâricne jaha juha bâfuaniŋmuo ine bârisiehuc e jahacnaonec moc zuhuckezejec.

⁵ “Me ŋic moczi qowifâcne seacko me waiŋ gieo nânâ nâniŋte râec-jopame rambaŋ juku âgo-ticnere gieo razirâ nânâ wiac sipirickeniŋmu irec okacne ine e jahacne gieonec â waiŋkonec wiac bianeŋ jâmbân râezejec.

⁶ “Me ŋic moczi gieo zoc râeme za fofotâc raku nâŋ gagate rohuc padi qa râec ekicne me gieo doma rakac me gieo wiac gâcne gâcne zafâreocmuo ine zoc râeme zawec eki okacne bazu-fârezejec.

⁷ “Me ŋic moc e moneŋ me mafa wiac gâcne i ŋic âgo-ticnezi soŋaŋkecneocte râcneme râeme foha ere fickonec fiuc ropie zâhec fiuc roro bâfuaniŋmuo ecniepie bârisiehuc e jahacnaonec irec sâc jaha zuhuckerâ râezejec. ⁸ Fiuc roro mi bâfuaniŋmuo ine fic runezi âgo-ticnere wiac fiuc rowec me mâcne irec fuŋne taniŋkeocte Anuture maio fuarâ fuŋne-ticne muzejec.

⁹ “Me ŋic moczi ŋic âgo-ticne qorickehuc buli-makaore me doŋgire me lamare me ŋaqi qoructe me wiac irec me irec, ‘Ine hâcne nore,’ iŋuc muhuc hehefaric epire mâmâc jaha Anuture maio râec-jofazo. Eme Anutu e ere me ere fuŋne

bataniņkeocmu ȋic e hâcne âgo-ticne okacne bafehuc râcnezejec.

¹⁰ “Me ȋic moc e âgo-ticne donġi me bulimakao me lama me qowi moc soņanġecneocte râcneocmu, eme qowi izi hâmoocmu me puriņeocmu me ȋic moczi mi honehuc mocko ro bawiseniņmuo ine ¹¹ ȋic jajahec jahe Anuture maio mumupaņ dâņ muzepirec. Eme ȋic e âgo-ticnere wiac fiuc roocte meticne sicnewec me mâcne irec fuņne taniņkezejec. Eme qowi runezi mumupaņte maname fârine eha okacnere mi muzejec. ¹² Fiuc rowecko ine fiuc rorozi rune okacne bazucnezejec. ¹³ Me qowi mimicnezi kisuckembiņko ine qâņqâņne ro bafisime fuņne taniņkezejec, eme qowi kisuckekicnere okacne râeocte mi muzo.

¹⁴ “Me ȋic moczi âgo-ticnere qowi moc gie sawa bacneocte bajuha kikene bazuocmuo me runezi mi honeha hâmoocmuo ine okacne furu jaha bazucnezejec. ¹⁵ Me runezi honeha hâmoocmuo ine okacne râeocte mi muzo. Qanaņ qowire gie furi râewecko ine gie furizi okacne ezejec.

Juju â eebapa ġâcnere sâcmutâc

¹⁶ “Me ȋic moczi naru ȋokac moc ȋicbiņe tâmiric juha eatuckehuc bâsâqoreocmuo ine ȋokac furi furu jaha râerâ ȋonâņ-ticne bazejec. ¹⁷ Mamac-ticnezi mi râcnehuc sakare-jâmbânġeocmu ine ȋokac zeņoņte furi fehuc roeņgopieņ irec sâcko jâmbânġeocmu.

¹⁸ “ȋokac hafec bapa e manacnetec mi juzejec.

¹⁹ “ȋic moczi qowihec sâqocne baocmu e hâmo-jâmbânġeocmu.

20 “Njic moczi Anutu sawa mâcne, nemu gâcne wâc bâzi rike-jareocmu e bâsirowezo.

21 “Njone njic jaba moc wiac sâctiri mi ec-nenzepienj â gie bapare faficne wâc boc mi ec-nezo, njanac wâc Aigita mârenjko jaba jumbinj irec.

22 Njone hozec bekâ jaje mi bomac-jopanzepienj.

23 Bomac-jopapie wira wâwâsic enarepie manarâ mana-jare-jâmbânjkepemu, 24 ehuc kimben-nanere zocbârurjzi zâsenj-njopapemu â zika-nanezi qâhâmoc-njopape njonânjfac-njenjic hozec erâ juninjmu, â naru motecfac-njenjic mamac tâmiric erâ juninjmu.

25 “Go njicfac-nane janjeraonec moczi hapetac erâ gohec juekac e monej moc râcnecmuo i juku okacne bafehuc gareocte mi muzemec, â monej nâfocne zuhucke-gareocte wâc mi muzemec.

26 Me go monejte okacne âgogere njaji rocmuo ine zoanji mi huha mocwâc bârisiecnezemec.

27 Wiac izi mocjaha rurufa-ticne hâcne, izi hâcne sahad-ticnere foj, i tâmiric ine wemo wiac rufarâ guj foocmu? E no wira wâwâsic enareocmuo manacnepemu, no buuruc-nanehec hâcne.

28 “Go Anutu mi musorinjkezemec, erâ wâc njicfacge janjere njicwofuj mi sâweckezemec.

29 “Nânâ mâririge â wainj mâririge irecnec gâcne tahare binje mi sakarehuc afeckerâ râzemec. Mârâc njokâge ine nore binje qazemec.

30 Bulimakao â lamafâcge janjere mârâc fufua injuc jaha ezemec, i nenjocnehec juha zoan 7 tarazejec, zoan namba 8 ira ine no narezemec.

31 “Njone njic tirine junarenzepienj, ehuc gieo qowi kisuckekicne irec biucne i mi nânâ qâto

behe-jarenzepien.

23

Mumutiņ gie bahuc ņic wiac sâckoa ejarezo irec sâcmutâc

¹ “Go micko âkec mi ezemec. Go ņic sâqoc qaqocne hehesic-ticnere mi bafickehuc eebapa-ticnere fuņne mutaniņkezemec. ² Go ņic guru sâko jaņe sâqocne bazo mupie mi qâtec-jopazemec, erâ dâņficko ņic guru sâko jaņere hata hehesicne âtehuc dâņ tiņne mi muhasickezemec. ³ Me ņic fekicne mocte dâņ fuame fuņne-ticne mi hesoņkezemec.

⁴ “Kisâgere bulimakao me doņgi qâsorierâ juha bâfuacmuo ine runerao bârisie-jâmbâņkezemec. ⁵ Qaisocgweekac ere doņgi e mafa-ticnezi ki-dapeme foha hone qâoma mi ehuc fahareocte bafickezemec.

⁶ “Go ņic waha qaqanezi dâņgie bahuc juhame dâņticne mi muhasickezemec. ⁷ Go ņic qorickehuc dâņko rârâe i mi ezemec, erâ ņic kiņ bahac tâmiric hâmoocte mi mutaracnezemec, no ņic kiņ bahachec mi akickepemu irec. ⁸ Go micmuacte furi mi rozemec, micmuacte furizi dâņ mumu ņic zâņe sâoc ejareekac â kiņ tâmiric juengopien jaņere dâņ muhasickeekac.

⁹ “ņic jabane moc mi bomackenzepien, ņoņe ņaņac Aigita mâreņko jaba jumbiņte jaba jujure fuņne manaengopien hâcne.

Sabata jara hombaņ irec sâcmutâc

¹⁰ “Go giegao nânâ wiac sara mama erâ fârine qa roro ehuc juhaņte jara 6 tarazejec. ¹¹ Jara

namba 7 ira ine mâc behetec foha hapetac gurufâcge jaŋe ro nâc epie tiwâne fome kâte qowi jaŋe nâfârenzepieŋ. Waiŋ giegere â oliwa giegere sâc ijaha ezemec.

¹² “Go zoaŋ gie bapa 6 giege bahuc juzemec, zoaŋ namba 7 ira ine ŋemanazemec, i dongi bulimakaofâcge jaŋe ŋemananiŋte â kiŋaŋ narugere ŋokâ â ŋic jabane figao juengopieŋ jaŋe wâc âke mâteŋ-jopaocte iŋuc ezemec. ¹³ Dâŋ ŋazapo i sasawa aimuŋ bajuhuc junzepieŋ. Nemu gâcne jaŋere zâŋe mu bâuac mi enzepieŋ, erâ zâŋe wiac iŋucne micŋenjikonec moc mi wahazejec.

Hombaŋ jahec â moc ŋeniŋte mutâcne-jarekicne

(Wah 34:18–26; Sâc 16:1–17)

¹⁴ “Jara mocte maŋnao nore hombaŋ ŋepie arec jahec â moc ezejec. ¹⁵ Ŋoŋe goreŋ sowa hombaŋ ŋenzepieŋ, ine noni muŋarepo irec sâcko goreŋ sowa juhapie zoaŋ 7 tarazejec, erâ dameŋ bakicne, mosa April ira iŋuc enzepieŋ; ŋoŋe mosa ira hâcne Aigita mârenkonec wahambiŋ. Irec moczi nore maio metariŋ mi fisizejec. ¹⁶ Hombaŋ moc ine nânâ bâbâsu hombaŋ ŋenzepieŋ, gieo nânâ sara mama embiŋ irec fârine bâbâni rorore hombaŋ hâcne. Erâ qa roro hombaŋ ŋenzepieŋ wâc. Ira hâcne gie-ŋenjicte fârine gieonec ro qâzuc eenkopieŋ. ¹⁷ Ŋic sasawa ŋoŋe jara mocte maŋnao Wofuŋ Anuture maio arec jahec â moc fuanzepieŋ.

¹⁸ “Qowi bâzi-nanere soc i poroŋ goreŋhec mi rikezemec, erâ tiwâ bâzi-nanere wokemaŋ irec tiwâne foha hae mi furezejec.

19 “Gieonec nânâ bâbâsu bianje jâmbân i Wofun Anutugere ufunjo bafezemec. Go lama motec nenjocnere susuhec mi rikezemec.

Wofunje anjelezi Israe njic bânje-jareocte mukicne

20 “Manakic, no anjele moc sorepe bânje-garehuc hatao roroj sasapoc egarerâ hae mârenj bâzâwe-garepo ira râecguzejec. 21 Go ere maio aimunjuhuc dânticne mana rerenj ezemec. Go mi rânjenjkeczemec, e zânje-nane mankerâ bajukacte qaqtara-nenjic mi bânâmire-nareocmu.

22 “Nje dânticne mana rerenj ejâmbânkehuc no dâj mukopac sâc efâreninmuo ine no râsifâc-nenjic janje râsi ejarepemu â kisâfâc-nenjic janje fific gugurinj ejarepemu.

23 “Anjele-nanezi bânje-garehuc Amori njic â Hitinjc â Perizi njic â Kanaan njic â Hiwinjc â Jebusi njic janjere mârenjko râecguhame no janje bâsirowec-jopapemu. 24 Go janjere nemu wiac fodape-jarerâ aran mi bajarezemec, â eebapajenjicte sâcko wiac moc mi ezemec, aricne, go qânj qâqâtâc-nenjic hetâc qâtâtiehuc qânâ wâtu-nenjic i wâc henzanj qanzanjen-fârezemec. 25 Nje Wofun Anutu-nenjic no kinanjan qanarenjepien, eme no poroj â opâ-nenjic jambunkehuc njonden-nenjickonec huc zâic-nenjic bânâriepemu.

26 Njokac moczi moc kogoc hâmocne roro me hufinje juju mâsi injucne mârenj-nenjicko moc mi fuaocmu. Noni hâcne juju-nenjicte damen mutâcnepe ferinj waharinj mi ezejec.

27 No wiac bipinehec mupe bânje-nareme njic gurune gurune bâfuac-jopaninmu sâc

jaņe maņ bāsifuc ejarepemu â rāsifâc-ņejic sasawa jaņe ejarepe râpec-ņopaniņmu. ²⁸ Erâ no bitu gâpâc mupe fuarâ bânîe-ņarehuc Hiwiņic â Kanaan ņic â Hitiņic ņoņere maionec jâpec-jopame wisenzepieņ. ²⁹ No jara mocjaha irec maņnao ņoņeraonec jâpec-jopape mi wiseniņmu, iņuc epe mâreņzi tuhu foha qowi mimicnezi sawe mâririackerâ râsi eņareņzipiņte. ³⁰ No dameņ sâc âketâc âketâc jâpec-jopahuc juhape ņoņe sawe mâririackerâ mâreņ raucke-fârerâ junzepieņ. ³¹ Eme no mâreņ-ņejicte ma i Hâwec Bâbâroņkonec fuņkerâ raku Filisa ņic jaņere hâwecko râepe mickezejec, erâ wâc mâreņ burocnaonec fuņkerâ raku Eufрата opâo tarazejec, no mâreņ rune jaņe ņoņere meo râec-jopape jâpec-jopapie ņoņeraonec wisenzepieņ hâcne. ³² Ⱥoņe jaņehc me nemufâc-ņejic jaņehc zâzâfic moc mi enzepieņ. ³³ Jaņe ņoņere mâreņko zuhuckerâ mi junzepieņ, ira juku sâqocnere mu qafeņ eņarepie behecnunzipiņte; ņoņe nemufâc-ņejic kiņaņ qajareniņmuo ine izi wiwitic-ņejic jâmbâņ eocmu hâcne.”

24

3âzâfic fuawec

¹ Eme Wofuņzi Mose kecziņuc âzâcnewec: “Go Aroņ â Nadaba â Abihu erâ Israe micne bapa 70 jaņehc Wofuņ norao wefuzemec, erâ taic domahuc fodape-nareņzepieņ. ² Ehame Mose go bucce no maicnuhaņ jaņe bembenķo mi

warenzepien, â ñic ñokac jañe ine gohec moc mi wefu-jâmbânkenzepien.”

³ Inuc mume Mose e jañerao luarâ Wofunje dân â mumutâc jaza-fârewec. Eme ñic ñokac jañe musereckehuc mumbiñ: “Wofunzi dân muwec i sasawa efârenañmu.” ⁴ Eme Mose e Wofunje dân sasawa qârenke-fârewec. Erâ furic uupicte faharerâ tiki funnao alata moc bawec, ehuc Israe ñicguru 12 irec sâc qânâ wâtun 12 jaha âkendânnewec. ⁵ Inuc erâ Israe ñic socqâri jañe jaza sosec eme qowi bâzi rikembiñ â bulimakao hezurâ wama bubian bâzi rikembiñ wâc. ⁶ Eme Mose e soc gâcne rorâ râqâcko honkeme huwec â gâcne ine alata faio tiwec. ⁷ Inuc erâ zâzâficte papia rorâ ñic ñokac wose-jarewec, eme jañe mumbiñ: “Wofunzi dân muwec i sasawa mana reren efârenzepeneñ.” ⁸ Inuc mupie Mosezi soc rorâ ñic tie-jarerâ muwec: “Dân mukicne sasawa irec sâcko Wofunzi ñoñehc zâzâfic ewec irec soc zine hâcne.”

⁹ Eme Mose â Aroñ â Nadaba â Abihu erâ Israe micne bapa 70 jañe tikio fembiñ. ¹⁰ Ferâ Israe ñic jañere Anutu kecziñuc honembiñ: Kike-ticnere ââtesin i qânâ furi sâko â sambân hawari inucne tatamac jâmbân. ¹¹ Eme e meticnezi Israe ñic kâcqene mi jopawec, aricne, jañe Anuture maio domahuc nânâ opâ nâmbiñ.

Mosezi Sinai tikio fewec

¹² Wofunzi Mose âzâcnewec: “Go norao tikio wefurâ woñec juc, eme no ñic jañe jaza qazuc ecmurâ sâcmutâc dân â Sâcmutâc Sanañ qorac tapao qârenkepo i garezepac.” ¹³ Eme

Mose e kiñaññic-ticne Josua ehéc zavierâ Anu-
ture tikio fepic. ¹⁴ Micne bapa jañe ine
ziñuc jazawec: “Ñoñe zira woñec ñehapie risie-
ñarezeperec. Manañgopieñ, Aron â Huru jahe
ñoñehéc jukopirec, irec moc e dâñ moc bajukacko
jaherao razejec.”

¹⁵ Eme Mose e tikio feme karoraczi tiki
foñkewec. ¹⁶ Ehame Wofunje tatamaczi Sinai tiki
botâñnao waha ñesanañkewec. Eme karoraczi
tiki foñkerâ foha zoañ 6 tarawec, zoañ 7 ira ine
Wofunzi karorac mañkonec Mose wiracnewec.
¹⁷ Wofunje tatamac fuawec i Israe ñicguru jañere
zâñe faio zoc iñucne tiki botâñnao fuawec. ¹⁸ Eme
Mose e karorac mañko razirâ tikio fewec. Ferâ
juhame ñafe zoañ 40 tarawec.

25

Tiri boze bapare sâcmutâc (Wah 35:4–9)

¹ Eme Wofunzi Mose kecziñuc âzâcnerâ muwec:
² “Go Israe ñicguru jañe taha wiac râe-nareninje
jazazemec. Râeninje mañjenic afeckeekac ñic
i jañeraonec sasawa nore taha ronzepeñ.
³ Jañeraonec tahare wiac kecziñuc ronzepeñ:
Gol, siliwa, aeñ bâbâron, ⁴ qoruc furi sâko
keñkeñe â âmuc âmucne, qoruc hahameñe
â noniñ kanzañe, ⁵ lama ñicnere sahad peñ
bâbâronzi rikekicne, noniñ sahad â jâminjâc,
⁶ lambere wokemañ, rurua wokemañte â hosâc
âsu ririkere wiac âsu bianhec. ⁷ Erâ taha bapare
qoqonañ ñaqi â qâticnere qânâ furi sâko bâbâron
â qânâ furi sâko gâcne gâcne. ⁸ Eme jañe furufic

moc banarepie no nonden-jenicko nec juc ezepac.
 9 No tiri boze â maṅnao wiac ṅeraocmu hawarine
 gowatupemu irec sâcko jâmbân bafârenzepienj.

Qorac tapa katapa bapare sâcmutâc
(Wah 37:1–9)

10 “Eme jaṅe jâmiṅjâczi katapa moc banzepienj,
 zoricne- ticnere sâc kubi* jajahec â nâfocne,
 otecne- ticnere sâc kubi mocjaha â nâfocne
 â hâṅne-ticnere sâc kubi mocjaha â nâfocne
 jaha. 11 Eme maṅne â saḥacne gol qaḥacnezi
 foṅkezemec, erâ qaṅeṅne moc golzia râreckerâ
 bazemec. 12 Erâ reṅ rarazi 4 golzi barâ kat-
 apa kikenao basanaṅkezemec, ine ṅifec jajahec â
 ṅifec jajahec. 13 Erâ jâmiṅzi reṅ jajahec fasaerâ
 golzi foṅkezemec wâc. 14 Eme katapa reṅkeniṅte
 reṅ i katapa ṅifecnao reṅ rarazi basanaṅkekicnao
 esorietec razizejec. 15 Eme reṅ i moc mi un-
 uckehuc katapahec jaha behemie fozejec. 16 Erâ
 sâcmutâc dâṅ garepemu i katapa maṅko râetec
 hurâ fozejec. 17 Inuc efârerâ golzi tapane moc
 bazemec, zoricne-ticne kubi jajahec â nâfocne
 â otecne ine kubi mocjaha â nâfocne. 18 Erâ
 go kerubim hawari jajahec golzia bazemec, gol
 hedapirekicnezi hâcne tapanere qaṅeṅnao baze-
 mec. 19 Kerubim hawari moc ṅifec â moc
 ṅifec inuc râec-jofatec jahe tapanehc qâfâsâehuc
 qaṅeṅne ṅifec â ṅifec ṅezepirec. 20 Eme kerubim
 jahe mamaic erâ ṅehuc fakec-jekic tapa hezick-
 ehuc faicpec qaratiepire domazejec, ehame zâṅe
 mai-jenic tapanopec enduṅkezepirec. 21 Go tapane

* **25:10:** 1 kubi sâcmeta moc 18 inses me 46 senti meta irec sâc.

katapa fainao hetec ñezejec â katapa mañnao ine sâcmutâc garepemu i râetec hurâ fozejec. ²² Eme gohec ira bâbâfuac enacmu, erâ kerubim tapa fainao ñekopirec jahere ñondenko domahuc dân gazapemu sasawa i Israe ñicguru jaza mutâc ezemec.

*Poronj furu mukicne tebo-ticnere sâcmutâc
(Wah 37:10–16)*

²³ “Eme go jâmiñzi tebo moc bazemec, zoricne-ticnere sâc kubi jajahec â otecne-ticnere sâc kubi mocjaha â hânñere sâc kubi mocjaha â nâfocne. ²⁴ Erâ gol qaqaçnezi fonkerâ mecqañeñne rârec rârec ine gol qâfonjezi bazemec. ²⁵ Erâ tebo rârec rârec qañeñne moc metapere sâc, â irec qañeñne moc golzi ba akic ekicne i mâmâc râezemec. ²⁶ Erâ irec reñ raraži 4 golzia barâ gurucne 4 kikene fokacko basanañkezemec. ²⁷ Reñ raraži ine qañeñnere heririñko jâmbân domazejec. ²⁸ Go reñ i jâmiñzi fasaerâ golzi qorockezemec, eme reñ izi hâcne katapa reñkezo. ²⁹ Eme go taha wiac rârâere oto â amae â waiñ bâzire kiruñ â râqâc kâwinehec bazemec wâc, i gol qaqaçnezia ba akic ehuc bazemec. ³⁰ Erâ go tebo ira poronj furu mukicne i damen sâc nore maio râetec fozejec.

*Lambe dodoma irec sâcmutâc
(Wah 37:17–24)*

³¹ “Lambe dodoma i gol qaqaçnezia bazemec. Kikene â wâtunje i gol hedapirekicnezi bazo, â râqâc-ticne erinehec â zariñ qoñnehec i gol hâcbuczia bazemec. ³² Eme wâtunjkonec sohocne 6 râwiñnerâ domanzepien, ñifec sohocne jahec â moc â ñifec sohocne jahec â moc

jaha. ³³ Erâ wawec kaonje qonjehec injucne zarij qonje jahec â moc sohocne njfec â njfec ira bazemec; lambe dodomare wâtuŋkonec sohocne 6 râwiŋnerâ domaŋgopienj ira injuc hâcne bafârezemec. ³⁴ Erâ lambe dodomare wâtuŋko zarij qonjehec injucne 4 râezemec. ³⁵ Ine zinjuc bahuc râezemec; zarij qonjehec sohocne moc biri wâŋ irec juwicnao, moc biri 2 irec juwicnao, moc biri 3 irec juwicnao, injuc hâcne ehuc sohocne 6 njfec â njfec râwiŋnerâ domaŋgopienjkoa râe razemec. ³⁶ Sohocne â zarij qonjehec i qâfâsâerâ fozejec, ehame gol qaqaçne hedapirekicnezi bazemec. ³⁷ Erâ go lambe-ticne 7 bazemec, eme lambe i fainao hetec njhuc wiac mamai fokac i batamae-fârezejec. ³⁸ Lambe qoruc bâbâtâc â râqâc-ticne i gol qaqaçnezia bazo. ³⁹ Gol bâwiŋke-hâmokicne njemâc-ticne 100 izi lambe dodoma â wiac i sasawa bazo hâcne. ⁴⁰ Erâ manakic, tikio hawarine gaza gowatuc epemu irec sâcko jâmbânj bafârezemec.

26

Tiri bozere dân (Wah 36:8–38)

¹ “Tiri boze i qoruc sanaj 10 izi bazemec, ine qoruc fâfâsâc â âmuc âmucne â bâbâronj furi sâko â keŋkeŋne izi bazemec, ehuc qoruc i mutec qâreŋnehec fupie kerubim hawari fuazejec. ² Qoruc sanaj moc zoricne-ticnere sâc i kubi 28 â otecne-ticne kubi 4 injuc efârezejec. Qoruc sanaj 10 i sasawa sâc ijaha bafârezo. ³ Njfec qoruc 5 zuzuhuc ezo â njfec qoruc 5 injuc

jaha zuzuhuc ezo. ⁴ Erâ qoruc sanan mocte qanɛɛnao jâmbân qoruc kenkenɛzi zâzâfickere muc barâ râezemec, erâ qoruc sanan mocte qanɛɛnao jâmbân ijaha ezemec. ⁵ Qoruc moc zâzâfickere muc 50 â qoruc moc zâzâfickere muc 50 jaha qoruc qanɛɛnao basanankezemec, zâzâfickere muc i qoruc ɲifec â ɲifec sâckoa forazejec. ⁶ Eme go heheawic-ticne 50 golzi bazemec, erâ heheawic izi qoruc zâficketec tiri boze mocjaha fuazejec.

⁷ “Erâ noniɲ kanzanɛzi qoruc moc barâ tiri boze fainao râetec forazejec, qoruc inucne 11 bazemec. ⁸ Qoruc buc buc i zoricne-ticnere sâc kubi 30 â otecnere sâc kubi 4 ezejec, qoruc 11 janere sâc mocjaha fuazejec. ⁹ Eme qoruc 5 jaje moc buc zâfic-jopazemec, erâ qoruc 6 jaje inuc jaha moc buc zâfic-jopazemec, erâ qoruc namba 6 i ine qazurâ qoruc boze mamai râetec faio fefec fozejec. ¹⁰ Zâzâfickere muc 50 i qoruc qanɛɛnao fokac irec mecnao râe razemec â zâzâfickere muc 50 jaha i qoruc zuhucke itic ekicne irec qanɛɛnao râe razemec. ¹¹ Erâ go heheawic-ticne 50 aen bâbâronzi barâ zâzâfic-ticnao esoriezeme, inuc ehuctecne qoruc zâficketec mocjaha ezejec. ¹² Eme qoruc bozere qoruc tofane foomu, qoruc nâfocne hâcne, i tiri boze râpenao behapie waha domazejec. ¹³ Erâ qoruc zoricnere tofane i ɲifec kubi mocjaha â ɲifec kubi mocjaha jaha waha domahuc tiri boze sâockezejec. ¹⁴ Wiac i batec tarame qoruc boze bupunere qofac moc noniɲ kanzanɛ peɲ bâbâronzi rikekicne izi barâ râezemec, erâ fainao sâsâoc moc lama ɲicnere

sahaczi barâ qârufacnetec fozejec.

¹⁵ “Tarame tiri bozere katapa fasaezemec, ine jâmiñzi fasaerâ hâñ âecketec safatarin inucne domazejec. ¹⁶ Katapa zoricnere sâc kubi 10 â otecnere sâc kubi moc â nâfocne. ¹⁷ Katapa sasawa baren-jenic jajahec jajahec inuc bazo, i zuzuhuc eniñte tiri boze katapa-ticnere inuc hâcne efârezo. ¹⁸ Katapa zare-ticne ine zinuc fuazejec: Sâpe juwic mârenkopec ira katapa 20 âeckezo; ¹⁹ erâ rurumañnao râqâc siliwazi bakicne 40 hetec ñezejec, katapa mocte râqâc jajahec, katapa mocte jajahec, inuc hetec sâcke-fârezejec. ²⁰ Eme sâpe faic mârenkopec inuc jaha katapa 20 âeckezemec; ²¹ ehuc râqâc-ticne 40 i siliwazia bazo, katapa mocte râqâc jajahec, katapa mocte jajahec jaha. ²² Sâpe 3oañ huhunaopec, fic râpenao hâcne, ira ine katapa 6 fasaerâ âeckezemec. ²³ Erâ fic râpenere gurucko katapa jajahec âeckezemec. ²⁴ Eme katapa i juwic rârâwiñ domahuc feku faic honenñ micne foocmuo iitic ezepirec. Nifec â ñifec inuc hâcne domapire gurucne fuazejec. ²⁵ Katapa 8 jañe hâcne râqâc-jenic siliwazi bakicne inuc doma ranzepiñ, katapa mocte râqâc jajahec, mocte jajahec, inuc ñerapie râqâc 16 ezejec.

²⁶ “Erâ go babasanañ-ticne jâmiñjâczi bazemec. ²⁷ Babasanañ 5 tiri boze nençoc ñifecte biñe â 5 izi tiri boze nençoc ñifecte biñe, â babasanañ 5 izi ine tiri bozere sâpe râpene, 3oañ huhunaopec fokac irec biñe. ²⁸ Babasanañ zâzâñiñko fokac izi katapa ombâñnao ñifeckonec

ware raku ñifecko tarazejec. ²⁹ Katapa sawa ine golzi qorocezemec, erâ babasanañte rarazi i golzia bazemec, â babasanañ i wâc inuç jaha golzi qorocezemec. ³⁰ Go inuç ehuctecne tiri bozere hawari tikio gowatukicne irec sâcko âkendâñnezemec.

³¹ “Erâ zuhuckerâ qoruc furi sâko kenkenne â âmuc âmucne â bâbâronñ fâfâsâc izi ââketâc moc bazemec, ehuc mutec qoruc i qâreñnehec fupie kerubim hawari fuazejec. ³² Erâ qoruc ââketâc i jâmiñ wâtunñ 4 golzi qorocekicne â heheawic-ticne golzia bakicne ira qetickezemec, jâmiñ wâtunñzi ine râqâc siliwazi bakicne irec faio domazejec. ³³ Erâ qoruc ââketâc i heheawic juwicnao fifitaczi basanañketec waha domazejec, ehame qoruc ââketâc râpenao qorac tapa katapa hetec ñezejec; eme qoruc ââketâczi hâcne furufic â furu dindiñ irec aka domazejec. ³⁴ Go mutaniñ katapa furu dindiñko ñekac irec fainao tapane hetec ñezejec. ³⁵ Erâ tebo i ââketâc sahacnao hetec ñeha lambe wâtunñne tiri boze juwic mârenkopec tebo ñifecnao domazejec, tebozi ine faic mârenkopec hetec ñezejec.

³⁶ “Qoruc bozeo rarazire motâc moc i qoruc furi sâko kenkenne â bâbâronñ, qoruc fâfâsâc izi bazemec, qoruc geronkeñgopienñ irec sâc hâcne. ³⁷ Ââketâcte qoruc irec jâmiñ wâtunñ 5 fasaerâ golzi qorocezemec, â qequetic-ticne i golzia bazo erâ wâtunñte râqâc 5 jaha i aenñ bâbâronñzi ba akic ehuc bazemec.

Qowi bâzi ririkere alata
(Wah 38:1–7)

¹ “Go alata jâminjâczi bazemec, zoricne-ticnere sâc 5 kubi otecne-ticnere sâc 5 kubi jaha, sâckoa fozejec hâcne, erâ hânne-ticnere sâc kubi 3. ² Faic gurucne 4 ira zuņene 4 fasaerâ râezemec, eme zuņenezi alatahec qâfâsâzejec. Eme alata aenj bâbâronzi fonkezemec. ³ Wokemaņ wiac alatao bohotame zure bataniņ ezo â zafe-ticne hezuzo irec kuzi pake wiac barâ sapac â titie râqâc â sarac â zocrâqâc wiac mâmâc bazemec, erâ wiac sasawa i aenj bâbâronzi bafârezemec. ⁴ Erâ go sapa-ticne moc aenj bâbâronzia bazemec â sapare gurucne 4 ira aenj bâbâronzi reņ rarazi 4 jaha barâ basanaņkezemec. ⁵ Eme sapa i alatare qaņeņne rurumaņnao âke hotahuc alata ombânnao wefu mickezejec. ⁶ Erâ alatare reņ i jâminzia fasaerâ aenj bâbâronzi qorockezemec. ⁷ Eme reņ i reņ rarazinao esoriepie razizejec, eme reņ i alata ņifec â ņifec fohame reņke ranzepieņ. ⁸ Eme go alata hâcbuc mâcne, tikio gaza gowatuc ekicne irec sâcko katapazi maņnehec bazemec.

Tiri bozere hae zoņa
(Wah 38:9–20)

⁹ “Go tiri boze hae zoņa-ticne bazemec wâc. Juwic mâreņkopec ira qoruc fâfâsâc qetickepie waha domazejec, ņifec zoric-ticnere sâc kubi 100. ¹⁰ Wâtun-ticne 20 â wâtunte râqâc 20 jaha aenj bâbâronzi bazo, erâ heheawic â qârârâc-ticne i siliwazi bazo. ¹¹ Faic mâreņkopec inuc jaha qoruc zoricne jaha domazejec, zoricne-ticnere sâc kubi 100 jaha; erâ wâtun 20 â râqâc-ticne

20 jaha aej bâbâronzi bazo, qârârâc-ticne ine siliwazi bazo. ¹² Â otecne-ticne zoaņ huhunaopec ira ine qoruc moc zoricne-ticnere sâc kubi 50 izi waha domazejec, wâtun-ticne ine 10, erâ wâtunte râqâc 10 jaha wâc râezo. ¹³ Hae zoņare otecne zoaņ wewefunaopec izi kubi 50 jaha ezejec. ¹⁴ Motâc ņifecnere qoruc i kubi 15 â wâtun-ticne 3 â wâtunte râqâc 3 jaha wâc, iņuc hâcne fuazejec. ¹⁵ Â motâc ņifecnere qoruc i kubi 15 jaha, erâ wâtun-ticne 3 â wâtunte râqâc 3 jaha wâc ņezejec. ¹⁶ Sacmotâc sâko irec qoruc kubi 20 irec sâc, erâ qoruc i qoruc fâfâsâc kenkenne, âmuc âmucne â bâbâron erâ eri qâreņ-ticnehec bazo. Wâtun-ticne 4 â wâtunte râqâc 4 jaha râezo. ¹⁷ Wâtun sasawa sac râreckehuc domaniņmu jaņe siliwazi qoroc-jopazo, â heheawic-jenic i siliwazia â râqâc-jenic ine aej bâbâronzi bazo. ¹⁸ Hae zoņa zoricne-ticnere sâc kubi 100 â otecne-ticnere sâc kubi 50 â hâņne-ticne ine kubi 5, iņuc fuazejec. Erâ qoruc fâfâsâc barâ qetickepie waha domazejec â wâtun râqâc-jenic ine aej bâbâronzi bazo. ¹⁹ Tiri bozere wâcwiac sasawa taha giere bajuniņmu i mecne erâ hae zoņare wâtunte fâzâ mecne i iņuc jaha aej bâbâronzia bafârezo.

Lambe sosoņaj irec dâņ

(Tah 24:1–4)

²⁰ “Eme go Israe ņicguru mujaretec tatamacte wokemaņ qaqačne baware-garenzepieņ, i lambe qazepie sâcne zaocte iņuc enzepieņ. ²¹ Eme tutumaņ qoruc bozeo, ââketâc sahaçnao hâcne, ira Aron â ņokâfâcne jaņe hae ņafeme fuņkerâ lambe i Wofunte maio soņaņkehuc juhapie hae

furezejec. Mâsi i Israe ñicguru miminzi qâric basanañkerâ bajupie hata sanañ-jeñic ezejec.

28

Taha bapa jañere gie ñaqi wiac bapare dâñ (Wah 39:1–31)

¹ “Eme go hahacge Aroñ â ñokâfâcne jañe Israe ñicguru jañeraonec rowosâec-jopatec mañfunḡaoa juhuc nore taha bapa erâ junzepieñ, Aroñ â ñokâfâcne Nadaba â Abihu â Eleaza erâ ltama jañe hâcne. ² Eme go hahacge Aroñ e zâñe biñehc â eri tatamachec juocte tiri ñaqi-ticne moc bazemec. ³ Eme mañ mamana tahac-jopape mamana sarichec junḡopieñ ñic inucne jañe jazatec Aroñ giere mufirieninṽte ñaqi-ticne qâtâpie nore taha bapa juzejec. ⁴ Ñaqi wiac kecziñuc qâtânzepieñ: Amecte qâ â qoqonañ ñaqi â ñaqi goñgoñhec erâ ñaqi mañne qañeñehc â duticne â umbika moc; wiac i hâcne hahacge Aroñ â ñokâfâcne qâtâ-jarepie nore taha bapa erâ junzepieñ.

⁵ “Ñaqi wiac i baninṽte gol â qoruc furi sâko keñkeñe âmuc âmucne â bâbâroñ erâ qoruc fâfâsâc inuc ronzepieñ. ⁶ Qoqonañ ñaqi i golzi â qoruc keñkeñe â âmuc âmucne â bâbâroñ furi sâko â qoruc fâfâsâc bianṽne fukicne izi banzepieñ. ⁷ I tofane ñifec â ñifec qaweo zuhucke itic enzepieñ. ⁸ Erâ bâmbâñden- ticne i wiac izia, gol â qoruc keñkeñe â âmuc âmucne â bâbâroñ â fâfâsâc izi ba akic enzepieñ. ⁹ Erâ go qânâ furi sâko jajahec rorâ ira Israe ñic guru 12 jañere zâñe heutuckehuc qârenṽkezemec, ¹⁰ qânâ

moc ira zâņe 6 â qânâ moc ira zâņe 6 jaha,
 ehuc fuambinġ sâc heutuckehuc qâreņkezemec.
 11 Golzi wiac bapa ñic e wiac furi sâkoo zâņe
 heutuckeekac inġuc hâcne Israe ñic guru 12 jaņere
 zâņe heutuckehuc qânâ jajahecko qâreņkezemec,
 ehuc râqâc kâwinehec golzia barâ maņnao qânâ i
 râetec ñezejec. 12 Inġuc erâ qânâ jajahec i qawe
 ñifec â ñifec qoqonaņ ñaqi tofanezi zuzuhuc-
 jekicko Israe ñic guru 12 jaņere manasuhuc
 basanaņkezemec. Eme Aron e qânâ izi qawenao
 foha Wofunġe maio jume Wofunġi jaņere mana-
 suhuc juzejec. 13 Eme go râqâc kâwinehec golzi
 bazemec. 14 Erâ kâpâcwâru jajahec gol qaqačnezi
 bazemec, erâ i muc wiac mizeeņgopieņ inġuc
 tinac mizerâ muc mizekicne kâpâcwâru i râqâcko
 basanaņkezemec.

15 “Izi amecte qâ, dân mumutarare ma hâcne
 moc ba akic ezemec; ehuc qoqonaņ ñaqi inġucne
 gol â qoruc furi sâko keņkeņne â âmuc âmucne
 â bâbâroņ â fâfâsâcne izi bazemec. 16 Zoricne
 â otecne-ticne sâc mocjaha, 9 inses* hâcne eha
 maine â râpene mâmâc bacjofazemec. 17 Eme
 qâ faio qânâ biri 4 birickezemec. Biri namba
 wâņ ira qânâ furi sâko zinġuc râezemec: Saradiu
 i qânâ bâbâroņ, Topazi i qânâ âmuc âmucne â
 karapuņke i qânâ ârâņ qâri. 18 Biri namba 2
 ira ine qânâ furi sâko keczinġuc birickezemec:
 Emeraldi i qânâ ârâņ qâqâri, Safiri i qânâ keņkeņne
 â Daemaņ i qânâ qaqačne taeņne kiruņ tinac. 19 Biri
 namba 3 ira qânâ zinġuczi fozejec: Jaziņti i qânâ
 bâbâroņ soc tinac, Akata i qânâ buge inġucne â

* **28:16:** I 23 senti meta irec sâc.

Ametis i qânâ qondaŋ horiki tinac. ²⁰ Biri namba 4 ine qânâ ziŋuc birickezemec: Berili i qânâ bâbâneŋ, Onisi i qânâ bâbâroŋ moc, â Jasipe i qânâ birâ birâ. Erâ qânâ i sasawa jaŋere râqâc golzi bafârezo. ²¹ Qânâ 12 hâcne zâŋe-jeŋichec birickezo, â zâŋe ine Israe ŋokâfâc-ticne jaŋere zâŋe heutuckehuc qâreŋkepie ŋic guru 12 jaŋere ma fozejec. ²² Amecte qâ irec masecne ine gol qaqacnezi muc mizekicne tinac bazemec, ²³ erâ hoŋeŋeŋ-ticne jajahec golzia barâ qâ qaŋeŋe ŋifec â ŋifec ira basanaŋkezemec. ²⁴ Muc jajahec golzi bakicne i ine qâ qaŋeŋnao hoŋeŋeŋ jajahec basanaŋ-jofakicnao esoriezemec. ²⁵ Inuc erâ gol tofa jahecne ine baferâ qoqonaŋ ŋaqire qânâ râqâcko basanaŋkezemec, ehame qoqonaŋ ŋaqire faio fozepirec. ²⁶ Izi hoŋeŋeŋ jajahec golzi barâ qâ maŋnere qaŋeŋe juwicpec ŋifec â ŋifec qoqonaŋ ŋaqiopec ira bohotazemec. ²⁷ Erâ gol hoŋeŋeŋ jajahec mocwâc zuhuckehuc barâ qoqonaŋ ŋaqi zuzuhuc-jekicko, qâ fokackoa bohotazemec. ²⁸ Eme qâre hoŋeŋeŋ i qorucmuc keŋkeŋeŋezi qoqonaŋ ŋaqire hoŋeŋeŋ bohota-kicne ira basanaŋkepie qâzi qoqonaŋ ŋaqionec mi ŋetarazejec. ²⁹ Eme Aron e tiri ufuŋko raziocmu sâc Israe ŋokâfâcne jaŋere zâŋe qâo fohapie amecnao bajuhuc Wofuŋte maio jaŋere manasuhuc juzejec. ³⁰ Qâ ira ine dân mumutarare ma jajahec, Urim â Tunim, fuŋne babataniŋ â mumutiŋte ma hâcne, i ŋiheç-jofatec Aron e Wofuŋte maio fuaocmu sâc amec-ticnao fohuc juzejec. Aron e inuc ehuc Israe ŋicguru jaŋere erâ mumutara ma i Wofuŋte maio amecnao foha

juzejec.

³¹ “Eme qoqonaŋ ŋaqi irec juwicnao ŋaqi zorice moc qoruc keŋkeŋnezi bazemec. ³² Ehuc qizeczi raziocte faic zâzâŋiŋko hawecnehec bahuc qaŋeŋne mâmâc qâtâzo; erâ tâcnezacte momori jaŋere aeŋ ŋaqio hawecne fokac irec sâc bahuc qâtâzo. ³³ Eme ŋaqi qaŋeŋne juwicne jâchândân qâqâtâc qoruc keŋkeŋne â âmuc âmucne â bâbâroŋ izi ba akic ehuc qâtâzemec. Erâ ŋondenko huhuc rârec rârec golzi goŋgoŋ biricke razemec. ³⁴ Ine ŋaqi zorice irec qaŋeŋne waha domakacko goŋgoŋ â jâchândân ŋondenko huhuc doma raocte iŋuc enzepieŋ. ³⁵ Aroŋ e ŋaqi i hâcne rojuhuc tiri gie bazejec, erâ Wofuŋte maio fuaocte tiri ufuŋko razic wefuc eocmu sâc goŋgoŋzi dâŋeme mananzepieŋ, goŋgoŋ tâmiric juhuc hâmozacte.

³⁶ “Erâ go gol qaqacnezi masapu moc barâ irec faio dâŋ ziŋuc heutuckehuc qâreŋkezemec: ‘Wofuŋte erâ bâtirikicne’. ³⁷ Eme masapu i muc keŋkeŋnezi basanaŋkerâ maikura fainao bânđeŋnetec mai fozejec. ³⁸ Aroŋte maio fozejec hâcne, ehame Israe ŋicguru jaŋe tiri taha wiac i me i bâtirihuc kiŋ bahac bâfuaeŋgopieŋ i Aroŋzi de âsic efârezejec. Ine hâcne Wofuŋzi Israe ŋicguru jaŋere maname biankeocte masapuzi Aroŋte maio fohuc juzejec.

³⁹ “Eme ŋaqi maŋne ine qoruc hahameŋnezi qâqâreŋ bazemec, erâ du moc qoruc hahameŋnezia â umbika moc erinehec ba akic ezemec.

⁴⁰ “Aroŋ ŋokâfâcne jaŋere ŋaqi maŋne â umbika erâ du zorice batec huririnehec â hone aŋac

eene ezejec. ⁴¹ Injuc erâ hahacge Aroņ â ņokâfâcne hejaretec hume wokemaņ rua-jarezemec, ehuc giere mufiriec-joparâ jambuņ-jopatec taha bapa junarenzepieņ. ⁴² Eme mimi-jenĳic sâockeninĳte qoruc fâfâsâczi kike ņaqi bajarezemec wâc, bi-fuņ-jenĳickonec waha dienĳko qazejec. ⁴³ Eme Aroņ â ņokâfâcne jaņe tutumaņ qoruc bozeo raziniņmu sâc me tiri gie baniņte alata maickeniņmu sâc kiņ bâfuarâ hâmonzipiņte wiac i hâcne rojunzepieņ. Sâcmutâc izi Aroņ e jahacne â qâricfâc-ticne hata sanaņ-jenĳic ezejec.

29

Taha bapa jajambuņ-jopa irec dâņ (Tah 8:1–36)

¹ “Jaņe taha bapa junareninĳte mufiriec-jopahuc kecziņuc ezemec: Bulimakao ņicne motec qâric moc erâ lama ņicne saħac fâsâc jajahec rocjopazemec. ² Erâ poroņ goroņ tâmiric â poroņ aņacne goroņ tâmiric jaha erâ poroņ wokemaņ ruacnekicne erâ poroņ waizeņ uucnezi bakicne i mâmâc rozemec. ³ Rorâ kâdoc mocko râetec hume kâdoc mecne bulimakao ņicne mecne â lama ņicne jajahec mecne i mâmâc bafisizemec. ⁴ Ehuc Aroņ â ņokâfâcne eĳaretec tutumaņ qoruc bozere motâcko ware domapie opâ rua-jarezemec. ⁵ Erâ tiri ņaqi rorâ ņaqi maņne â saħacne â qoqonaņ ņaqi erâ amecte qâ i Aroņ hecnetec huzejec â qoqonaņ umbika jomacnezemec. ⁶ Â duticne hecnetec hume du fainao tiri hendiņ wâc hetec huzejec. ⁷ Eme rurua wokemaņ rorâ qizecnao hesierâ wokemaņ ruacnezemec. ⁸ Izi

ņokâfâcne jowac-jopa warerâ ņaqi maņne he-jaretec hume ⁹ umbika joma-jarezemec â dujenic basanaņke-jarezemec. Inuc ejarehaņtec taha bapa gie i sâcmutâc dâņ fofo sanaņ irec sâcko mejenjicko fezejec. Go inuc hâcne ehuctecne Aronj â ņokâfâcne giere mufiriec-jopazemec.

¹⁰ “Eme bulimakao ņicne tutumaņ qoruc bozere motâcko jowa warezemec. Eme Aronj â ņokâfâcne jaņe mejenjiczi bulimakao qizecne bânduņkehapie ¹¹ motâc fuņnao Wofuņte maio qazemec. ¹² Qarâ bulimakao soc gâcne rorâ memotecgezi alata zuņene ruacnezemec â soc gâcne ine alata fuņnao hesiezemec. ¹³ Erâ wokemaņ sasawa hobu wiac foņkerâ fokac i mecne â bugâpâc mecne erâ râpe hândâņ jajahec wokemaņnehec mecne mâmâc rorâ alata faio rikezemec. ¹⁴ Biucne â sahačne â howiac-ticne i ine sâqocne muhuc toma râpenao riketec zafârezejec.

¹⁵ “Tarame lama ņicne moc rotecne Aronj â ņokâfâcne jaņe mejenjiczi qizecne bânduņkehapie qazemec, ¹⁶ erâ socticne rorâ alata rârec rârec tie razemec. ¹⁷ Erâ lama ņicne hezurâ hone â kikene zurerâ qizecne â dâkâne alata faio rike-fârezemec, ¹⁸ izi hâcne Wofuņte qowi bâzi, âsu mumundoņ fârine, Wofuņte maio zoczi bâzi ririke hâcne.

¹⁹ “Inuc erâ lama ņicne moc i rorâ Aronj â ņokâfâcne jaņe mejenjiczi qizecne bânduņkehapie ²⁰ goki qâhâmorâ socticne gâcne izi Aronj â ņokâfâcne hazec tofa-jeņic fâreopec â menenġoc fâreopec â kike nenġoc fâreopec rua-jarezemec; â soc gâcne ine alata rârec rârec tie razemec. ²¹ Erâ

ine soc alata faio fokac irecnec gâcne â rurua wokemaņ i mâmâc rorâ Aroņ mecne ņokâfâcne mecne erâ wâc ņaqi wiac-jeņic mâmâc tie-jareze-mec; iņuc ejaretecne e jahacne â ņaqi-ticne erâ ņokâfâcne â ņaqi wiac-jeņic mâmâc tirine efâreniņmu.

²² “Eme wiac ziņuc ro bâmoc ezemec: Lama fârinere wokemaņ, gecne wokemaņnehec, hobunere wokemaņ erâ bugâpâc â râpe hândâņ jahecne wokemaņnehec erâ ņefacne fâreopec (lama ņicne i mumufiriere lama hâcne). ²³ Erâ nânâ poroņ moc hâcbuc â poroņ moc wokemaņ opânehec bâsifuckerâ bakicne, erâ Wofuņte maio poroņ goreņ tâmiric kâdochec ņekac irecnec poroņ moc. ²⁴ Wiac i sasawa Aroņ â ņokâfâcne mejeņicko râetec foha Wofuņte maio fenzoņkenzepieņ. ²⁵ Epie tarame mejeņickonec rorâ Wofuņte maio bâzi âsu mumundoņhec eocte qowi bâzi rikerâ ijaha zuhuckerâ alata faio rikezemec wâc. Izi Wofuņte maio zoczi ririke bâzi hâcne.

²⁶ “Eme Aroņte mumufirie lama ņicne irec amecne rorâ Wofuņte maio fefenzoņkere bâzi eocte fenzoņketec gore biņe ezejec. ²⁷ Eme go Aroņ â ņokâfâcne jaņere mumufirie lama irec amecne â ņefacne fenzoņkekiecne i fefenzoņkere taha bâzi muhuc mutirizemec. ²⁸ Israe ņicguru jaņe Aroņ â ņokâfâcne jaņere furi sanâņ iņuc hâcne râehuc junzepieņ. Israe ņicguru jaņe wama bâzi-jeņic rikeeņgopieņ irec tofane wiac izi hâcne taha bapa jaņere biņe ezejec. Jaņe iņuc epie Wofuņ taha râcneņgopieņ eocmu.

29 “Aronje tiri ŋaŋi i eki hâmome ŋokâfâcne jaŋere biŋe ezejec. Eme jaŋe rojuhapie woke-man opâ rua-jarehuc taha giere mufiriec-jopazo. 30 Ŋokâfâcne jaŋeraonec moczi moc âkehoc-ticne erâ taha bapa juhuc tutumaŋ qoruc bozeo razirâ taha gie baocmu eki hâcne ŋaŋi i rojuhame zoaŋ gie bapa 7 tarazejec.

31 “Mumufiriec lama biucne ine rorâ tiri tomao rikezemec. 32 Eme Aron â ŋokâfâcne jaŋe lama biucne rikekicne i mecne erâ poroŋ kâdocko fokac i mecne mâmâc tutumaŋ qoruc bozere motâcko nânzepieŋ. 33 Jambuŋ-jopahuc mufiriec-jopazore wiac kiwiric-jeŋic rokicne i hâcne nânzepieŋ, wiac izi tiri fokacte ŋic omane moczi moc mi nâzejec. 34 Biuc mecne poroŋ mecne jambuŋkekicne i tiwâne foha hae fureocmuo ine tiwâne hâcne zocko râetec zafârezejec, i tiri fokacte mi nâzo.

35 “No dân gaza qâmoc egarepo irec sâcko hâcne Aron â ŋokâfâcne ejarezemec. Eme jambuŋ â mumufiriec gie bahuc juhaŋtec zoaŋ gie bapa 7 tarazejec. 36 Go zoaŋne zoaŋne bulimakao ŋicne rorâ Aron â ŋokâfâcne jaŋere kiwiric rohuc sâqocne tâtâmire bâzi rikezemec. Erâ alatare kiwiric rohuc sâqocne tâtâmire bâzi rikezemec wâc, erâ jambuŋkezore wokemaŋ ruacnezemec. 37 Alatare kiwiric roro gie i zoaŋ gie bapa 7 iŋuc bahuc jambuŋkezemec. Iŋuc etecne alatazi tiri jâmbâŋ ŋeocmu, â moczi moc alata bâuacmu e tirifict e biŋe eocmu.

*Zoaŋ sâc bâzi ririke irec dân
(3ar 28:1–8)*

³⁸ “Alata faio ine wiac kecziñuc rike râec eze-mec: 3oan̄ne 3oan̄ne lama jajahec jara-jekic wân ekicne. ³⁹ Ine lama moc furicte â moc owâcne iñuc rikec-jofazemec. ⁴⁰ Lama bâbâni rikecmu ira poroñ uucne oto moc irec tenkonec wân oliwa wokemañ tase mocjahahec bâsifuckekicne i erâ taha bapare waiñ opâ sâc ijaha zuhuckezemec. ⁴¹ Erâ lama moc ine owâcne bâzi rikezemec, ehuc poroñ â waiñ furicte taha râecmu sâc ijaha jâmbân râetecne 3oczi zâsi sin̄keme Wofun̄te âsu mumundoñ fuazejec. ⁴² Tiwâ bâzi i 3oan̄ sâc mimiñzi qâric tutumañ qoruc bozere motâcko Wofun̄te maio rikehuc junzepieñ. Ehame no dâñ gazapemurâ ira gohec bâbâfuac ehuc juzeperec. ⁴³ Eme ijaha Israe ñicguru jañehc bâbâfuac ehapene eri tatamac-nanezi tiri bacjopazejec. ⁴⁴ Eme no iñuc ehuc tutumañ qoruc boze mecne, alata mecne jambuñkehuc Aroñ â ñokâfâcne mâmâc jambuñ-jopapemu, eme jañe nore taha bapafâc juhuc kiñañ qanarenzepieñ. ⁴⁵ Ehame no Israe ñicguru ñonden̄-jeñicko ñec juc ehuc Anutu-jeñic erâ juzepac. ⁴⁶ In̄uc epe jañe, no Wofun̄ Anutu-jeñic, noni hâcne ñonden̄-jeñicko ñec juc epemurâ Aigita mâren̄konec batarac-jopapo i hone mana tarac enzepieñ. Wofun̄ Anutu-jeñic no hâcne.

30

Hosâc âsu ririkere alata (Wah 37:25–28)

¹ “Eme go jâmiñjâczi hosâc âsu ririkere alata moc bazemec. ² 3oricne-ticnere sâc kubi mocjaha â otecne-ticnere sâc kubi mocjaha jaha,

sâc mocjaha hâcne ezejec. Hânne-ticnere sâc ine kubi jajahec bazemec, zuņene ine alatahec qâfâsâezejec. ³ Erâ alata faine mecne sâpene mecne zuņene mecne i mâmâc gol qaqačnezi qorockezemec, erâ mecqaņeņne moc golzia barâ rârec rârec qatec fozejec. ⁴ Eme reņ raraži jajahec golzia barâ ñifec â ñifec mecqaņeņne juwicnao basanaņkezemec, i alata reņkezore reņticne ira hâcne esoriepie razizejec. ⁵ Reņticne i jâmiņzia fasaerâ golzi jaha foņkezemec. ⁶ Eme go ââketâc qoruczi qorac tapa katapa sâockehuc waha domaekac, â qorac katapare tapanezi Sâcmutâc Sanaņ fomackeekac, erâ gohec bâbâfuac enacmu ñondeņne ira hâcne alata hetec ñezejec. ⁷ Eme Aroņ e alata irec fainao hosâc âsu rikezejec, furic sâc lambe wiac bâpiaņkehuc iņuc hâcne ezejec. ⁸ Erâ wâc owâc sâc lambe wiac qazehuc rikezejec. Izi mimiņzi qâric Wofuņte maio hosâc âsu ririke fohuc juzejec. ⁹ Noņe alata irec faio hosâc âsu jawane me qowi me taha bâzi mi rikenzepieņ, erâ soczi taha ira wâc mi hoņkenzepieņ. ¹⁰ Eme Aroņ e jara mocte maņnao arec mocjaha alata zuņene domakacko kiwiric rorore taha gie bazejec, ine sâqocne tâtâmire taha irec soczi jara mocte maņnao arec mocjaha sâqocne bâbâtâmirere gie i mimiņzi qâric bahuc juzejec. Alata izi Wofuņte maio wiac furu dindiņ ekac hâcne.”

Sahac taha rââere dâņ

¹¹ Wofuņzi Mose kecziņuc âzâcnewec:

¹² “Go Israe ñicguru wose qâreņ ejarecmu dameņ ira ñic sasawa sahac taha-jeņic Wofuņ

qikiñnecnenzepien, eme wose qâren ejarehapie ñonden-jenicko huc hâmoc wiac moc mi fuarâ fozejec. ¹³ Ehame wose qâren ejarekicne jañe sasawa furuficte monenñe sâc mukicne irec sâc moneñ seke* nâfocne râenzepien, (seke wân izi gera 20 ekac) i Wofunñe taha hâcne. ¹⁴ Jara-jenic 20-o domarâ fekac â wose qâren ejarekicne sasawa jañe hâcne taha i râenzepien. ¹⁵ Moneñ mafaheczi sâc baferâ rârâe me hapetaczi sâc bawaharâ rârâe i misac, jañe sasawa seke nâfocne Wofunñe taha râepie sahac taha-jenic ezejec. ¹⁶ Go Israe ñicguru jañeraonec sahac taha moneñ inñuc rotec izi tutumañ qoruc bozeo gie bapa irec biñe ezejec. Ñoñe inñuc ehuc ñañac juju-ñenñicte kiwiric roñgopien tinac eocmu, ehuc wâc Wofunñi Israe ñicguru ñoñehc juocte manasucneniñmu.”

Zuzure râqâc irec dân

¹⁷ Erâ Wofunñi Mose zinñuc âzâcnewec: ¹⁸ “Go aenñ bâbâronñi wiac zuzure râqâc kikenehec barâ tutumañ qoruc boze â alata ñonden-jekicko hetec ñeha opâ qatec huzejec. ¹⁹ Eme Aroñ â ñokâfâcne jañe ira hâcne me kike-jenic zurenzepien. ²⁰ Ine tutumañ qoruc bozeo fehuc me Wofunñ bâzi rikecneniñte alata maick-ehuc tiri gie bazo murâ hâmonzipiñte inñuc hâcne enzepien. ²¹ Hâmonzipiñte me kike-jenic zurenzepien. Eme Aroñ â qâricfâc-ticne jañe mimiñzi qâric mâsi i hâcne basanañkerâ bajupie eebapa sanañ-jenic ezejec.”

* **30:13:** Seke wân i toea 76 qâririñ ekac.

22 Erâ Wofunzi zuhuckerâ Mose zîñuc âzâcnewec: 23 “Go wiac furi sâko â âsunehec kecziñuc rozemec: Moneñ 500 seke irec sâc wokemañ âsu bian, erâ moneñ 250 seke irec sâc musijâc sahaçne, erâ moneñ 250 seke jaha irec sâc sopâc ââsu, 24 erâ moneñ 500 seke irec sâc woworañ ââsu jâc irec sâfâ, erâ oliwa wokemañ fifia râqâc moc irec sâc; seke ine furuficte moneñte sâc mukicne irec sâc ezejec. 25 Go wiac i sasawa, wokemañ bapazi wenîñuc eme wokemañ fuaekac iñuc hâcne ehuc bâsifucketec tiri wokemañ fuazejec. 26 Eme wokemañ izi tutumañ qoruc boze â qorac tapa katapa ruacnezemec. 27 Erâ tebo â fainao wiac ñerakac sasawa, erâ lambe dodoma â wiac-ticne â hosâc âsu ririke alata, 28 erâ bâzi ririke alata â wâcwiac-ticne sasawa erâ zuzure râqâc kikenehec i mâmâc ruacne-fârezemec. 29 Go iñuc ehuc bâtiritecne wiac sasawa tirine efârezejec. Eme moczi moc wiac i ba bâuac eocmu e tirificte biñe ezejec. 30 Erâ Aronj â ñokâfâcne mâmâc wokemañ rua-jarehuc tiri bacjopatec nore taha bapafâc erâ junzepieñ. 31 Israe ñicguru jañe ine zîñuc jazazemec: ‘Ñoñe mimiñzi çâric wokemañ irec manapie nore tiri rurua wokemañ ezejec. 32 Wokemañ i ñic omane moc mi rua-jarenzepieñ, erâ ñoñe wokemañ iñucne wâc bâsifuckerâ mi bâfuanzepieñ; wokemañ i tirine erâ ñoñe wâc manapie tirine jaha ezejec. 33 Moc e wokemañ iñucnea bâsifuckerâ bâfuaocmu me irec nâfocne rorâ ñic furune moc râcneocmu e ñic âgofâc-ticne jañere ñondenjkonec bârâriehuc qâhâmonzepieñ.’”

³⁴ Erâ Wofuņ e Mose ziuņuc âzâcnewec: “Go wiac âsu bian șâckoa kecziuņuc rozemec: Jâcsâņiņ fuņne fuņne (waha kufañ, usu â qârâpâ) erâ wiac âsu bian qaqačne moc. ³⁵ Rorâ hosâc âsu ririkere wiac bapazi eekac irec șac jaha ehuc bâsifuckezemec, erâ hâwec zuhucketecne qaqačne â tirine ezejec. ³⁶ Eme gâcne piic piic banzaņnerâ tutumaņ qoruc bozeo qorac tapa katapa ņekacko ira bahefârâ râetec ņehame ira hâcne fua-garezepac. Wiac irec manapie tirine jâmbâņ ezejec. ³⁷ Eme hosâc âsu ririkere wiac bâsifuckecmu irec șacko jâmbâņ ņaņacne biņe moc mi banzepieņ, ņoņe irec manapie Wofuņte biņe bâtirikicne ezejec. ³⁸ Moc e wiac irec âsu mana aņac eocte e jahacne biņe bâfuaocmu e ņic âgofâc-ticne jaņere ņondenķkonec bârâriehuc qâhâmonzepieņ.”

31

Bezalele â Oholiabe giedâņ mujactekicne (Wah 35:30—36:1)

¹ Wofuņzi Mose kecziuņuc âzâcnewec:
² “Manakic, no Juda guruonec ņic moc zâņene Bezalele, Huru ņokâ-ticne Uri ere ņokâ hâcne e rowosâepo. ³ Erâ Anutu nore Mâro mecne, maņfânâņ mecne, maņfâri â mamana tara mecne i tahackepe maņnao fusucmarâ foha metâ bapa ņic erâ jukac. ⁴ Erâ i ziuņucte epo: ņic e mana gufuc erâ wiac fuņne fuņne gol â siliwa â aeņ bâbâroņzi ba akic ezejec. ⁵ Erâ qânâ wiac furi șako i râqâc kâwinehecko râezore fasaezejec â jâc wiac wâc fasaerâ meqâreņ

fuņne fuņne bazejec. ⁶ Erâ manakic, no Danțe guruonec ņic moc zâņene Ahisamac ere ņokâ Oholiabe eki Bezalele bafickeocte râcnepo; erâ metâ bapa ņic sasawa jaņe wiac mugarepo i ba akic efâreniņte manfânâņ qikiņne-jarepo. Wiac kecziņuc: ⁷ Tutumaņ qoruc boze, qorac katapa â tapane, qoruc bozere wâcwiac; ⁸ tebo â wâcwiac-ticne, lambe dodoma gol qaqacnezi bakicne â wâcwiac-ticne; ⁹ hosâc âsu ririke alata, erâ bâzi ririke alata â wâcwiac-ticne; zuzure râqâc kikenec; ¹⁰ taha bapa Aron ere gie ņaqi hone aņac eene â tiri ņaqi-ticne, erâ ņokâfâcne jaņere gie ņaqi; ¹¹ ruru wokemaņ â tirifictē hosâc âsu ririkere wiac. Ine hâcne mugarepo irec sâcko jâmbâņ wiac sasawa ba akic efârenzepiņ.”

Sabata hombaņte dâņ jaha

¹² Erâ Wofuņzi Mose ziņuc âzâcnec: ¹³ “Go Israe ņicguru jazazemec, ‘Ņoņe hombaņ-nane ņefârenzepiņ, hombaņ i ņoņehēc zâzâfic epo irec ma, erâ i mimiņzi qâric forahuc juzejec. No Wofuņ jukopaczi tiri bacņopakopac, iņuc manafârenzepiņ. ¹⁴ Ņoņe hombaņ-nanere manapie tirine eha ņenzepiņ. Moc e hombaņ sipirickeme qâhâmozo, â moc e hombaņko gie baocmu e wâc iņuc jaha ņic âgofâc-ticne jaņere ņondenkonec bârâriehuc qâhâmozo. ¹⁵ Gie bapa 6 ira gie bazore mukicne, gie bapa namba 7 izi ine Wofuņte hombaņ sâko, irec moc e sabata hombaņko gie baocmu e qâhâmonzepiņ. ¹⁶ Irece Israe ņicguru jaņe mimiņzi qâric hombaņ ņepie hata sanaņ-jeņic eha hombaņ i hâcne ņehuc junzepiņ. ¹⁷ Wofuņ noni hâcne zoaņ gie bapa 6 sambâņ â

mârenj bâfuac-jofapo, erâ zoan namba 7 ira ine nemanahuc âke mâtenjuwec, irec hombanj i Israe njiguru njonheh ec zâzâfic epo irec ma erâ nac zora fosanañkezejec.’ ”

¹⁸ Eme Wofunj e Mosehec Sinai tikio dân muc manac epire taram e Sâcmutâc Sanañte tafe râcnewec. Tafe i qânâzi fasaekicne â Anuture mezi qârenjkecicne.

32

Wofunj râpeckembinj (Sâc 9:6–29)

¹ Mose e tikio jume zorame njic njokac jaje Aroñtao heâckerâ rarâ âzâcnembinj: “Ajoc, nemu moc bâfua-nâret ec bânie-nârezejec. Mose njic keci, Aigita mârenjkonec bacnâpo warewec, e injuc me injuc fuacnejec i mi manañgopenenj.”

² Eme Aroñzi jazawec, “Njonhe njokac naru motecfâc-nenjic janere hazeckonec pânji warawa golzi bakicne batararâ norao bafisiniñ.” ³ Eme njic njokac naru motec mâmâc sasawa jaje pânji warawa hazec-jenicko doma rawec i batararâ Aroñtao bafisimbinj. ⁴ Eme Aroñ e gol jowac rohuc rike dockerâ bulimakao motecne irec hawari bawec. Eme jaje mumbinj, “O Israe, Aigita mârenjkonec bacgu warewec nemuge zi hâcne.” ⁵ Injuc epie Aroñzi honerâ bulimakaore manfunjko alata moc bawec; erâ dânj kecziñuc jazame wirapie hazec sâc huwec: “Tomâcko Wofunjte hombanj njezo.” ⁶ Hae fureme uupictea qowi bâzi rikembinj â wama bubianjte taha wiac

bafisimbiņ. Eme ņic ņokac jaņe waha ņehuc nânâ opâ nâmbiņ, erâ faharerâ mamasiri wiac embiņ.

⁷ Eme Wofuņzi Mose âzâcnewec, “Ajoc, fahare huc! Țicfâcge Aigita mâreņkonec jowacjopa waremeņ jaņe sindaņ eņgopieņ; ⁸ no hata mutâcne-jarepo i biac qâsuambieņ. Jaņe bulimakao qâqâtâc moc bâfuarâ numucnehuc bâzi rikecneņgopieņ, ehuc ziņuc muņgopieņ: ‘O Israe, Aigita mâreņkonec bacgu warewec nemuge zi hâcne.’” ⁹ Iņuc murâ ziņuc âzâcnewec: “No ņic ņokac zi hone tarac-jopakopac, jaņe ņic ņokac maņsanaņ; ¹⁰ irec behecnuhaņ kimbeņ-nanere zoczi bâruņkerâ zâseņ-jopazejec; go ine mupe sawe mâririackerâ ņicguru sâko ezemec.”

¹¹ Eme Mose e ine Wofuņ Anutu-ticne mu bâmunaņ ecnerâ muwec, “O Wofuņ, ņicfâcge Aigita mâreņkonec mesanaņgezi tâpiri sâkohec bacjopa waremeņ, jaņe wemocte kimbeņgere zoczi zâseņ-jopaocte bâruņkekac? ¹² Go iņuc etec Aigita ņic jaņe ziņuc muniņmu i: ‘Imacjopaocte manasuhuc tiki mâreņko bacjopa rawec, ehuc mâreņkonec bâsirowec-jopaocte iņuc hâcne ewec?’ Irec sifu ņicfâcge jaņere buge sâqoreme mana uruetic kimbeņgere zoc qazuezejec. ¹³ Kiņaņņicfâcge Abraham, Isaka â Israe jaņe manasuc-jopac. Erâ gahacne zâņeo iticnehuc mumupaņ sanaņ mupaņke-jarehuc biņedâņ ziņuc jazameņ i manasuc, ‘Qâricfâc-ņeņic basawec-jopakupe sambâņko bâpiņ ņeraņgopieņ irec sâc fuaņiņmu, â mâreņ biņe qaņarepo zi qâricfâc-ņeņic jarepe raucke sanaņkenzongopieņ.’” ¹⁴ Eme Wofuņ e

ņicfâcne sisipiric wiac ejarezo muwec i mana uruehuc maņne risieme behewec.

¹⁵ Eme Mose e tikionec risierâ wahawec. Eme Sâcmutâc Sanaņte qorac tapa jajahec meo bacjo-fawec. Tapa jajahec i ñifec â ñifec qârenhec sawa. ¹⁶ Qorac tapa i Anutuzi bâfuawec erâ qâren i ekizia qorac tapao heutuckehuc qârenkewec. ¹⁷ Eme wahahuc Josuazi ñic jaņere ojowa fânâņ manarâ Mose ziņuc âzâcnewec: “Tomaο zikare ojowa fuame manakopac.” ¹⁸ Eme eki muwec: “No saoreņ fânâņ me busâqocte kio owa mâcne, gae wonġâņte miczonzoņ manakopac.” ¹⁹ Eme wahaku toma bâqinkehuc bulimakao qâqâtâc â gae wowo hone manac erâ bune bâruņkeme qorac tapa tiki fuņnaο beheme qanzaņnewec. ²⁰ Erâ ra bulimakao qâqâtâc bambiņ i rorâ zocko beheme zame henzaņ qanzaņnerâ uucne opâhec bâsifuckerâ Israe ñicguru jaņe nâniņte zoqac ejarewec.

²¹ Eme Mosezi Aroņ ziņuc âzâcnewec: “Ñicguru zi jaņe weninuc egarepie kiņ inucne sâko fai-jeņicko râetec fewec?” ²² Aroņzi muwec: “O bom-boņ, kimbeņgezi mi bâruņkeoc, ñicguru zi jaņe boc repireņgopieņ i gahac manaekic i! ²³ Jaņe ziņuc nazambiņ hâcne: ‘Go nemu bâfuac-jopatec bânie-nârepie ranzepeneņ; Aigita mâreņkonec jowac-nâpo warewec, Mose hâcne, ñic e sifucke wiac moc ewec me weninuc i mi mananġopeneņ.’ ²⁴ Inuc mupie jazapo, ‘Moc e eri wiac golzi bakicne moc bajuekacko hetarazejec.’ Eme narepie zocko behepe hume bulimakao qâqâtâc zi hâcne fuawec.”

25 Eme Mose e bâbâsifuc sâko bâfuapie honewec. Aronzi docke-jareme injuc epie râsifâc-jeñic sowine injuc engopien muhuc bubian manambin, Mose e injuc hone manac erâ ²⁶ teuj-jeñicte motâcko domahuc wirarâ muwec: “Moc e Wofunte ñic juzo ecnekacko norao warezejec.” Mume Lewire gurufâc jañe sasawa erao tumañne-fârembin. ²⁷ Eme jazawec: “Wofun, Israere Anutu e hâcne zinjuc mukac, ‘Ñoñe ru sâc ombâñ-ñejicko becsahac jomarâ zika-ñejic esorienzeñien. Erâ teuj sâckerâ motâc mockoneczi mocko rac warec ehuc hahac qafâc-ñejic mecne, âgo tofafâc-ñejic mecne, soctofafâc-ñejic mecne jañe mâmâc sasawa qâhâmoc-jopanzeñien.’” ²⁸ Eme Lewire gurufâc jañe Mosezi mujarewec sâc efârembin. Injuc epie ñic jañeraonec 3oan ira 3 tausenzi hâmombin. ²⁹ Eme Mosezi muwec, “Ñoñe miñecgac ru sâc Wofunte binje eniñte mupañkehuc ñokâfâc-ñejic me hahac qafâc-ñejic qaisoc-jopambien i Wofunte jambunzi 3oan zira fai-ñejicko feocte injuc hâcne embien.”

³⁰ Hae fureme Mosezi ñic ñokac zinjuc jazawec: “Ñoñe sâqocne ñemâcne bâfuambin. Irec no zi Wofuntao fepemu, erâ hece, ñoñere erâ Wofun mu wâwâsic ecnehuc kiwiric-ñejic sâcne ropemu me weninjuc?” ³¹ Mose e injuc murâ mocwâc Wofuntao ferâ zinjuc âzâcnewec: “Jâi, ñicguru zi jañe sâqocne ñemâcne bâfuambin, jañe golzi nemuqâñ bambin hâcne. ³² Eme zi sifu sâqocne-ñejic bâtâmire-jarezemec. Mi ezo murâ ine nore zâñe papiagao qârenkemen i

hetâmirzemec.” ³³ Wofuñzi ine Mose âzâcnewec, “Inuc mâcne, moc e sâqocne bahuc bunaneo baocmu ere zâñe papia-naneo hetâmirepemu. ³⁴ Zi ine rac, erâ hae mâreñ gazapo ira ñicguru jowac-jopatec ranzepieñ. Manakic, añelo-nanezi bânie-gareocmu. Ehame damen-nane maickeme ine kinjenicte okacne bazu-jarepemu.”

³⁵ Eme Aronzi bulimakao qâqâtâc bame aran bacnembiñte Wofuñzi mume wiac mimicne faijenicko fewec.

33

Sinai tikionec fahare raniñte mujarekicne

¹ Eme Wofuñzi Mose zinuñc âzâcnewec: “Ajoc, go â ñicguru Aigita mâreñkonec jowac-jopa waremeñ ñoñe zirecnec rahuc juku Abraham, Isaka â Jakobo mâreñ mupañke-jarehuc biñe qajarepo ira fisinzepieñ. Zinuñc hâcne mupañke-jarepo: ‘Qâricfâc-ñeñic jarezokopac.’ ² Eme no añelo moc sorepe bânie-ñarezejec, ehame Kanaan ñic, Amori ñic, Hitinñic, Perizi ñic, Hiwinñic â Jebusi ñic jâpec-jopazepac. ³ Go mâreñ susu â banac fusucmarâ qâmbâriñkeekacko razemec; no ine ñoñehc mi rapemu, ñoñe ñic mañsanañ junñopieñte juku hatao bâsirowec-ñopazipohec.”

⁴ Eme ñic ñokac jañe dân ñemâcne i manarâ makuc bambiñ, ehuc moczi moc eri qoqonañ wiac-ticne moc mi qonañkewec. ⁵ Wofuñzi ine Mose zinuñc âzâcnewec: “Go Israe ñicguru jazac, ‘Ñoñe ñicguru râñgeñ qañqañe, irec no damen bembeyne mac sawa ñonden-ñeñicko rafehuc

bâsirowec-ηopazipohec. Irec zi eri wiac-ηen̄ic heunucke hetarac enzepien̄, eme no wiac wen̄iuc jaha en̄arezo i mana tarazepac.’” ⁶ In̄uc mume Israe ηic ηokac jaηe Horebe tikionec rahuc rahuc izia eri wiac-ηen̄ic heunucke hetarac embiη.

Tutumaη qoruc bozere d̄aη

⁷ Eme Mose e ine qoruc boze rorâ teuη qaηeηnao taicko fâre jujec, ehuc z̄aηene tutumaη qoruc boze mujjec. Eme moc e Wofuη mu wioc ecnezo murâ tutumaη qoruc boze teuη qaηeηnao ηewec ira rajujec. ⁸ Eme Mose e qoruc bozeo rame s̄ac ηic ηokac jaηe zengoma faharerâ ru s̄ac boze-ηen̄icte motâcko domahuc Mose z̄aηezi hone j̄aηape jumbien̄. ⁹ Eme Mose e qoruc bozeo razime karorac q̄afoηnezi waharâ bozere motâc qorockerâ domaha Wofuηzi Mosehec d̄aη muc manac ejujec. ¹⁰ Eme ηic ηokac zengoma jaηe boze motâcko karorac q̄afoηne domame honerâ ru s̄ac faharerâ boze-ηen̄icte motâcko fodape jumbien̄. ¹¹ Wofuη e Mosehec mamaic ehuc d̄aη muc manac ejupirec, ηic moczi âgo qomâ-ticnehec d̄aη muc manac eekopirec irec s̄ac. Eme Mose e ηic jaηere teuηko risieme kiηaηηic-ticne socq̄ari Josua, Nun̄te ηokâ h̄acne, e tutumaη qoruc boze i moc mi behe jujec.

Wofuηzi jaηeh̄ec jaha juocte mupaηkewec

¹² Eme Mose e Wofuη âzâcnerâ muwec: “Manakic, go ηicguru zi bacjopa rapemurâ munaremeη, erâ mo ηic mo soretec nohec m̄am̄ac ranacmu, i ine mi mutec manaekopac; kecziηuc ine nazameη: ‘No z̄aηege manaekopac â

honeriᅅgnekopac.’¹³ Irec ziᅅuc numu-garekopac: No jâmbomac honeriᅅnuekicko mamana birige nowatutec fuᅅnege mana tarape â honeriᅅnuekic i wâc hone tarape. Erâ ᅅicguru zi jaᅅe gore gurufâc juᅅgopieᅅ i wâc manasuc.”¹⁴ Eme dân ziᅅuc bâtikiecnewec: “No nahac bânie-ᅅarehuc jowac-ᅅoparâ hatao râec-ᅅopape me?”¹⁵ Eme eki muwec, “Go gahac jâmbâᅅ mi bânie-nârezo mukicko ine zirecnec mi jowac-nâpo razemec.¹⁶ Goki no mecne â ᅅicguru zi mecne honeriᅅ-nâpoekic i wemocko fuᅅne taniᅅkeme hone tarazo? Ziᅅucko hâcne hone tarazo: Go gahac jâmbâᅅ bânie-nâretec no â ᅅicfâcge nâᅅe ᅅicne ᅅicne mâreᅅko juranᅅopieᅅ jaᅅere sâc mâcne, sâc moc enaᅅmu hâcne.”

¹⁷ Eme Wofuᅅzi Mose âzâcnewec, “Wiac moc, go mukomec iᅅuc jâmbâᅅ epemu hâcne. No go honeriᅅgnekopac â zâᅅege wâc manaekopac i!”¹⁸ Mume Mosezi muwec, “Mana-naretecne eri tatamacge honezepac.”¹⁹ Mume muwec, “No eri tatamac-nane gore maio râeᅅe fota rame zâᅅe-nane ‘Wofuᅅ’ i gore maio musokapemu, erâ no ᅅic moc aki anonoc ecnezo murâ ecnepemu; â moc buuruc ᅅacnezo murâ ᅅacnepemu jaha.”²⁰ Erâ muwec, “Mocjaha, zâᅅe mai-nane sâcne mi honecmu, ᅅiczi honecnurâ ᅅâricne juju i mi fokac.”²¹ Erâ Wofuᅅzi zuhuckerâ muwec, “Manakic, zi maᅅfuᅅ-naneo sawane fokac ira haroᅅaᅅko domazemec.²² Eme no ᅅânâ hawecko râecgurâ menanezi zâᅅege bâsoᅅkehuc eri tatamac-nane-hec gowarupemu.²³ Iᅅuc ehuc menane bârârieᅅe râeᅅ-nane sawa honezemec, mâc zâᅅe mai-nane

hohonene ine mi fokac.”

34

Qorac tapa qâricne mocwâc qârenj-jofakicne (Sâc 10:1–5)

¹ Eme Wofunzi Mose âzâcnewec, “Qorac tapa jajahec qanaŋ fasaec-jofakicne inucne mocwâc fasaec-jofazemec, eme qorac tapa qanzaŋ-jofamenj jahere faio dân qârenjkecicne fowec ijaha qârenjkepemu. ² Irec go uupicte zawiezemec. Erâ furicte Sinai tikio wefurâ tiki botânko nore maio fuazemec. ³ Erâ moczi moc gohec moc mi wefuzepirec, â moczi moc tikio moc mi juzejec, â lama bulimakao wiac jaŋe tiki fuŋko ware nânâ mi nânzepieŋ.” ⁴ Inuc mume Mosezi qorac tapa jajahec mârâc fasaec-jofakicne inucnea fasaec-jofawec. Erâ Mose e furic uupicte Wofunzi mutâcnecnewec irec sâcko qorac tapa jajahec bacjofarâ Sinai tikio fewec. ⁵ Eme Wofun e karorac maŋko waharâ erao domawec. Eme Mose e Wofunte zâŋe riwaseckeme ⁶ Wofunzi ere zâŋe maio fotâcnehuc kecziŋuc wirawec: “Wofun, Wofun e Anutu buuruc â aki anonoc-ticnehec, kimbeŋ-ticne urucne, erâ manjaun â erâ-eesanaŋ i qârâŋnea focnekac. ⁷ E ŋifec kiŋtofa â qaqatara â sâqocne bêtâmirehuc ŋic tausenŋne tausenŋne ehâmo-jarehuc juekac, â ŋifec ine kiŋhec jaŋere fuŋne mi mana pitiwahuc naru motec ŋosafâc-jeŋic bazu-jare raekac.” ⁸ Inuc mume Mose e picpac jaha mârenko fodapewec. ⁹ Ehuc muwec, “O Wofun, go nore manatec sâckekacko ine sifu ŋonden- nâŋecko

juhuc nâñehec mâmâc razemec, ñicguru zi jañe rângeñ qañqañne juñgopieñ hâcne. Erâ kiñ bahac â sâqocne-nâñec behehuc biñefâcge bacnâpozemec.”

Zâzâfic heqârekicne

(Wah 23:14–19; Sâc 7:1–5; 16:1–17)

¹⁰ Eme Wofuñzi muwec, “Manakic, no zâzâfic moc bâfuapemu. No ñicgurufâcge sasawa jañere maio mâsi moc bapemu, mâsi inucne mâreñ sâko mâreñ irec faio mecne â ñicne ñicne jañere ñondeñko mecne moc mi fua wefuwec, eme ñicguru ñondeñ-jeñicko jukomec jañe zenqoma Wofuñ nore gie bapare fuñne honenzepieñ; no wiac qeñ bipinehec eñarepemu hâcne.

¹¹ “No miñecgac dân ñazakopac i mana rereñ enzepieñ. Manañgopieñ, no Amori ñic, Kanaan ñic, Hitinçic, Perizi ñic, Hiwiñic â Jebusi ñic zâñe fai-ñeñicko jâpec-jopapemu. ¹² Nõñe rucñeñic banzepieñ, mâreñ raziniñmu irec rune jañehec juhuc zâzâfic moc epie dânzi bitin râne-ñarenzipinçte. ¹³ Nõñe alata wiac-jeñic heropienzepieñ, nemure qânâ wâtun wiac-jeñic qanzañnenzepieñ â nemuqân-jeñic hezu henzañnenzepieñ. ¹⁴ Nõñe nemu gâcne moc mi numu-jarenzepieñ. Wofuñ nore zâñe ‘Zoqachec’; no Anutu zoqac-nanehec hâcne.

¹⁵ Nõñe mâreñ irec rune jañehec zâzâfic moc mi enzepieñ, jañe nemufâc-jeñic jañerao qohotahuc bâzi rike-jareninçte hefârec-ñopapie nemure tiwâ zepec nânzipinçte ¹⁶ erâ narufâc-jeñic rocjopará motecfâc-ñeñic jarepie ñonânçfâc-jeñic juhuc nemufâc-jeñic arañ bajarehuc motecfâc-ñeñic

eatuc-jopapie jaņe wâc nemufâc-jeņic jaņerao qohotanzipințe.

17 “Ŋoņe gol rike dockekicnezi nemu qâqâtâc moc mi banzepieņ.

18 “Goreņ sowa hombaņ ņehuc junzepieņ. Ŋoņe goreņ sowa juhapie zoaņ gie bapa 7 tarazejec, ine ņazapo irec sâc mosa damaņ April-ko ņenzepieņ, ņoņe mosa damaņ ira hâcne Aigita mâreņkonec wahambiņ. 19 Mârâc fufua sasawa ņic me qowi i nore biņe, qowi ņicne mârâc fufua, bulimakao â lama mârâc fufua hâcne. 20 Doņgi mârâc fufua irec okacne lama râenzepieņ, me okacne mi râezo murâ ine doņgi upene qâpirickenzepieņ. Motecfâc-ņeņic mârâc fufua jaņere okacne wâc râenzepieņ. Erâ moczi moc nore maio metariņ mi fisinzepieņ.

21 “Ŋoņe zoaņ gie bapa 6 gie sâcne baniņmu, zoaņ namba 7 ira ine hombaņ ņenzepieņ, ine gie hesarac damaņko me qa roro damaņko hombaņ ņenzepieņ wâc. 22 Erâ woka hombaņ, bâbâsu hombaņ hâcne, i mecne â jara tataranao waiņ qa roro irec hombaņ mecne i mâmâc ņenzepieņ. 23 Ŋic zeņgoma jaņe jara mocte maņnao arec jahec â moc Wofuņ Anutu, Israere Anutu hâcne, nore maio fuanzepieņ. 24 No ņoņere maio ņic gurune gurune jâpec-joparâ hae mâreņ-ņeņic bâsokapemu, eme jara mocte maņnao arec jahec â moc Wofuņ Anutu-ņeņic fua-narenințe rahapie moczi moc mâreņ-ņeņicte andac mi ezejec.

25 “Ŋoņe qowi bâzi-nanere soc i poroņ goreņhec mi rikenzepieņ, erâ aakic hombaņte lama bâzi i tiwâne râepie foha hae mi furezejec. 26 Nânâ

bâbâsu damenko wiac fârine bianje i Wofun Anutu-njenic nore ficko bafenzepien. Erâ lama motecne i nenjocnere susuhec mi rikenzepien.”

²⁷ Erâ Wofunzi Mose âzâcne muwec, “Go dân i qârenkezemec, no dân izi hobetenne eha go â Israe njic njehehec zâzâfic mocwâc ekopac hâcne.”

²⁸ Eme Mose e ira Wofunhec nânâ opâ tâmiric juhame nje 30an 40 tarawec. Ehame zâzâfichte dân, Sâcmutâc Sanañ Teñ i hâcne qorac tapao qârenkewec.

Mosezi tikionec wahawec

²⁹ Eme Mose e Sinai tikionec wahahuc Sâcmutâc Sanañ Teñ irec qorac tapa jajahec i meo bacjofa wahawec. Ehuc faic Wofunhec dân muc manac epicko zâne mai-ticne tatamachec ewec tatamac i foha waha fisiwec, i e jahac mi manawec.

³⁰ Eme Aroñ â Israe njiguru sasawa jañe Mose honembiñ i zâne mai-ticne tamaeme honerâ hâwic-jopame manfun-ticnao mi rambiñ.

³¹ Eme Mosezi wira-jareme Aroñ â kikefunte micne bapa jañe Moserao rapie jañehc dân muc manac embiñ.

³² Izi zâhec Israe njic njokac sasawa jañe ware manfunnao fisipie eki Wofunzi Sinai tikio sâcmutâc dân âzâcnwec i bâtikie-jare-fârewec.

³³ Dân jaza-fârerâ zâne mai-ticne rurufazi qofackewec.

³⁴ Erâ damen sâc Wofunhec mai ecneme dân dân enicte rurufa bârârierâ mâc domaha Wofunzi dân âzâcneku âzâcne-fârewec. I tarame waharâ dân âzâcne mutâc ekicne sasawa i Israe njiguru bâtikie-jare-fârewec.

³⁵ Eme damen ira Mose zâne mai-ticne tamaeme Israe njiguru jañe hone jumbien. Irec

Mose e zâŋe maine rurufazi mocwâc qofackeme foha Anuturao fefe damen-ticne maicke jujec.

35

Sabata hombaŋ ŋeŋere sâcmutâc dâŋ

¹ Eme Mose e Israe kikefuŋ jaŋe zeŋgoma hetumaŋ-joparâ ziŋuc jazawec: “Wofuŋ e wiac kecziŋuc eniŋte ŋaza mutâc ewec: ² Zoan gie bapa ⁶ ira gie banzepieŋ, â zoan namba ⁷ ira ine Wofuŋte hombaŋ ŋenzepieŋ. Moc e zoan ira gie baocmu e qâhâmonzepieŋ. ³ Ŋoŋe sabata hombaŋko ficŋeŋicko zoc moc mi ruŋenzepieŋ.”

⁴ Erâ Mose e Israe ŋicguru kikefuŋ qâqâhâc sâko ziŋuc jazawec: “Wofuŋzi wiac kecziŋucte dâŋ ŋaza mutâc ewec: ⁵ Wiac foŋarekac irecnec gâcne rorâ Wofuŋte taha râenzepieŋ; moc e maŋticnezi mutâcnecneme sâc Wofuŋte taha ziŋuc bafisizejic: Gol, siliwa, aeŋ bâbâroŋ, ⁶ qoruc furi sâko keŋkeŋe â bâbâroŋ â âmuc âmucne â fâfâsâc, erâ noniŋ kanzaŋne, ⁷ â lama ŋicnere sa hac peŋ bâbâroŋzi rikekicne, erâ noniŋ sa hacne â jâmiŋjâc, ⁸ erâ lambere wokemaŋ â rurua woke maŋ â hosâc âsu ririke irec wiac âsu bian. ⁹ Erâ qoqonaŋ â qâ irec biŋe qânâ furi sâko bâbâroŋ erâ qânâ furi sâko gâcne mâmâc.

¹⁰ “Erâ ŋoŋeraonec metâ bapare fuŋne mamaŋ ŋic jaŋe warerâ, Wofuŋzi wiac muwec i bafârenzepieŋ, ine ziŋuc: Tiri boze, ¹¹ erâ sâpe â bupu-ticne, heheawic â katapa â babasanaŋ erâ wâtuŋ râqâc-ticnehec mâmâc. ¹² Erâ qorac tapa katapa reŋ wiac-ticnehec, katapa tapane â ââketâc qoruc, ¹³ erâ tebo reŋnehec â râqâc

wiac-ticne erâ poroņ furu mukicne, ¹⁴ erâ lambe dodomane â wâcwiac-ticne â lambe â lambe wokemaņ, ¹⁵ erâ hosâc âsu ririkere alata reņticnehec, erâ rurua wokemaņ â hosâc ririkere wiac âsu bian erâ tiri boze motâcte ââketâc, ¹⁶ erâ qowi bâzi ririkere alata irec sac â reņ erâ gie bapare wiac-ticne sasawa erâ wiac zuzure râqâc kikenehec, ¹⁷ erâ hae zoņare sâpe irec qoruc â wâtuņ â wâtuņte râqâc erâ hae zoņa motâcte qoruc, ¹⁸ erâ tiri boze â hae zoņare fâzâ â muc-ticne, ¹⁹ erâ tirificko gie bapare ņaqi ba akic ehuc bakicne, taha bapa Aronțe tiri ņaqi hâcne, erâ ņokâfâcne jaņere tiri giere ņaqi mâmâc.”

²⁰ Dâņ iņuc jazame Israe ņicguru kikefuņ zengoma jaņe Mosere maionec ratâmirembiņ. ²¹ Erâ maņjeņiczi bufahac qajarewec jaņe risierâ tutumaņ qoruc boze bapa â maņnao gie bapa â tiri ņaqi irec wiac i Wofuņte taha bafisi-fârembiņ. ²² ņic mecne ņokac mecne maņjeņiczi esoc qafef ejarewec jaņe kubu â sarasa â pâņi warawa â megâņ mahec, erâ maņguc eri wiac gâcne gâcne golzi bakicne i Wofuņte taha bafisimbiņ hâcne. ²³ Erâ qoruc furi sâko keņkeņne â bâbâroņ, fâfâsâc â âmuc âmucne, erâ noniņ kanzaņne â lama sahacne peņ bâbâroņzi rikekicne â noniņ sahacne fojarewec jaņe sasawa wiac iņuc bafisimbiņ hâcne. ²⁴ Â moc e siliwa me aef bâbâroņ râeocte manasuwecci wiac i Wofuņte taha bafisiwec, â moc e jâmiņzi wiac bapa irec biņe jâc focneweczi bafisiwec wâc. ²⁵ Eme ņokac qoruc bapare fuņne mamana jaņe qoruc furâ bafisimbiņ, qoruc furi sâko keņkeņne â bâbâroņ â fâfâsâc

â âmuc âmucne. ²⁶ Erâ manjenjiczi bufahac qajarewec ñokac i jañe sasawa noniñ kanzañjezi qoruc fumbiñ. ²⁷ Eme micne jañe ine qânâ furi sâko bâbâronj â qânâ furi sâko gâcne gâcne bafisimbiñ, qoqonañ ñaqi â amecte qâ irec biñe. ²⁸ Erâ tatamacte wokemañ â ruruare wokemañ erâ hosâc âsu irec wiac furi sâko, âsu bianj â wokemañ i mâmâc bafisimbiñ. ²⁹ Ine hâcne, Israe ñic ñokac sasawa jañe Wofuñzi gie baniñte Mose âzâcnewec irec wiac i manjenjiczi baafec-jopawec sâc buafec jaha Wofuñte taha bafisimbiñ.

³⁰ Eme Mose e Israe ñic ñokac ziñuc jaza-wec: “Manañgopieñ, Wofuñ e Juda guruonec ñic moc zâñene Bezalele, Hurure ñokâ Urire ñosa hâcne e zâñene muhuc rowosâewec. ³¹ Ehuc Mâro-ticne qikiñnecneme eki mañ baafec ecneme ñic meafec â mañqârâñ â metâ bapare fuñne mamana tarahec ewec. ³² I wiac bâbâfuare mamasasu gie baocte, ehuc gol â siliwa â aeñ bâbâronzi wiac ba akic ehuc baocte, ³³ erâ qânâ bâjomireocte â jâc fasaeocte â wiac sasawa ba batakiere eocte iñuc ecnewec. ³⁴ Erâ e Dañ guruonec ñic moc, zâñene Oholiabe, Ahisamac ere ñokâ hâcne, jahe ñic gâcne wâc qazu-jarenicte mamana qikiñne-jactewec. ³⁵ Metâ qâreñ ba eric ehuc bapa ñic jañe qoruc furi sâko kenkenje ñe bâbâronj â âmuc âmucne â fâfâsâc irec faio eri wiac baengopieñ, me qoruc bapa me wiac i me i bapa jañe gie-jeñic baengopieñ, irec sâcko jâmbân gie-jekic banicte tâpiri râe-jactewec hâcne.

36

¹ “Eme zi Bezalele â Oholiabe erâ ñic meafec

gâcne gie injucne baniņte Wofuņzi maņqârâņ â mamana tahac-jopame furufic bapare fuņe manangopieņ jaņe sasawa Wofuņzi mutâcnewec irec sâcko jâmbâņ bafârenzepieņ.”

Nic ņokac jaņe taha wiac bocjaha bafisimbiņ

² Eme Mose e Bezalele â Oholiabe erâ ņic meafec sasawa Wofuņzi metâ bapare mamana tahac-jopawec â maņjeņiczi gie i ware baniņte qacfahac ejarewec jaņe hefârec-jopawec. ³ Erâ Mose e Israe ņic ņokac jaņe furufic bapare taha wiac bafisimbiņ i jare-fârewec, ehame ņic ņokac jaņe furic sâc buafec jaha taha gâcne zuhuckerâ bafisihuc jumbiņ. ⁴ Irec metâ bapa furuficte gie bambiņ jaņe sasawa gie-jeņic bahuc jumbiņ i beherâ ⁵ Moserao fisirâ mumbiņ, “ņic ņokac jaņe wiac bafisijopieņ i Wofuņzi gie banaņte muwec irec sâc sirickekac.” ⁶ Injuc mupie Mosezi dâņ zijuç râeme teuņ sâcke-fârewec: “ņic me ņokac moczi furuficte taha wiac zuhuckerâ mocwâc mi bafisizepieņ.” Injuc muhuc ņic ņokac wiac zuhuckerâ bafisizipiņte aka hejarewec hâcne, ⁷ i wiac bafisikicne izi giere sâc sirickewecte.

Tiri boze bambiņ irec dâņ
(Wah 26:1–37)

⁸ Eme gie bambiņ jaņeraonec ņic meafec sasawa jaņe tiri boze i qoruc furi sâko fâfâsâc â keņkeņne â bâbâroņ â âmuc âmucne 10 izi bambiņ, ehuc qoruc i qâreņnehec fupie kerubim hawari fuawec. I Bezalelezi injuc bawec. ⁹ Qoruc moc i zoricne-ticnere sâc kubi 28 â otecne-ticnere sâc kubi 4, injuc bapie sâcjeņic mocjaha efârewec.

¹⁰ Eme e qoruc 5 jaņe moc buc zuhuc-jopawec â 5 jaņe iņuc jaha moc buc zuhuc-jopawec.

¹¹ Erâ e qoruc qaņeņnao jâmbâņ qoruc furi sâko keņkeņnezi zâzâficke muc barâ râewec â qoruc mocte qaņeņnao jâmbâņ iņuc jaha ewec.

¹² Qoruc mocte zâzâfickere muc 50 â qoruc mocte qaņeņnao zâzâfickere muc 50 jaha basanaņkewec. Iņuc eme zâzâfickere muc i qoruc ņifec â ņifec sâckoa forawec. ¹³ Erâ heheawic 50 golzi barâ izi qoruc heawic-jofame tiri boze mocjaha fuawec.

¹⁴ Erâ bupure qoruc 11 i noniņ kanzaņnezi bawec. ¹⁵ Qoruc buc buc zoricne-jeņicte sâc kubi 30 â otecne-jeņicte sâc kubi 4, qoruc 11 sâcjeņic mocjaha hâcne. ¹⁶ E qoruc 5 moc buc zâfic-jopawec â qoruc 6 jaņe iņuc jaha moc buc zâfic-jopawec. ¹⁷ Erâ zâzâfickere muc 50 i qoruc tataranere qaņeņnao râe rawec erâ zâzâfickere muc 50 jaha i qoruc mocte qaņeņnao iņuc jaha râe rawec. ¹⁸ Erâ qoruc zuhucke itic eme mocjaha eocte aeņ bâbâroņzi heheawic 50 bawec. ¹⁹ Erâ qoruc boze bupune i lama ņicnere saħac peņ bâbâroņzi rikekicne â noniņ saħacne izi bawec.

²⁰ I taram e tiri bozere katapa hâņ ââeckene jâmiņzi fasaewec. ²¹ Katapa zoricnere sâc kubi 10 â otecnere sâc kubi moc â nâfocne sasawa.

²² Katapa sasawa bareņ-jeņic jajahec jajahec, i zuzuhuc eniņte tiri bozere katapa iņuc sasawa bawec. ²³ Tiri bozere katapa ine kecziņuc bafârewec: Sâpene juwic mâreņkopec irec biņe 20, ²⁴ erâ katapa 20 irec juwic tofanao siliwazi râqâc 40 bawec; katapa mocte bareņne jajahec irec râqâc jajahec â katapa mocte bareņne jajahec

irec râqâc jajahec, iñuczi iñuc. ²⁵ Erâ tiri bozere sâpene faic mârenkopec irec katapa 20 ²⁶ â siliwazi râqâc-ticne 40 jaha, katapa mocte râqâc jajahec â katapa mocte râqâc jajahec jaha. ²⁷ Tiri boze râpene, zoaᅇ huhunaopec hâcne, irec katapa 6 fasaewec. ²⁸ Erâ fic gurucne râpenao irec wâtunᅇ jajahec fasaewec. ²⁹ Eme wâtunᅇ i juwic rârâwiᅇ domahuc feku faic hoᅇneᅇ micne fowecko iitic epic; gurucne jajahec irec wâtunᅇ jajahec iñuc hâcne bawec. ³⁰ Katapa 8 i siliwazi râqâchech hâcne, mocte râqâc jajahec mocte jajahec, iñuc râe rame 16 ewec.

³¹ Eme jâmiᅇzi babasanaᅇ fasaewec, ine tiri bozere neᅇgoc ᅇifec 5, ³² â tiri bozere neᅇgoc ᅇifec 5, â râpene zoaᅇ huhunaopec irec biᅇe 5 jaha. ³³ Eme babasanaᅇ zâzâᅇiᅇko fowec izi katapa ombâᅇnao ᅇifeckonec ware raku ᅇifecko fisiwec. ³⁴ Eme katapa sasawa golzi qorockewec, erâ babasanaᅇte raraᅇi, hoᅇneᅇ hâcne i golzia bawec, â babasanaᅇ i wâc iñuc jaha golzi qorockewec.

³⁵ Qoruc ââketâc ine qoruc furi sâko keᅇkeᅇne â âmuc âmucne â bâbâroᅇ â fâfâsâc izi bawec, ehuc qâreᅇnehec fume kerubiᅇ hawari fuawec. ³⁶ Erâ wâtunᅇ-ticne 4 jâmiᅇzi fasaerâ golzi qorockewec; wâtunᅇ heheawic-ticne golzia bakicne â râqâc-ticne ine siliwa rike suenᅇkeicnezi bawec. ³⁷ Qoruc boze motâcte qoruc i qoruc furi sâko keᅇkeᅇne â âmuc âmucne â bâbâroᅇ â fâfâsâc izi bawec wâc, ehuc geronᅇewec. ³⁸ Erâ wâtunᅇ-ticne 5 i heheawic-ticnehec bawec. Wâtunᅇ utune â otecne i golzi qorockewec â râqâcne ine aeᅇ

bâbâronzi wâc bawec.

37

Qorac tapa katapa bawec (Wah 25:10–22)

¹ Eme Bezalele e qorac tapa katapa jâmiñzi fasaerâ bawec, ine zoric-ticnere sâc kubi jajahec â nâfocne, otecne-ticnere sâc kubi moc â nâfocne â hânne-ticnere sâc kubi moc â nâfocne jaha, iñuc bawec. ² Erâ mañne â sahaçne i gol qaqaçnezi qorockewec, erâ qañeñne moc rârec rârec i golzia bâjomirehuc bawec. ³ Guruc-ticne 4 irec reñ rarázi 4 jaha golzi bawec, ine ñifecte biñe jajahec â ñifecte biñe jajahec jaha. ⁴ Erâ jâmiñzi reñ jajahec fasaerâ golzi foñkewec wâc. ⁵ Eme katapa reñkeniñte reñ i katapa ñifec â ñifec reñ rarázi basanañkekicnao esorieme raziwec. ⁶ Iñuc erâ katapa tapane i gol qaqaçnezia ba akic ewec; zoricnere sâc kubi jajahec â nâfocne â otecne sâc kubi moc â nâfocne. ⁷ Erâ kerubim hawari jajahec gol hedapirekic-nezi basaric-jofawec, ehuc tapa qañeñ jahecnao bâjomirec-jofame ñepic. ⁸ Kerubim hawari moc i qañeñne ñifec â kerubim hawari moc i qañeñne ñifec; kerubim hawari i katapa tapa faio ñifec â ñifec bâjomirec-jofawec hâcne. ⁹ Kerubim jahe mamaic erâ ñehuc fakec-jekic bâfeñepire faicpec qaratiêrâ domahuc tapane qofackewec, ehame zâñe mai-jekic tapanopec enduñkepic.

Poron furu mukicne irec tebo bawec (Wah 25:23–30)

10 Eme jâmiņzi tebo fasaewec wâc, ine zoricneticnere sâc kubi jajahec, otecneticnere sâc kubi mocjaha â hânne-ticnere sâc kubi moc â nâfocne. 11 Erâ gol qaqačnezi qorockerâ rârec rârec mecqaņeņne golzia bâjomirewec. 12 Erâ qaņeņne moc metapere sâc i golzia ba akic erâ rârec rârec râe-fârewec. 13 Izi ine gol suenķekicnezi reņ rarazi 4 barâ kikene 4 irec nopacnao basanaņkewec. 14 Reņ esoriepie razime tebo reņkeniņte reņ rarazi i qaņeņnere heririņko mickewec. 15 Eme tebo reņkeniņte reņ i jâmiņzi fasaerâ golzi foņkewec. 16 Wiac teboo ņeņe i gol qaqačnezi bawec, kecziņuc: Oto, amae, râqâc â zopo eme ira hâcne taha bâzire wiac hume râe jumbiņ.

Lambe dodoma bawec
(Wah 25:31–40)

17 Eme lambe dodoma i gol qaqačnezia wâc bawec. Lambe dodomare kikene â wâtuņne i gol hedapirekicnezi bawec, eme râqâc â zariņ qoņnehec izi dodomahec qâfâsâerâ mocjaha ewec. 18 Wâtuņnere ombâņkonec ine sohocne 6 râwiņnerâ domambiņ. ņifec sohocne jahec â moc â ņifec sohocne jahec â moc jaha. 19 Erâ wawec kaoņne qoņnehec iņucne zariņ qoņne jahec â moc sohocne ņifec â ņifec domawec; lambe dodomare wâtuņkonec sohocne 6 râwiņnerâ domambiņ ira iņuc hâcne doma-fârembiņ. 20 Erâ lambe dodomare wâtuņko wawec kaoņne qoņnehec iņucne zariņ qoņne 4 bakicne. 21 Ine ziņuc domawec: Zariņ qoņnehec moc sohoc fuņne irec juwicnao, moc sohoc birine namba 2 irec juwicnao, iņuczi iņuc doma rawec. 22 Sohocne â zariņ

qorņnehec i qâfâsâerâ mocjaha efârewec, wiac i sasawa gol qaqacne hedapirekicnezi bakicne hâcne. ²³ Erâ e lambe 7 â lambere qoruc bâbâtâc â râqâc-ticne i gol qaqacnezia bafârewec. ²⁴ Gol qaqacne ņemâc-ticne 100 izi lambe dodoma â wâcwiac-ticne sasawa basaricke-fârewec.

Hosâc âsu ririkere alata bawec
(Wah 30:1–5)

²⁵ Hosâc ririkere alata i jâminzi zinjuc bawec: Zoricnere sâc kubi mocjaha â otecne sâc kubi mocjaha jaha, sâckoa bawec hâcne; hânne-ticnere sâc kubi jajahec â zuņene ine alatahec qâfâsâeme mocjaha ewec. ²⁶ Eme faine â sâpene rârec rârec â zuņene i gol qaqacnezia qorocke-fârewec â mecqanņne moc i golzia barâ rârec rârec râe-fârewec. ²⁷ Mecqanņne juwicnao ņifec â ņifec ine reņ rarazi golzi bakicne râec-jofawec, i reņkeniņte reņ ira esoriepe raziocte. ²⁸ Reņ ine jâminzi fasaerâ golzi foņkewec.

Wiac âsu bian bawec

²⁹ Erâ tiri rurua wokemaņ â hosâc âsu ririkere wiac qaqacne i âsu bian wiac bapa jaņere sâcko bawec.

38

Qowi bâzi ririkere alata bawec
(Wah 27:1–8)

¹ Erâ jâminzi qowi bâzi ririkere alata fasaewec i zoricne-ticnere sâc kubi 5 â otecne-ticnere sâc kubi 5 jaha, sâcjekic mocjaha hâcne; hânne ine kubi 3, inuc bawec. ² Erâ gurucne 4 irec zuņene 4 jaha fasaeme domawec, erâ alatahec qâfâsâerâ

domaha aen bâbâronzi qorockewec. ³ Izi alatare wâcwiac sasawa kecziñuc bawec: Kuzi, sapaç, titie râqâç, sarac â zocrâqâç; wiac i sasawa aen bâbâronzi bafârewec. ⁴ Erâ alatare sapa moc i aen bâbâronzia bawec, eme sapa izi alatare qañeñne rurumañnao âke hotahuc wefu alata ombâñnao mickewec. ⁵ Erâ sapa gurucne 4 ira aen bâbâronzi reñ rarázi 4 jaha bahuc basanañkewec, i reñ ira esoriepie raziocte. ⁶ Reñ ine jâmiñzi fasaerâ aen bâbâronzia qorockewec. ⁷ Eme alata reñkeniñte reñ i rarázi-ticnao esorieme raziwec. Alata ine katapazi mañnehec bawec.

Zuzure râqâç bawec
(Wah 30:18)

⁸ Wiac zuzure râqâç â kikene ine aen bâbâronzi basarickewec, ine ñokac tutumañ qoruc boze motâcko kiñañ gie bahuc jumbiñ jañere hawari wiac rorâ izi bawec.

Tiri bozere hae zoña bawec
(Wah 37:9–29)

⁹ Erâ ie tiri boze hae zoña-ticne bawec. Juwic mâreñkopec ira qoruc sâko fâfâsâc i qetickewec, qoruc zoricznere sâc kubi 100. ¹⁰ Qoructe wâtunñ ine 20 â wâtunñte râqâç aen bâbâronzi bakicne i 20 jaha, wâtunñte heheawic â qârârâc-ticne ine siliwazi bawec. ¹¹ Faic mâreñkopec ira qoruc iñucnea, sâcticne kubi 100 qetickewec, â wâtunñ-ticne 20 â wâtunñte râqâç aen bâbâronzi bakicne 20 jaha. Heheawic â qârârâc-ticne ine siliwazia bawec. ¹² Zoañ huhunaopeç irec qoruc ine sâcticne kubi 50 â wâtunñ-ticne 10 â wâtunñte râqâç 10 jaha, iñuc râewec, heheawic â râqâç-ticne i

siliwazi bawec. ¹³ Zoan̄ wewefunaopeç mamai hâcne, irec qoruc i kubi 50 jaha. ¹⁴ Motâc ñifecnere qoruc i kubi 15 â wâtun̄-ticne 3 â wâtun̄te râqâc 3 jaha. ¹⁵ Motâc ñifecnere sâc ijaha ewec. In̄uc eme qoruc ñifec â ñifec sâcticne kubi 15 â wâtun̄-ticne 3, 3 â wâtun̄te râqâc 3, 3 in̄uc doma rawec. ¹⁶ Qoruc hae zoña rârec rârec râe rakicne i qoruc fâfâsâc sasawa. ¹⁷ Wâtun̄te râqâc sasawa aen̄ bâbâron̄zi bakicne, heheawic â qârârâc ine siliwazi bafârekicne. Wâtun̄ botâñne sasawa siliwazi qorockekicne â hae zoñare wâtun̄ qârârâc-ticne i siliwazia bafârekicne. ¹⁸ Hae zoña motâcte qoruc i qoruc fâfâsâc â âmuc âmucne â bâbâron̄zi geron̄kekicne; qoruc zoricne-ticne kubi 20 â otecne-ticne kubi 5, erâ hae zoñare qoruchec sâc mocjaha ewec. ¹⁹ Wâtun̄-ticne 4 â wâtun̄te râqâc aen̄ bâbâron̄zi bakicne 4 jaha, heheawic ine siliwazi bakicne â botâñne i siliwazi qorockekicne â qârârâc-jeñic i siliwazia bakicne. ²⁰ Tiri boze â hae zoñare fâzâ rârec rârec râe rakicne i aen̄ bâbâron̄zi bafârekicne.

Tiri boze bapare wiac irec zare

²¹ Zi ine tiri boze, sâcmutâc dân̄te tiri boze hâcne, irec wiac sasawa zare â sâcticne Mosezi mutâcne-jarewec irec sâcko wosembin̄. Ine Lewire garikin̄fâc jañe Aron̄te ñokâ, taha bapa Itama eki hâcne soñan̄-jopaha wosembin̄. ²² Juda guruonec ñic zâñene Bezalele, Huru ñokâ-ticne Uri ere ñokâ hâcne, eki Wofun̄zi Mose dân̄ mutâcneçnewec irec sâcko wiac efârewec. ²³ Eham̄e Dan̄ guruonec ñic zâñene Oholiabe Ahisamacte ñokâ hâcne, e aen̄ wiac bapa â

ficbapa â qoruc kenkenne â âmuc âmucne â bâbâronj â fâfâsâc irec faio geroj bapa juweczi bafickewec.

²⁴ Tiri boze bapare gol râekicne sasawa irec nemâc i 2 tausenj 930, erâ i furuficte nemâc fowec irec sâc. ²⁵ Â kikefunte njic wose qârenj ejarekicnezi siliwa râembiñ irec nemâc i 10 tausenj 70, erâ i furuficte nemâc fowec irec sâc jaha. ²⁶ Ine kecziñuc ehuc râembiñ: Njic jara-jenjic 21 bazukicne janje wose qârenj ejarepie zare-jenjic 603 tausenj 550 fuawec; ehame furuficte nemâc fowec irec sâc buc buc moneñj râeniñte mujarekicne i râembiñ. ²⁷ Siliwa nemâc 10 tausenj izi ine furuficte katapa sasawa â ââketâc irec râqâc wiac rike suenkehuc bambiñ, nemâc 100 izi râqâc moc, nemâc 100 izi râqâc moc, iñuczi iñuc bame râqâc 100 fuawec. ²⁸ Siliwa nâfocne nemâc 70 fowec izi ine heheawic bawec â wâtunj qorockewec, erâ wâtunje qârârâc i siliwa izia bawec wâc. ²⁹ Aej bâbâronj tahare biñe râekicne irec nemâc ine 7 tausenj 90. ³⁰ Izi tutumanj qoruc bozere motâcte wâtunj irec râqâc mecne, alata mecne, alata sapa-ticne mecne, alatare wâcwiac mecne, ³¹ hae zoñare wâtunje râqâc mecne, hae zoñare motâcte wâtunj irec râqâc mecne erâ tiri bozere fâzâ â hae zoñare rârec rârec fâzâ râe rakicne i sasawa bafârewec.

39

*Taha bapa janjere gie ñaqi
(Wah 28:1–43)*

¹ Eme qoruc keŋkeŋne â âmuc âmucne â bâbâroŋ izi tirificko gie bapare ŋaqi ba akic ehuc qâtâmbiŋ, ŋaqi i Wofuŋzi Mose mutâcnecnewec irec sâcko Aronŋe biŋe bambiŋ hâcne.

² Ehuc qoqonaŋ ŋaqi i gol â qoruc furi sâko keŋkeŋne â âmuc âmucne â bâbâroŋ â fâfâsâc izi bambiŋ. ³ Erâ gol hejacnerâ bâtâcnepie muc eme izi qoruc keŋkeŋne â âmuc âmucne â bâbâroŋ â fâfâsâc qâreŋnehec bambiŋ. ⁴ Â qoqonaŋ ŋaqire masecne barâ tofanao zuhucke itic embiŋ. ⁵ Eme ŋaqio basanaŋkezore bâmbândeŋ-ticne i wiac izia bakicne, gol â qoruc furi sâko keŋkeŋne â âmuc âmucne â bâbâroŋ â fâfâsâc izi basarickekicne hâcne, ine Wofuŋzi Mose mutâcnecnewec irec sâko bakicne.

⁶ Eme qânâ furi sâko ba akic erâ râqâc kâwinao râepie huwec, eme qânâ furi sâko ira Israe ŋicguru 12 jaŋere zâŋe heutuckehuc qâreŋkembîŋ. ⁷ Eme qânâ jajahec i qawe ŋifec â ŋifec qoqonaŋ ŋaqi masecne zuzuhuc-jekicko basanaŋkembîŋ, erâ i Israe ŋic manasuc-jopahuc juniŋte iŋuc embiŋ; ine Wofuŋzi Mose mutâcnecnewec irec sâcko hâcne.

⁸ Eme amecte qâ i qoqonaŋ ŋaqi iŋucne gol â qoruc furi sâko keŋkeŋne â âmuc âmucne â bâbâroŋ â qoruc fâfâsâc izi ba akic ehuc bambiŋ. ⁹ Zoricne â otecne sâcjekic mocjaha, erâ sâcticne i 9 inses bahuc maine â râpene baturec-jofarâ bacjofambiŋ. ¹⁰ Erâ qâ faio qânâ birine 4 birick-embîŋ. Biri namba wâŋ ira qânâ furi sâko ziŋuc birickepie forawec: Saradiu i qânâ bâbâroŋ, Topazi i qânâ âmuc âmucne, ¹¹ Karapuŋke i

qânâ ârân qâri. Biri namba 2 ira ine qânâ furi sâko kecziñuc râembiñ: Emerali i qânâ ârân qâqâri, Safiri i qânâ kenkenje â Daeman i qânâ qaqaç taenje kiruñ tinac. ¹² Biri namba 3 ira qânâ furi sâko ziñuc birickembiñ: Jazinti i qânâ bâbâron soc tinac bâbâron, Akata i qânâ buge inucne â Ametisi i qânâ qondañ horiki tinac. ¹³ Biri namba 4 ira ine qânâ ziñuc birickembiñ: Berili i qânâ bâbânen, Onisi i qânâ bâbâron funmoc, erâ Jasipe i qânâ birâ birâ. Erâ qânâ i sasawa râqâç golzi bakicne ira râepie fowec. ¹⁴ Eme qânâ furi sâko 12 jaje zâne-jenichec sasawa, zâne i ine Israe qâricfâc-ticne jajere sâko heutuckehuc qârenkepie fowec. ¹⁵ Eme amecte qâ ira gol qaqaçnezi muc kâpâcwâru hawari mizekicne i basanañkemiñ. ¹⁶ Erâ babasanañ jajahec â honenjen jajahec golzi barâ honenjen i qâ qanen jaheçnao basanañkemiñ. ¹⁷ Erâ golzi muc jajahec qâ qanenjao honenjen jajahec basanañ-jofakicnao esoriemiñ. ¹⁸ Erâ muc tofa jaheçne i heheawic jajahec ira basanañkemiñ wâç, ehuc qoqonañ naqire masecne mamai fowec ira basanañkemiñ. ¹⁹ Izi honenjen jajahec golzia barâ qâ mañnere qanenje nifec â nifec qoqonañ naqi heririñnao basanañkemiñ. ²⁰ Erâ gol honenjen jahec â moc barâ qoqonañ naqi zuzuhuc-ticne juwicpec mamai fowec erâ bâmbânden ba akic ekicne izi basanañ-jofawecko râembiñ. ²¹ Inuc ehuc qâ i qoruc muc kenkenjezi qoqonañte honenjenko basanañkepie qoqonañte bâmbândenko fosanañkewec. I qâzi qoqonañ naqionec ñetarazacte inuc embiñ. Wiac i Wofunzi

Mose mutâcnecewec irec sâcko embiñ hâcne.

²² Eme qoqonañ ñaqi irec juwicnao ñaqi zorice moc qoruc furi sâko keñkeñezi fumbiñ. ²³ Ehuc faic momori jañere aen ñaqi hawecnehec bajumbien inuc jaha hawecnehec bambiñ, erâ tâcnezacte hawecne râreckehuc qañeñe qâtâmbiñ. ²⁴ Ñaqi qañeñe juwicne ira ine jâchândân qâqâtâc qoruc keñkeñe â âmuc âmucne â bâbâronñ izi ba akic ehuc basanañkemiñ. ²⁵ Erâ goñgoñ gol qaqacnezi bambiñ. Erâ goñgoñ mecne jâchândân qâqâtâc mecne i ñondenko huhuc qetickepie ñaqi qañeñnao rârec rârec waha doma rawec. ²⁶ Goñgoñ moc â jâchândân qâqâtâc moc, inuczi inuc ocñondenñ taha giere ñaqi qañeñnao râe rambiñ, i Wofuñzi Mose mutâcnecewec irec sâcko embiñ hâcne.

²⁷ Erâ Aronñ ñokâfâcne jañere ñaqi i qoruc fâfâsâc fukicnezi bambiñ wâc. ²⁸ Ehuc maikura â dujenic i qoruc fâfâsâczia bambiñ, â kike ñaqi-jenic ine qoruc âmuc âmucne fâfâsâczi qâtâmbiñ. ²⁹ Umbika ine qoruc fâfâsâc â qoruc furi sâko keñkeñe â âmuc âmucne â bâbâronñ izi ba eric embiñ; i Wofuñzi Mose mutâcnecewec irec sâcko embiñ hâcne.

³⁰ Erâ tiri masapu i gol qaqacnezi barâ irec fainao dân zinuc heutuckehuc qâreñkemiñ: “Wofuñte erâ bâtirikicne”. ³¹ Erâ masapu i muc keñkeñezi bânđennerâ maikura fainao basanañkemiñ, i Wofuñzi Mose mutâcnecewec irec sâcko embiñ hâcne.

Tiri bozere wâcwiac bafârembiņ
(Wah 35:10–19)

³² Inuc epie tiri bozere gie sasawa tarawec. Ehame Israe ñic ñokac jaņe Wofuņzi Mose dân âzâcne mutâc ewec sâc i mana reren efârehuc inuc hâcne embiņ. ³³ Taram e tiri boze Moserao bafisimbiņ. Wiac kecziņuc bafisimbiņ hâcne: Qoruc boze â wâcwiac-ticne sasawa, heheawic-ticne, katapa-ticne, babasanaņ-ticne, wâtuņ-ticne, râqâc-ticne, ³⁴ bupure qoruc lama â noniņ sahaçi bakicne â peņzi rikekicne, erâ ââketâc qoruc i mâmâc. ³⁵ Qorac tapa katapa â rențicne erâ tapane, ³⁶ tebo â wâcwiac-ticne erâ poroņ furu mukicne; ³⁷ erâ lambe dodoma gol qaçacnezi bakicne sohocne â râqâc kâwinehec, â wâcwiac-ticne sasawa erâ tatamacte wokemaņ. ³⁸ Alata golzi bakicne i â rurua wokemaņ erâ wiac âsu bian, erâ qoruc boze motâcte qoruc. ³⁹ Alata aeņ bâbâronzi bakicne â sapa-ticne aeņ bâbâronzia bakicne, rențicne â gie bapare wiac sasawa, wiac zuzure râqâc sâko â kikene mâmâc. ⁴⁰ Hae zoņa sâpere qoruc â katapa â râqâc-ticne â hae zoņa motâcte qoruc, erâ muc â fâzâ wiac-ticne, erâ tiri boze, tutumaņ qoruc boze hâcne irec maņnao gie bapare wâcwiac sasawa. ⁴¹ Tirificko gie bapare ñaqi ba akic ehuc qâtâkicne, taha bapa Aron ere tiri ñaqi â ñokâfâcne jaņere taha giere ñaqi hâcne. ⁴² Wofuņzi Mose dân mutâcnecnewec irec sâcko Israe ñic ñokac jaņe gie inuc hâcne bafârembiņ. ⁴³ Eme Mose e wiac ebac embiņ i sasawa hone-fârerâ ziņuc hâcne mana tarawec: Wofuņzi muwec irec sâcko jâmbâņ efârekicne.

Injuc manarâ jambuņ-jopawec.

40

Tiri boze mutirimbiņ

¹ Eme Wofuņzi Mose kecziņuc âzâcnewec:
² “Fufuņke mosare zoaņ gie bapa namba wâņ
 ira tiri boze, tutumaņ qoruc boze hâcne wisetec
 huzejec. ³ Ehame qorac tapa katapa i maņnao
 hetec ņeha qoruc ââketâczi sâockezejec. ⁴ Erâ
 tebo injuc jaha boze maņnao hetec ņeha fainao
 poroņ furu mukicne i râe biric ezemec, â
 lambe dodoma wâc baferâ lambe wiac-ticne
 âkendâņnezemec. ⁵ Erâ hosâc âsu ririkere alata
 golzi bakicne i qorac tapa katapa maņfuņnao
 hetec ņeha tiri boze motâcte qoruc ââketâc
 qetickezemec. ⁶ Qowi bâzi ririkere alata ine tu-
 tumaņ qoruc bozere motâc fuņnao hetec ņezejec.
⁷ Ťuzure râqâc sâko ine tutumaņ qoruc boze â
 alata ņonden-jekicko hetec ņeha opâ qatec huze-
 jec. ⁸ Erâ rârec rârec hae zoņare sac bafârehuc
 motâc-ticnere qoruc qetickezemec. ⁹ Izi rurua
 wokemaņ rorâ tiri boze â maņnao wiac ņerakac
 sasawa i ruacnetec tiri ņezejec. ¹⁰ Qowi bâzi
 ririkere alata â gie bapare wiac-ticne sasawa i
 injuc jaha wokemaņ ruacnehuc bâtirizemec, eme
 alatazi tiri jâmbâņ ņezejec. ¹¹ Erâ zuzure râqâc
 â kikene i injuc jaha wâc wokemaņ ruacnehuc
 bâtirizemec. ¹² Injuc erâ Aroņ â ņokâfâcne eja-
 retec ware tutumaņ qoruc bozere motâcko domahapie
 opâ rua-jarezemec. ¹³ Erâ Aroņ tiri ņaqi-ticne hec-
 netec hume wokemaņ ruacnehuc mufirietecne
 taha bapa-nane erâ juzejec. ¹⁴ Eme ņokâfâcne

jane wâc mutec ware domahapie ŋaqi zora he-jaretec huzejec. ¹⁵ Eme mamac-jen̄ic wokemaŋ ruacnecmu iŋuc jaha jane wokemaŋ rua-jaretec taha bapafâc-nane erâ junzepieŋ. Eme wokemaŋ rua-jarehuc mimiŋzi qâric taha bapa gie forahuc juocte mutara-jarezemec.”

¹⁶ Eme Mose e Wofuŋzi mutâcnecnewec irec sâcko jâmbâŋ wiac efârewec. ¹⁷ Eme jara namba 2 irec fufuŋke mosare zoaŋ gie bapa wâŋ ira tiri boze wiseme huwec. ¹⁸ Mose e tiri boze ziŋuc ehuc bafaharewec: Râqâc wiac-ticne heme ŋeha katapa âkendâŋnewec, erâ babasanaŋ-ticne râerâ wâtuŋ bâfeŋnewec. ¹⁹ Eme tiri boze bupunere qoruc fâreme sâcke-fârewec, erâ fainao bupu sâsâc-ticne i Wofuŋzi Mose âzâcnewec irec sâcko qaratiwec. ²⁰ Izi ine Sâcmutâc Sanaŋ qorac tapa katapa maŋnao râeme huwec, erâ reŋ i fofonao esorieme raziwec, eme tapa-ticne qorac tapa katapa fainao heme ŋewec. ²¹ Eme qorac tapa katapa i tiri bozeo baferâ qoruc ââketâc qeticke me qorac tapa katapa sâockewec. Wofuŋzi Mose âzâcnewec irec sâcko ewec hâcne. ²² Erâ tebo i tutumaŋ qoruc boze ira faic mâreŋkopec qoruc ââketâc sahacnao heme ŋewec. ²³ Ŋehame fainao poroŋ furu mukicne i Wofuŋte maio râe biric ewec, i Wofuŋzi Mose dâŋ âzâcne mutâc ewec irec sâcko jaha ewec. ²⁴ Izi lambe dodoma i tiri boze juwic mâreŋkopec ira tutumaŋ qoruc bozeo tebo ŋifecnao heme ŋewec. ²⁵ Erâ Wofuŋzi Mose âzâcne mutâc ewec irec sâcko lambe wiac-ticne i wâc Wofuŋte maio âkendâŋnewec. ²⁶ Eme alata golzi bakicne i tutumaŋ qoruc bozeo

ââketâc qoruc heririŋnao heme ŋewec. ²⁷ Ehame wiac âsu bianzi hosâc âsu rikewec, i Wofunzi Mose mutâcnewec irec sâcko ewec. ²⁸ Ehuc tiri bozere motâcko qoruc qetickewec. ²⁹ Qowi bâzi ririkere alata i ine tiri boze motâcnao heme ŋeha fainao qowi bâzi rikewec â taha bawec. Wofunzi Mose dâŋ âzâcnewec irec sâcko ewec hâcne. ³⁰ Eme wiac zuzure râqâc i tutumaŋ qoruc boze â alata ŋonder-ŋekicko heme ŋeha opâ qame huwec. ³¹ Eme Mose mecne â Aron â ŋokâfâcne mecne jaŋe ira me kike-ŋen-ŋe zure jumbien. ³² Ine tutumaŋ qoruc boze razimbiŋ sâc me alata maickembiŋ sâc iŋuc ejumbien hâcne. I Wofunzi Mose âzâcne mutâc ewec irec sâcko embiŋ. ³³ Wiac i tara-fâreme tiri boze â alata rârec rârec hae zoŋa bafârewec. Ehuc hae zoŋa motâc irec qoruc qetickewec. Mose e iŋuc ehuc gie batarawec hâcne.

Karoraczi tiri boze qofackewec
(3ar 9:15–23)

³⁴ Eme karoraczi tutumaŋ qoruc boze qofackewec, ehame Wofunŋe tatamaczi tiri boze fusucmawec. ³⁵ Eme karoraczi tutumaŋ qoruc boze qofackehuc fowecte â Wofunŋe eri tatamaczi tiri boze fusucmawecte Mose e ira wemocko moc razizac. ³⁶ Eme Israe ŋicguru jaŋe mâreŋ sawao jumbiŋko karoraczi tiri bozeonec fewec sâc hata-ŋen-ŋe zuhuckerâ rajumbien. ³⁷ Karoraczi mi fahareme ine jaŋe mi rara fahareocte mâc woŋec jujumbien. ³⁸ Zoanŋko Wofunŋe karoraczi tiri boze qofackerâ fowec hâcne, â ŋafeo ine Israe ŋicguru

zengoma jaŋere maio zocbâruŋ tinac bâruŋkewec.
I mâreŋ sawao juhapie iŋuc hâcne fua jujec.

Kâte Bible
The Holy Bible in the Kâte language of Papua New Guinea
Buk Baibel long tokples Kate long Niugini

copyright © 1978 The Bible Society of Papua New Guinea

Language: Kâte (Kate)

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-11-22

PDF generated using Haiola and XeLaTeX on 11 Nov 2022 from source files dated 30 Nov 2021

76869875-8293-5126-8b67-c576c145ac3c